

شالیه ۷

روایۃ

کریم جمال

دار بيوند للنشر والتوزيع
٤ ش كمال حسين متفرع من ومبي الهرم
٠١٠٩٦٩٠٠٠٠٧

Beyond.dbh@gmail.com

جميع الآراء الواردة في هذا الكتاب تعبر عن رأي كاتبها. ولا تعبر بالضرورة عن رأي دار النشر

الكتاب: شاليه ٧

المؤلف: كريم جمال

الطبعة: الاولى

تصنيف الكتاب: رواية

تصميم الغلاف: محمد مجاهد

التدقيق اللغوي: أحمد محمد عبد الستار

الإخراج الداخلي: صبرينة غلمي

رقم الإيداع: ٢٠١٨ / ٢٢٣٩٤

التقديم الدولي: ٨-٢٨-٥٦٤٥-٩٧٧-٩٧٨

دار (بيوند) للنشر والتوزيع

المدير العام

رئيس مجلس الإدارة

صبرينة غلمي

محمد عز الدين

+٢٠١٠٩٥٦٠٠٠٠٧

beyond.dbh@gmail.com

" إهداء إلى أخي الصغير وداعمي الأول
لإخراج هذا العمل المتواضع إلى النور
 وإهداء إلى كل من أشعل في طريقي شعلة
 من الأمل لتدفعني إلى الخروج من نفقي
 المظلم.. "

"من رحم المعاناة.. يولد الإبداع"

مثل فلسطيني

الفصل الأول

بداية الرحلة

الخميس ٧ يوليو ٢٠١٦ الساعة ٨ مساء

- مبروك التخرج يا عم خالد.

- الله يبارك فيك ياخويا.. فكرني بقى بالمناسبة دي أول ما نروح أخرج من جروب الدفعة.

- ليه بس ما تخليك.. نسوانك كلهم جوة.

- يا عم نسوان إيه بس صلي على النبي.

- عليه الصلاة والسلام.

- هم دول نسوان! أنا كان الصبح أعمل زيك كدا، أدخل وأخرج من المدعوقه دي من غير ما حد ياخذ باله مني.. بدل وجع الدماغ دا، دا انت حتى تلاقي محدش افكر يباركك النهاردة غيري.

- مقبولة منك يا سيدي.. بس لما هو وجع دماغ أو مال بروح أمك كنت بتتنطط هنا وهناك كل يوم مع واحدة طول الأربع سنين اللي فاتوا ليه؟

- تسالي يا عم.. بنغير جو لبعض، وبعدين هو أنا كنت ضربت واحدة منهم على إيدها؟

- خالد يا مسلم.. احترم نفسك عشان خلاص كلها شهرين وتلاقي مريم بتقولك تعالى اتقدملي.. أنا بقولك أهو.

- يا عم مريم مين بس دلوقتي أنا هروح أغير البدلة دي وشوفلنا حتة نحفل فيها.. بس بلاش ونبي أماكن البؤساء بتاعتك دي.. شوفلنا حتة عدلة.

- هتفضل تتنطط عليا كدا وتقولني أماكن بؤساء وهترسي على بلاي ستيشن في الآخر.

- أو أجيب قطعتين من الجنس الناعم وأجيك على الفيلا المهجورة اللي جدك الباشا سابها لك دي.

- لسه بقولك احترم نفسك يا خرة تقولي قطعتين من الجنس الناعم!

- روح يا علي شوف حالك الله يرضي عليك انت مش وش دلع.. روح هاتلك شوية مكسرات وقضي الليلة على فيلم أبيض وأسود من أفلامك التعبانة دي.

- طب بقولك صحيح.. أنا احتمال كمان يومين كدا أطلع الساحل أفضي دماغي شوية قبل السفر، ما تيجي معايا؟

- لسه ماشيلتش من دماغك حوار سفرية أبوك دا؟

- يا عم أبويا عجز وبقى عايز حد يشيل عنه الشغل، وبعدين حد يجيله فرصة يهجم من هنا ويمسك شغل أبوه برة ويقول لأ؟ اخلص ها جاي معايا ولا لأ؟

- يا عم اعتبرني معاك بس هنروح ازاي وهننزل فين؟

- هنروح بعزيمة يا عم احنا لينا غيرها.. يارب تكمل معنا السكة بس.

- ماشي وهننزل فين؟

- فيه قرية كدا كنت بروحها مع جدي فاضية اليومين دول عشان الشتاء خلاص داخل.. فا حجزت هناك شاليه صف أول من البحر، جو من اللي قلبك يحبه يعني.

- حلو دا يا أبو شام.. متعرفش أعمل حسابي في كام طيب؟

- لا مش كثير، أنا دفعت كل حاجة تقريبا مفاضلش غير الأكل.. لو مش هتجبلنا كل يوم مومس من بتوعك هات معاك كام ورقة بمية كدا.

- مومس من بتوعي؟! اللي يسمعك بتقول كدا يلا مايشوفكش وانت قاعد بتحشش كل ليلة على أنغام ليلي مراد.

- خالد.

قطع حوارهم صوت فتاة تنادي (خالد)، فنظر (علي) ليجد مريم في جمال لم يسبق له أن يراها به من قبل.

مريم فتاة في أوائل العشرينيات، ذات بشرة بيضاء وشعر بني ناعم، ترندي عوينات دائرية وعلى وجهها ابتسامة هادئة، فأجابها خالد:

- إيه يا بنتي فينك طول الحفلة مش لافيكي؟

- كنت مع بابا.. ازيك يا علي؟

- الحمد لله يا مريم كله تمام.. طيب همشي أنا يا عم خالد ونتقابل بليل
بقي عند زيكاشوف هنروح فين.

- ماشي يا أبو شام.

- سلام.. سلام يا مريم.

- باي.

الأحد ١٠ يوليو ٢٠١٦

مع دقة التاسعة صباحا كان قد تأكد علي من وضع آلة الكمان العتيقة التي يمتلكها في سيارته التي تنتمي إلى طراز الستينيات والتي أطلق عليها علي وخالد اسم "عزيزة"، آلة كمان وفيللا من الطراز القديم وسيارة "أنتيكة" وكومة من الكتب إن استمر علي في قراءتها حتى نهاية عمره لن تنتهي.. كلها أشياء قد ورثها علي عن جده "قاسم الشامي" الذي صدق خالد عندما وصفه بالباشا.. كان للحشيش الأولوية بين لوازم السفر التي تجعل الرحلة أكثر متعة.. فعندما تأكد من وجود لفة الحشيش التي قام بشرائها البارحة في "التابلوه" كان قد استعد للاتجاه إلى منزل صديقه خالد حتى يأخذه ويتجهان إلى تلك القرية السياحية التي أشار إليها علي في حواراه مع خالد يوم حفل التخرج. بعد قرابة النصف ساعة وصل علي إلى منزل صديقه واتصل به ليخبره أنه ينتظره في السيارة أمام مدخل العمارة، عمارة قديمة لا يمكنك أن ترى جدرانها من كثرة التراب الذي تراكم عليها عبر السنين، تتوسط حيا شعبيا من أحياء الإسكندرية القديمة، حيث كان خالد من أسرة أقل من المتوسطة برغم أنها تنتمي لعائلة كبيرة تسمى بعائلة "مسلم"، حيث إن وفاة والده عندما كان في الثامنة من عمره ومرض والدته بسرطان الدم أثرا كبيرا علي الأسرة وعلى خالد بالأخص.. يعمل في محل ملابس حريمي بجانب الدراسة ويقضي أغلب وقته المتبقي إما في المحاولات المستميتة لربح المال حتى يقدر علي تحمل مصاريف المنزل وعلاج والدته أو برفقة صديقه الوحيد من جنس الذكور.. علي، بعد دقائق معدودة وصل خالد بعدما أكد علي جارتهم "أم عبير" أن تهتم بوالدته لحين عودته حتى يبدأ الصديقان رحلتها الي الساحل الشمالي التي قرروا بدايتها من الصباح الباكر حتي لا يضيعوا على انفسهم نهار

اليوم الأول.. وبعد لحظات ألقى بهم خالد التحية علي صديقه ساد الهدوء في أنحاء السيارة العتيقة التي شهدت قصة حب أجداد علي منذ ما يقرب من ستة عقود زمنية وبدأ علي ذاته في التفكير اللا منتهي في مريم، فمريم لم تكن بالنسبة لعلي حبيبة أعز أصدقائه فحسب، فقد كان علي معجبا بمريم من السنة الأولى لهم في الجامعة وتطور هذا الإعجاب الي حب في السر لم تعرف عنه مريم شيئا بسبب خوف علي ألا يلقى منها القبول عند الاعتراف لها بمشاعره.. حتى جاء الفارس المغوار الذي لا يواجه صعوبة في اقتلاع وردة مثل مريم من جذورها وأخذها.. أخذها من أعز أصدقائه دون أن يعلم بحقيقة مشاعره تجاهها، مع عبور الصديقين منطقة العقارات السكنية واتخاذهم للطريق الصحراوي بدأ خالد في الحديث:

- بقولك إيه ابقني اركنلنا عند أقرب بنزينة عشان عايز أجيب سجاير وأخش الحمام.

- مشخنتش في بيتكوا ليه يا حيليتها؟

- اخلص.

- ماشي.. هبقي آجي معاك أنا كمان عشان لسه هنتلطح ساعة عند مكتب التسكين.

- نعم بروح أمك؟ انت مش قايل حجت؟

ظهرت معالم الضيق على وجه علي بينما قال:

- يا بهيم حاجز بس لسه هنستلم مفتاح الشاليه ونعرف شاليه نمره كام.. مش عزبة اللي جابوني هي.

- اه.. طب كويس عشان البت رنا جاي.

قاطععه علي قانلا:

- لا لا لا بقولك إيه مفيش الكلام دا.. وبعدين دي قرية تبع الجيش يعني مفيش المسخرة دي جوة.

- هنشدوا طول الكام يوم اللي قاعدينهم يعني يا أبو شام ولا إيه ما تعدل كلامك!

- ولا.. عليا النعمة لو ما اتكتمت لأكلم مريم أحكيها عن اللي كنت ناوي تهيبه دا.

- يا عم احكيها هو أنا هخاف.. بس ياريتها كانت هنا مريم، كنت كرشتك من الشاليه وصورنا فيلم أبيع.. واهي هتبقى حلالي برضه ولا إيه يا مولانا؟

- لو كنت تعرف تعمل معاها حاجة مكانتش جابتك علي بوزك بالشكل دا.

- لو كنت عايز أعمل معاها حاجة كنت عملت.. انت أصلك مش فاهم الحريم يا أبو شام، البت من دول بتفضل ماسكة روحها لحد ما تظمن إن نيتك خير وبعد كذا سيب الباقي علي الشيطان.

ظهرت معالم الضيق على وجه علي رغم محاولته لإخفائها:

- طب اخرس بقي وانزل.. أدينا وصلنا البنزينة.

في تمام الثانية عشر ظهرا كان يمكث في سيارة علي شاب أشقر مفتول العضلات ذو جسد متناسق ولحية قصيرة يعبث بجواله أمام مكتب التسكين الخاص بالقرية منتظرا أن يأتيه علي من الداخل ومعه مفاتيح الشاليه، القرية شبه فارغة من المستأجرين.. فقد لاحظ خالد هذا منذ وصولهما، لا وجود لسيارات مستأجرين أو مظاهر حياة على الشاليهات المحيطة.. لا تسمع أذنه ضجيج أطفال ولا ترى أعينه نساء شبه عاريات، لم يلق هذا الهدوء المبالغ فيه استحسان خالد الذي دائما ما كان يحب أجواء الفرحة والصخب.. ولم يطل انتظاره حيث وصل علي بالفعل بعد دقائق معدودة.

- إيه يا عم الجو دا؟

- ما أنا قولتلك يابني إن القرية هتبقى هادية شوية.

- قولت هادية بس ماقولتش مهجورة.. أنا قولت يمكن قصدك إن مفيهاش فلاحين بس مكنتش أعرف إن مش هيبقى فيها حد خالص!

- وماله يا عم هو حد يكره.. تخيل بقى الجو بليل كدا وانت قاعد على البحر في شاليهك ومعاك بيرتك ودخانك.. في أحلى من كدا؟

- طب بس بزيمة أهلك مش المقومات اللي قولتها دي ناقصة حاجة؟

- متوجعليش دماغي بقى.. اقعد لحد بكرة ولو متكيفتش وعايز تروح هبقى اطلبلك عربية تيجي تاخذك يا عم.. خلاص؟

- ما علينا.. المهم جيت المفاتيح؟

- أو مال كنت بنيل إيه جوة!!

- طب ما تنجز يابني وتطلع بينا عالمخروب دا مستتي إيه؟

- اتكلم بأسلوب أحسن من كدا.

- انتنجز!

- طيب.. تقولش ياخويا مارلين مونروه مستنيك هناك؟

بعد بضعة دقائق من البحث وصل الصديقين إلى شاليه صغير يحمل لوحة صدئة مخطوط عليها بخط عربي قديم "شاليه ٧" ويطل مباشرة على البحر، برغم أنه لم يكن آخر الشاليهات المتبقية وبرغم أن أغلب شاليهات القرية كانت خالية ولكن كان هذا الشاليه هو الذي اختارته لهم قرعة مكتب التسكين بين كل شاليهات الصف الأول، تحاوطه حديقة صغيرة شبه غارقة في مياه الصرف.. يسكن أرضها الهدايد الملونة وأمامها ببضعة أمتار الشاطئ، فور خروج العامل الذي أرسله مكتب التسكين ليراجع على نظافة الشاليه واحتياجات مستأجريه الجدد بدأ الصديقان في استخراج أجهزتهم المحمولة وبعض ملابسهم من الحقائب حتى يبدأوا ممارسة يومهم الأول الذي قرر علي أن يقضيه في الشاليه وقرر خالد أن يقضي نهاره في نزول البحر وليله في مشاهدة مباراة كرة القدم التي تجمع بين قطبي اسبانيا أو ما يسمونها الناس بـ"الكلاسيكو" في كافيتريا القرية، لم يتطلب الأمر كثيرا من الوقت حتى يدرك خالد أن رغبة علي في قضاء اليوم وحيدا في الشاليه لم تأت بسبب أي حساسيات بل إنها عادته منذ زمن فقرر تركه على راحته وعدم مجادلته كثيرا حيث إنه يعلم جيدا أن مجادلة شخص مثل علي لإقناعه بما لا يريد أمر شبه مستحيل.

ذهب خالد ليلحق بساعات النهار الأخيرة في البحر واتجه علي إلى المطبخ لكي يحضر فناناومن القهوة ويجلس في شرفة الشاليه حتى يبدأ في قراءة رواية لفتت انتباهه منذ أيام قليلة عندما كان يتنزّه وحيداً في "محطة الرمل" أو المنطقة الأكثر اشتهاً ببيع الكتب والروايات في الإسكندرية، حيث إنه قرر منذ لحظة اقتنائه لها ألا يبدأ في قراءتها إلا عندما يتقابل مع البحر وجها لوجه بعيداً عن ضجة المدينة.

بعد أن انغمس علي في قراءة فاتنته التي فضل اصطحابها معه دوناً عن كل روايات جده، وبعد أن مضت ساعة ونصف له في قراءتها دون أن يشعر وجد خالد يمضي ناحيته تاركا الشاطئ:

- ما تلحق يابني تنزل الماية شوية قبل ما الشمس تروح.

- مليش مزاج.

- ملكش مزاج ولا تحب أروح اجيبك حته بلونداية كدا تاخذك من إيدك وتتنزلوا في بعض تفعيص تحت الماية شبه الأفلام الأجنبي بتاعتك؟

قال علي مازحا:

- طب وبلونداية ليه.. ما تيجي انتي يا بيضة.

- لا يا اخويا مليش في الناشف.

- طب روح انت يا عم كازانوا شوف حالك.. أنا احتمال أقضي باقي اليوم هنا.

- طب أنا هخش استحمي وأغير هدومي وأروح أشوف حاجة ناكلها، متعرفش أي مطعم ولا نيلة هنا؟

- اه فيه مطعم وكافيتريا في مدخل القرية، انت مش قولت في ماتش باين؟

- اه كمان ساعتين، هروح أجيب حاجة تتاكل من هناك في السريع وأبقى أرجع أشوفه بعد ما ناكل.

- لا اضربك انت أي حاجة هناك لو عايز واقعد لحد الماتش، أنا مش جعان دلوقتي.. ابقى هاتلي معاك أي حاجة وانت راجع بليل بدل ما تروح وتيجي وتروح تاني.

- أحبك يابو شام وانت حساس كدا.

- او عى تتوه وانت راجع بس.. "شاليه ٧" ها.

- ماشي.

ترك علي روايته في ثلثها الأول بعدما قطع خالد اندماجه في أحداثها وانتظر حتى تأكد من خروج خالد من الشاليه ليخرج هاتفه الذكي ويبدأ في الاستماع إلى مذكراته التي لطالما فضل تسجيلها بصوته عن كتابتها ليستشعر من نبرة صوته ما لا يستطيع قلمه على الكتابة.

"أنا فرحان أوي.. النهاردة أخيرا خدت الخطوة واتعرفت على أجمل بنت في الدنيا.. مريم، قصدت أخبط فيها واحنا خارجين من السيكشن وأكلمها بأسلوب مش حلو عشان أروح أعتذرلها بعدها ونتعرف، عارف إنها طريقة دبش وكان ممكن أوي متظبطش بس أعمل إيه يعني ما أنا

معرفش حد من شلتها وأخاف أقول لخالد يعرفني عليها لحسن ياخذها هو لنفسه.. هو أنا اه لسه مخدتش منها عقاد نافع بس أهو على الأقل أقدر بعد كذا أنظلمها بأي حجة.. أنا هخش أنام بقى وبكرة هبقى أطلب منها أصور منها محاضرات ولا أخترع أي سبب عشان أكلمها.. المهم فتحت معاها سكة، ولد يا علوة طول عمرك والله"

ابتسم علي ابتسامة سخرية من نفسه، أو ربما سخرية من القدر.. ثم ردد قائلاً:

"ولد يا علوة اه.."

ترك كرسيه ليتجه إلى غرفة النوم ويخرج كمانه العتيق من صندوقه الخشبي ويتمم على وضع كرسي ثقيل أمام باب الغرفة بعدما تأكد من غلقه جيداً ثم ينهمك في العزف اللا متوقف.. شاب في الثانية والعشرون من عمره يعزف بمهارات أفضل عازفي الكمان في التاريخ، وكأنه قد ولد محتضناً في يسراه آلة الكمان.

بعد قرابة الثلاث ساعات من العزف اللا منتهي توقف علي عن العزف وأعاد آلة الكمان لصندوقها الخشبي ثم ألقى بجثته فوق أحد فراشي الغرفة واستغرق في النوم العميق.

استيقظ علي على صوت خالد ينادي من خلف الباب:

- علي.. انت يا بني آدم افتح! دا مات دا ولا إيه.. يا بني!

فتح علي الباب فبادره خالد قائلاً:

- الله يحرقك افكرتك مت.. كنت بتعمل إيه عندك جوة كل دا وحاطط الكرسى قدام الباب إيه؟

رفع علي صوته قائلاً:

- هكون بعمل إيه يعني يا أذكى اخواتك؟ كنت مخمود.. هي الساعة كام؟

- الساعة داخلة على ١٢ بعد نص الليل، عملت إيه في يومك؟

- ولا حاجة.. انت مشيت من هنا وأنا دخلت نمت.

- طب أنا مرضتتش أكل من غيرك، هحط الأكل على الترابيزة برة وانت خش اغسل وشك وتعالى.

- ماشي

- بس اعمل حسابك الشاي عليك بعد الأكل.

- حاضر.

انتهى الصديقان من تناول طعامهما ثم ذهب علي إلى المطبخ لتحضير الشاي، بعد دقائق أنهى بهم خالد تنظيف الطاولة وأحضر فيهم علي الشاي شرع خالد في الحديث:

- بقولك إيه الماتش كان فاجر والكافيتريا كلها كانت بتخدم عليا لوحدي.. كانت ناقصاك القعدة والله.

- ما انت عارف بقى مليش في الكورة.

- أومال ليك في إيه بس يا علي.. أنا من يوم ما عرفتك وانت ولا عندك
هواية ولا اهتمامات ولا حتى بت تحبها!

- مين قالك؟

- مين قاللي إيه؟

- لا قصدي مين قالك اني معنديش هوايات.. ما الكمانجة متلقحة جوة
أهو والروا.. ولا صحيح فين الرواية اللي كانت هنا؟

- شلتها لك جوة كان فيه قطة نائمة عليها.. قولي يا أبو شام صحيح انت
عمرك ما فيه بت عجبك كدا ولا كدا؟ أصلي بدأت أشك فيك الصراحة.

- لا يا سيدي مفيش.. شك براحتك.

- ولا حتى وانت صغير؟

- ولا وأنا صغير.

قال خالد مازحا:

- لا أنا كدا هخاف منك بجد.. طب ألم عزالي وأقوم أروح قبل ما يبجي
معاد النوم ولا إيه؟

- ياريت.

ظهرت معالم الضيق على وجه خالد فقال علي محاولاً تهدئة الأجواء:

- خلاص متتقمصش كدا ياخويا وتلويلي بوزك.. بهزر.

- هو انت ليه كدا يا علي؟

- يعني إيه كدا؟

- يعني ليه بتعاملني بالطريقة دي؟

- فيه إيه يابني كل دا عشان رميت كلمة بهزار؟

- لا انت فاهم قصدي كويس.. انت طول عمرك بتعاملني كأني عبء عليك أو مصاحبك غصب، مع إن ربنا عالم بمعزتك عندي والله.

- يلا إيه اللي انت بتقوله دا بس انت أخويا وبعاملك كدا بعشم بس.

- مش مصدقك بس ماشي.

- لا تصدقني غصب عنك.. عشان أنا محبش إن صاحبي الوحيد في الدنيا دي كلها يظن فيا كدا.. وبعدين لو دي طريقيتي معاك انت بالذات إيه اللي هيخلي الناس كلها تبعد عني كدا يعني؟

- ماشي يا صاحبي.. مصدقك.

قرر خالد أن ينسحب في هدوء من جلسته مع علي بحجة الذهاب للنوم ليتبعه صديقه بعد أن تم على غسل الصحون وإغلاق أنوار الشاليه.

الإثنين ١١ يوليو ٢٠١٦

- مع بداية اليوم الثاني وفي تمام الساعة صباحًا استيقظ علي على صوت المنبه المزعج الذي ضبطه خالد قبل أن ينام.

- خالد.. انت يا سي زفت!!

- صباح الخير.

- صباح النور يا سيدي.. اقل الخرة دا!

- حاضر حاضر..

- هي الساعة كام؟

- الساعة ٧.

- وظابط المنبه يصحينا بدري كدا ليه!

- لا أنا كنت ظابطهولي أنا عشان أقوم أجري شوية عالبحر.. معلىش بقى مخدتش بالي إنه هيصحك انت كمان.

- الله يسامحك يا أخي صحتني من أحلى نومة.

ترك خالد فراشه سائلا:

- طب إيه ناوي تنام تاني ولا أعملك معايا حاجة تشربها؟

- لا خلاص بقى صحيت.. اعلمي نسكافيه معاك.

- طب قوم اغسل وشك وحصلني على برة.

- ماشي روح انت وهتلاقيني في ديلك.

التقط علي ملابسه حتى يلحق بخالد، فمن عاداته الأزلية أن ينام بملابسه الداخلية مهما اشتدت برودة الجو، وبرغم إيقاظ خالد له بطريقة مزعجة ولكنه سرعان ما كاد أن يشكره عندما توجه إلى الخارج ورأى أجمل منظر يمكن لأي إنسان أن يراه في بداية يومه، مياه البحر زرقاء وشديدة الصفاء.. لا وجود لجنس البشر، الهداهيد والطيور الملونة تملأ

المحيط والشاطئ ليس به إلا مظلة واحدة بأسفلها مقعد مغروز في الرمال وكأنها تنتظر علي الشامي بالتحديد أن يأتي ويجلس في ظلها..
سمع علي صوت خالد أت من الخلف:

- امسك النسكافيه.

- تسلّم إيدك.

لحظات من الصمت قطعها خالد بقوله:

- بقولك إيه يا أبو شام.. ما تكبر دماغك من حوار السفر دا وتخليك مع أخوك هنا ونفتح أي مشروع سوا كدا والحياة هتبقى جميلة.

- وأبويا يا أذكى اخواتك أعمل فيه إيه؟

- أبوك إيه يا عم هو انت مصدق إنه أبوك بجد؟ واحد راميك من وانت عيل في اللفة وكل اللي بيربطك بيه شوية الفلوس اللي ببيعتها كل أول شهر.. حتى فلوسه مبقتش محتاجها من ساعة ما ورثت جد..

قاطعته علي محتجًا:

- خلاص يا خالد مش شغلانة.. ورق السفر خلص بطلوع الروح وأبويا مستني ابنه يروح يمسك شغله هناك، مش بعد كل دا هطلع عيل وأقوله لا معلى قضى نفسك انت أصلي عايز أفضل في البلد وأصيع بفلوسك وفلوس المرحوم.

- على فكرة أنا قولتك نفتح مشروع مش تصيع بالفلوس.. بس زي ما تحب، هتعمل حاجة النهاردة ولا هتقضي اليوم كله في السرير برضه؟

- هخلص السيجارة وأخش أعمل أي فطار وبعدين هروح أقرا شوية تحت الشمسية اللي هناك دي، وانت ناوي على إيه؟

- زي ما قولتلك هروح أجريلي شوية عالبحر كدا وبعدين هرجع أشوف هعمل إيه باقي اليوم.. يلا هطير أنا بقى، خد موبايلي خليه معاك بدل ما يقع مني يتكسر ولا يجراله حاجة وأنا بجري.

- إشطأ.

أنهى علي تحضير فطوره وجلس في الشاليه ليتناول له بينما يشاهد التلفاز، كانت المرة الأولى له في تلك الرحلة أن يجلس في غرفة المعيشة برغم تواجده من قرابة الأربعة وعشرون ساعة في المكان، لم يلحظ الكثير من التغيير في المكان عن الصورة التي تسكن في خياله منذ طفولته، فلم يكن خالد يعلم أن هذه ليست المرة الأولى التي يزور فيها علي هذا الشاليه بالتحديد، ولم يكن يعلم أيضا أن هذا الشاليه تم اختياره لهم بالأخص عن طريق مكتب التسكين عندما علموا عن طريق البطاقة الشخصية أن هذا الشاب الذي يجلس أمامهم هو حفيد اللواء قاسم الشامي الذي كان من أول نزلاء القرية منذ إنشائها والذي لطالما كان يفضل استئجار هذا الشاليه بالتحديد ليقضي به إجازاته الموسمية، أنهى علي فطوره في أقل من خمسة دقائق ليأخذ روايته ويتوجه إلى الشاطئ قبل أن يأخذ أحد مكانه تحت المظلة ولكنه سرعان ما تذكر أنه لا يوجد أحد بالقرية بأكملها إلا هو وصديقه وعدد من أفراد الأمن الشباب الذي لا يتعدى عددهم العشرين فردا، ولكن يا ترى من الذي كان يجلس هناك؟ هل لأفراد الأمن حرية قضاء وقتهم في أماكن تواجد المستأجرين؟ ام كان هذا خالد في وقت ما البارحة؟ لا.. فإنه لم يلحظ هذا المقعد ولا المظلة من فوqe عندما كان يجلس مع خالد ليلة البارحة، من الذي سوف

يذهب للجلوس على شاطئ البحر في هذا الوقت المتأخر ما بين الواحدة
والسابعة صباحاً؟

لم يأبه علي كثيراً لتلك الفكرة وقرر إشباع فضوله بأنه بالتأكيد كان أحد
أفراد الأمن المجرّوحين في السر.. ولم يأخذ دقائق معدودة من وصوله
إلى مقعده المنتظر حتى انغمس في القراءة والفواصل القصيرة من
التأمل في البحر ما بين الصفحة والأخرى، مضت قرابة الساعة حتى
سمع جرس هاتف خالد المحمول يرن.. مريم، تردد للحظات قبل أن يرد
ولكنه لم يجد أي سبب منطقي يمنعه عن ذلك.

- الو.

- أبوة يا مريم أنا علي.

- ازيك يا علي.. هو خالد مش جنبك؟

- لأ هو راح يجري على البحر شوية وسابلي موبايله.

- اه.. طيب لما يرجع خليه يكلمني بليز.

- اه أكيد.. بس هو مال صوتك فيه حاجة؟

- لأ.. ماله صوتي؟

- لالا ولا حاجة.. خلاص هخليه يكلمك أنا لما يرجع.

- أوكيه يا علي.. أسفة لو أز عجتك.

- لا يا بنتي إيه اللي بتقوليه دا.. أز عجتيني إيه بس.

- خلي بالك عليه بس يا علي والنبي.
- من غير ما تقولي يا مريم دا أخويا.. بس اشمعنى يعني في إيه؟
- لا مفيش بس انت عارف خالد يعني دماغه لاسعة وممكن يعمل أي حاجة.
- اه طبعا انتي هتقوليلي.. بس من الناحية دي متقلقيش، مفيش حاجة تتعمل هنا أصلا.
- طيب كويس.. يلا باي.
- باي.
- عند إنهاء علي مكالمته القصيرة مع مريم وجد خالد يمضي ناحيته ويظهر الإجهاد في ملامحه:
- كنت بتكلم مين من موبايلي؟
- دي مريم.. كانت بتسأل عليك وقالتلي لما تيجي أخليك تكلمها، هو في حاجة ولا إيه؟
- حاجة زي إيه يعني؟
- لا مش عارف بس صوتها مش تمام، زي ما تكون بتعيط أو معيطة قبل ما تتصل.
- لا متشغلش بالك هبقى أكلمها أنا أشوف مالها، انت هتخلص البتاعة اللي في إيدك دي امتى؟

- لسه فاضلي نصها تقريبا، خش شوف حالك انت ولو عوزتني
هتلاقيني قاعد هنا

- ماشي .

مع دقة الواحدة ظهرا كان قد أنهى علي آخر سطور روايته وهو في
حيرة لا يحسد عليها، لم تكن نهاية الرواية واضحة أو مرضية للقراء
الذين لا يفضلون النهايات المبهمة مثال علي، هل كانت البطلة حقيقة أم
مجرد وهم يسكن في خيال البطل؟ لم يوضح الكاتب تلك النقطة بشكل
مباشر.. لا يوجد دليل واحد على أنها حقيقة والعكس صحيح.. فهل يظن
هذا الكاتب اللعين أنه سوف ينتزع قلوب القراء وستصدر رواياته قائمة
الأكثر مبيعا عندما يتلاعب بعقول الناس؟ خرج علي من دوامة تفكيره
بلفظ خارج في حق الكاتب برغم استمتاعه الشديد بكل فصول الرواية
وانتقل من التفكير في بطله الرواية إلى التفكير في مريم ثم انتقل أيضا
من سباب كاتب الرواية لسباب أعز أصدقائه.

فماذا فعل ذاك المعتوه بها لكي يجعلها بتلك الحالة؟ لم يسبق لعلي أن
استشعر هذه الكسرة في نبرة صوت مريم، وليس له أدنى الحق أن
يتدخل فيما لا يعنيه ويسألها عن السبب.. وليس أيضا بالجرأة الكافية
ليسأل خالد في وقت لاحق حتى لا يثير شكوكه حول اهتمامه الزائد بها،
وجه علي نظره للأسفل بانهزام للحظات وما كان يرفع عينه حتى يعود
لموضعه الطبيعي لمح أثار محاولات انتحار علي معصمه، لم يمض
وقتاً طويلاً على آخر محاولة منهم، والغريب في الأمر أنه لم يرد في
أي محاولة منهم الموت حقا، فإنه كان دائما ما يقطع جلده بشكل سطحي
حتى لا يسبب أي نوع من أنواع الأذى لعروقه، لذلك فهو لا يعلم الدافع
الحقيقي الذي كان يملكه عندما يفعل ذلك ولكن هذا الفعل لطالما ما كان

يشعره براحة نفسية لم يذق طعامها منذ طفولته، ربما كان يريد تعذيب نفسه لندمه على شيء ما قد فعله.. أو ربما كان يريد أن يشغل نفسه في الألم الجسدي حتى يخرج من الألم النفسي كما يشاع عند المراهقين في الدول الأجنبية الذين غالبا ما يكون دافعهم الحقيقي هو لفت الانتباه.

قرر علي أن يتمتع بآخر ما تبقى له من وقت على هذا المقعد قبل أن يعود للشاليه ويتقابل مع أكثر شخص يريد تهشيم عظامه في هذا الحين فأخرج هاتفه الجوال وسماعات أذنه وبدأ في استئقاء ما يسمعه من قائمة موسيقته التي ساد عليها الطابع الكئيب في السنوات الأخيرة.. ولكن لفت انتباهه تسجيلا صوتيا لأحد مذكراته التي تم تسجيلها قبل قرابة العام، تردد قليلا عندما تذكر أحداث تلك الفترة ولكنه قرر انتهاء فرصة وجوده في هذا المكان وحده وقرر الاستماع.

"مش عارف في إيه.. حاولت معاها بكل الطرق ومش نافع، عارف إن الحاجة الحلوة مش بتيجي بسهولة بس بدأت أحس إنها مش هتيجي خالص.. مريم مش واخدة بالها مني زي ما يكون اللي بعمله عشان أوصلها في غيري كتير بيعملوه، هو أنا وحش طيب؟ مش كويس كفاية إنها تديني فرصة يمكن؟ طب ما يمكن برضه هي مش واخدة بالها لسه.. أنا بفكر أقول لخالد يساعدي وأخد الريسك بقى وخلص، أصل معنديش حل تاني.. وهو أكيد مش هيسيب كل البنات اللي بتجري وراه وعينه هتزوج على البنات اللي أنا عايزها يعني ولا إيه.."

أغلق علي التسجيل عند نهايته ولمح بطرف عينه تسجيلا آخر بتاريخ اليوم التالي ولكنه قرر أن يؤجل سماعه الي وقت آخر.. ربما لأنه كان يعلم جيدا ما بداخله، نظر إلى ساعته ليحدها الثانية إلا ربع ظهرا، فقرر العودة إلى الشاليه وتجنب الاحتكاك بخالد حتى لا تظهر عليه أي

مشاعر احتقان من الآخر، عند دخوله الشاليه سمع صوت خالد أت من المطبخ فقرر الخلود إلى النوم دون أن يتقابل معه.

أحلام ممنوعة اعتاد علي أن يراها في كل مرة يخلد فيها إلى النوم بعد التفكير في مريم، فالممنوع مرغوب.. وفي العقل الباطن ليس هناك شيء ممنوع.. يرى مريم نصف عارية تجلس فوقه على رمال شاطئ البحر ليلاً، تلامس الأمواج أنامل قدمه، تحتضن كل ذرة من أجسادهم قرينتها من جسد الآخر، تقطع أظافرها المخدرة كل بقعة جلد من ظهره دون أن يشعر.. ويمزق بأسنانه أطراف شفيتها كفهدهد يلتهم آخر غزالة على الأرض أو مصاص دماء طال صيامه لسنوات.

تحولت في أذنه نبرة صوت آخر كلمات مريم إلى نبرة صوت خالد.

- علي.. أنا محتاجالك.. علي.. علي.. انت يا بني اصحى.

- إيه في إيه!!

- في إيه انت.. بقالي ربع ساعة بحاول أصحيك.

- ليه هي الساعة كام؟

- الساعة ٧ ونص.. الدنيا أيلت!

- ماشي يعني بتصحيني ليه برضه في إيه؟

- طلعت أدور عليك مكان ما كنت قاعد عالبحر ملقيتكش وجيت لقيتك نايم هنا.. أنا خارج رايح السينما اللي في مدخل القرية، هتلاقيني سايبلك أكل في التلاجة لو حبيت تاكل.. واصحى بقى مش هتقضي الكام يوم اللي قاعدينهم نوم.

- ماشي ماشي روح انت.

خرج خالد ليتنزّه واستكمل علي نومه متجاهلا كلمات صديقه علي أمل
أن يجد مريم مازالت في انتظاره عندما يعود إلى الحلم.

الثلاثاء ١٢ يوليو ٢٠١٦

- بدأ علي يومه الثالث في الرحلة مبكراً، فإنه وبطبيعة الحال قد استيقظ في الواحدة بعد منتصف الليل، عند استيقاظه تفاعلاً بعدم وجود خالد في الشاليه.. فإن الفيلم الذي ذهب ليراه في السينما لن تطول مدته لستة ساعات، تذكر كلمات خالد عندما أيقظه قبل ساعات فتوجه إلى المطبخ فور انتهائه من غسيل وجهه ليلتقط الوجبة التي تركها له صديقه، عندما دقت الساعة الواحدة والنصف كان قد أنهى وجبته التي لم يقدر حتى على تمييز أطعمتها من الجوع، وجد الجو مناسباً بالخارج ليحضر ما جاء به من حشيش وزجاجات البيرة ويجلس في شرفة الشاليه، كان الجو شديد البرودة كما يفضل، القمر شبه مكتمل ولا صوت يعلو على صوت أمواج البحر، أخرج هاتفه وبدأ في تشغيل الموسيقى التي يفضل سماعها في هذا الوقت والتي تناسبت تماماً مع الجو المحيط، وكأنه مشهد سينمائي صامت تختبئ آلة تصويره في أعين البطل.. تطلب الأمر سيجارتين من الحشيش وثلاث زجاجات من البيرة ليصل علي إلى درجة النشوة التي يفضلها ويستهدفها، درجة ما بين الوعي واللاوعي، يعي ما يدور من حوله ولكنه يشعر بنفس أخرى تحل محل نفسه، نفس لطالما تمنى أن تسكنه للأبد..

تذكر أمر التسجيل الذي قرر تأجيل سماعه في الصباح واتخذ القرار بأنه قد حان الوقت المناسب لسماعه لسبب ما لا يعلمه هو ذاته.

"النهاردة شوفت خالد قاعد مع مريم في كافيتريا الكلية بيهزروا ويضحكوا.. معرفش عرفها امتى بقى ولا ازاى وناوي معاها على إيه، خايف أسأله ويتكلم عنها على إنها واحدة من البنات الشمال بتوعه.. ساعتها أقسم بالله ما هخلي في وشه حتة سليمة، أنا لازم أعمل أي

حاجة.. لازم أدخل في الصورة قبل ما ياخذها مني، لازم أقوله وهما على البر قبل ما رجله تغرز معاها، لازم أفهمه إن دي البنت اللي بحبها ومش عايز حاجة من الدنيا غيرها بقالي سنين.. بس هو هيعملي إيه يعني لو قولتله، ما هي برضه اللي فضلته عني.. أنا غبي، كان لازم أفهم إن في يوم من الأيام لازم هيحصل كدا، ولو مش مع خالد كانت هتبقى مع حد غيره.. هي أكيد كانت حاسة إنني معجب بيها بس مفيش حاجة تجبرها إنها تستنى واحد مريض زيي سنين لحد ما ياخذ خطوة نحيبتها، أنا بس اللي يمكن اتطمنت بزيادة لما لقيت إننا داخلين في سنة رابعة ولسه مشوفتهاش مع ولد، افكرت إنها هتفضل لوحدها على طول فا مفيش خوف إن حد ياخذها مني.. غبي!"

بعد انتهاء التسجيل قام علي بإغلاق هاتفه وسرح للحظات تذكر فيها ما حدث منذ ذلك اليوم حتى تلك اللحظة بالتسلسل، لمعت عيناه استعدادا لتساقط بعض قطرات الدموع التي لم يستشعر وجودها على أطراف جفونه منذ زمن، مرت لحظات حتى فقد السيطرة على مشاعره وانفجر بالبكاء، جلس يبكي بحرارة في البرد الذي بات لا يشعر به بسبب تأثير الكحول في جسده حتى خلع قميصه ليحفف به وجهه ويمحو آثار البكاء من عيناه ثم ألقى به علي الأرض وأنار هاتفه ليقوم بتسجيل الفصل الأخير من تلك القصة.

"١٢ يوليو ٢٠١٦ اتخرجنا.. كل اللي كنت خايف منه حصل، مريم حبت خالد وكلها كام شهر ويتخطبوا.. مش هعرف أعمل حاجة ساعتها غير إنني أباركله وأوصيه عليها.. لكن الحقيقة إنني نفسي أقتله، كان هاين عليا أقطع علاقتي بيه بعد اللي حصل ومعرفش معملتش كدا ليه، لسه لحد النهاردة كل يوم بحلم بيها، عيني مش عارفة تشوف بنت غيرها، كانت آخر حاجة متعشم إنني أطولها من الدنيا، كل ما أشوف

خلقته أحس إنني عايز أشنق نفسي عشان سيبتها لواحد زيه، هي إيه اللي عجبها فيه؟ إيه بجد اللي عجبها في واحد فاشل وسطحي والنسوان بتصرف عليه زي دا؟ عموما أنا خلاص مش قاعدلهم في البلد، مش هستنى أنا لحد ما أشوفهم بيتجوزوا وأسمعه وهو جاي يحكي لي عن قد إيه هو سعيد في حياته ومتجوز واحدة مفيش منها اتنين.. دا مش بعيد يجيلي بعد ليلة الدخلة يحكي لي عمل فيها إيه في السرير عشان يتباهى قدامي برجولته الرخيص.. ما أنا أكثر واحد عارفه وعارف حقيقته
الوسخة"

- مش قولتلك؟

سمع علي تلك الكلمات آتية من خلفه فانتفض ليجد خالد فبادره سائلا:

- قولتلي إيه.. وانت هنا من امتي؟

- أنا واقف هنا ورا الباب دا بقالي أكثر من ١٠ دقائق بسمعك وبشوفك على حقيقتك، عايز تعرف من امتي بظبط؟ من ساعة ما كنت عايز تقتلني.. ليه كدا بس يا علي؟ عملتلك إيه أنا عشان تكرهني كل الكره دا؟

رفع علي صوته قائلا:

- هو إيه اللي ليه كدا يا متخلف انت أكيد مش بتكلم عليك يعني!

- تاني.. هتكذب وتمثل تاني زي ما كدبت عليا امبارح ونيمتني وأنا لأول مرة من يوم ما عرفتك حاسس إنني صاحبك بجد وإنني غالي عندك!؟

- تمام.. وانت إيه بقى اللي مأكدلك إنني كنت بتكلم عنك انت بذات؟

- قصدك إيه؟

- قصدي اللي علي راسه بطحة.

- لا من الناحية دي معاك حق.. أنا فعلا فيا كل العبر، بس ياريت تتفضل بقى وتعرفني بنفسك.. انت إيه بقى يا عم النضيف؟ على الأقل أنا مش بكرهك ولا شايك حاجة جوايا.. ومكانش هيحصل حتى لو انت اللي خدتها مني.. شوفت بقى يا عم علي؟

- خلاص يا خالد أنا آسف، متكبرش الموضوع بقى أنا كنت شارب شوية زيادة بس.. وبعدين انت عارف إني مضغوط ومتدايق شوية اليومين دول عشان موضوع السفر وكدا فا حفاك عليا مترعلش.

- مضغوط ومتدايق.. تمام، مقولتليش ليه؟

- مقولتلكش إيه؟

- مقولتليش ليه إنك بتحب مريم؟

- مش فارقة.. هي بتحبك انت، ربنا يوفقكوا.

- انت بجد كنت فاكر إني هستكترها عليك لو قولتلي؟ فاكر إني كنت هخسرك عشان بنت مهما كانت مين؟

- بقولك إيه انت شكلك عايز تتخانق وأنا بصراحة مش ناقص، أنا داخل أنام.

تركه علي ومضى إلى الداخل فارتفع صوت خالد قائلا:

- اقف هنا يلا كلمني زي ما بكلمك! ولا أقولك.. خش نام.. بس اعمل حسابك إنك هتصحى مش هتلاقيني.

- وماله يا حبيبي زي ما تحب.. مجاتش عليك.

- مجاتش عليا؟ ماشي يا أبو شام.. خليك هنا خمس دقائق لحد ما أخش أخذ حاجتي من جوة وأمشي.

أنهى خالد كلماته وترك الأخير متجها إلى غرفة النوم ليجمع أمتعته ويرحل.

- استغفر الله العظيم.. يا خالد.. انت يابني استنى بس.

قال علي تلك الكلمات ثم ذهب وراء صديقه محاولا تهدئته:

- غور من وشي يا علي.. مش عايز أشوف خلقتك تاني!

- خلاص بقى يا عم أنا آسف.. وأدي راسك أبوسها.. خلاص بقى.. هتحاسب أخوك على كلمتين هبل قالهم وهو مش في وعيه؟

- بيتهيا لك.. انت كنت في وعيك أكثر من أي وقت تاني، أنا اللي آسف.. مكنتش أعرف إنك بتحبها أوي كدا، كنت غبي لما مترجمتش من الأول كتر كلامك عنها وخوفك وقلقك عليها طول الوقت.. بس عارف إيه اللي واجعني أوي؟ إنك مش متضايق عشان هي حبت واحد غيرك، انت متضايق عشان هي حبت خالد مسلم، خالد اللي انت طول عمرك بتعتبره الكلب بتاعك، بتستكتر عليه أي حاجة حلوة ومبتحلاش في عنيك غير الحاجة اللي هو يعوزها.. أنا ماشي يا علي ومش هتشف وشي

تاني، امسح رقمي من عندك وسواء سافرت أو لأ ياريت تنسى إن في
يوم من الأيام كان ليك صاحب اسمه خالد.

الفصل الثاني

يا ليل طول

في تمام التاسعة صباحًا من اليوم الثالث كان قد أتم علي خمسين محاولة للاتصال بخالد بلا فائدة تذكر.. فقد أغلق خالد هاتفه منذ أن ترك علي في الشاليه، مشى قرابة الخمسة كيلومترات على قدميه حتى خرج من القرية ووجد سيارة تعيده إلى الإسكندرية في هذه الساعة المتأخرة من الليل، عندما يؤس علي من محاولاته المستميتة للتواصل مع خالد عن طريق الهاتف جاءت في باله فكرة للحاق بصديقه إلى الإسكندرية ولكنه سرعان ما طرد هذه الفكرة من رأسه عندما أدرك استحالة عودة صداقتهما كما كانت بعد الذي حدث، برغم حبه الشديد لخالد ولكنه كان يعلم جيدا أن كل ما قاله خالد ليلة البارحة كان حقيقة ولذلك تقبل الخسارة في سبيل ألا يستمر في نفاقه وقرر استكمال الثلاثة أيام المتبقية في الرحلة وحيدا ليعيد حساباته ويدفن كل قطرة متبقية من بحر الذكريات الأسود الذي يسكن بداخله في هذا الشاليه قبل أن يرحل، لم تكن فكرة قضاء بضعة أيام وحيدًا في الساحل الشمالي وفي هذا الوقت من العام فكرة غريبة بالنسبة لعلي، فإن هذه كانت خطته من الأساس قبل أن يعرقلها مجيء خالد.. ساعات من الندم ولوم النفس مرت على علي كسيارة محملة بأطنان من الصخر تمر من فوقه لتهشم عظامه بالتصوير البطيء، حاول الخروج من تلك الحالة بالنوم لكن لا فائدة.. استغرق الأمر ثلاث ساعات حتى استطاع أن ينام واستيقظ بعد ساعتين فقط، قرر ممارسة يومه بشكل طبيعي متجاهلا ما حدث واتصل بمركز

الخدمات حتى يرسل له أحد العمال ليأتي طلباته من طعام ومياه شرب وبضعة علب سجائر، مضت عشر دقائق حتى طرق الباب الخلفي للشاليه ليرى وراءه شاب أسمر ذو ملامح نوبية، متوسط القامة يرتدي ملابس بسيطة، يضع يده علي جبينه ليحمي وجهه من أشعة الشمس ويبدو عليه الإجهاد:

- سلام عليكم.

- وعليكم السلام، انت من مركز الخدمات؟

- أيوة يا باشا أو مرني.

- اسم الكريم إيه الأول؟

- عبادة يا باشا.. محسوبك عبادة.

- ماشي يا عبادة بص عايزك تجييلي الطلبات اللي في الورقة دي ومعها خرطوشة سجائر وكام لتر مياه معدنية كدا.

- ماشي يا باشا.. تؤمرني بحاجة تاني؟

- لا لا تسلم.

ثم عاد لينادييه بعد أن تذكر شيئاً آخرًا:

- أو بص يا عبادة استنتي..

- أيوة يا باشا.

- بقولك إيه انت شاالك عيل جدع.. متعرفش حد عنده بيرة هنا؟

- اه يا باشا فيه واحد قرب بوابة القرية على الطريق.

- طب إيه تعرف تدخلنا كام إزازة في إيدك كدا؟ وأنا عنيا ليك متقلتش.

- اه يا باشا سهلة.. اللي واقفين على الباب كلهم حبايبي، تحب أجيبك كام إزازة؟

- لو أربع خمس أزييز كدا تبقى فل.

- تمام يا باشا هروح أنا أجيب الطلبات وأجيبك على طول.. تؤمرني بحاجة تاني؟

- تسلم.

عندما عاد عبادة بالطلبات بعد قرابة النصف ساعة طلب منه علي أن يمر عليه من الحين إلى الآخر على مدار اليومين المتبقين له في الرحلة ليحضر له متطلباته من ممنوعات في السر مقابل إكرامية لا تتخطى بضعة ورقات من فئة الخمسة، وضع كل محتويات الأكياس في الثلاثة باستثناء "خرطوشة" السجائر وإحدى زجاجات المياه وقرينتها من زجاجات البيرة، ثلاث ساعات أخرى مرت على علي وهو ممدد جسده على أريكة بمنصف غرفة المعيشة ولا يفعل شيئاً سوى التدخين واحتساء البيرة مع مشاهدة أحد أكثر الأفلام التي تذكره بطفولته والذي وجده يعرض علي التلفاز بالصدفة.. فيلم "غزل البنات"، بعد انتهاء الفيلم ومع دقة الساعة السادسة مساء قرر التوجه إلى غرفة النوم وإخراج كمانه من صندوقه الخشبي في محاولة أخرى باهتة للخروج من دوامة تفكيره فيما حدث ولو بشكل مؤقت، استغرق دقائق من التفكير في مقطوعة يعزفها حتى خطرت في باله أغنية المطربة "ليلى

مراد" التي كانت تعرض في الفيلم؛ أغنية "ماليش أمل"، لم تكن هذه المرة الأولى له أن يعزف تلك المقطوعة.. فإنه يتقنها جيدا منذ طفولته حيث كانت هذه المقطوعة من اوائل المقطوعات التي تعلمها ودرسها في معهد الموسيقى عندما كان طفلا، وكانت تلك الأغنية هي السبب الأهم في تشكيل فيلم غزل البنات لجزء كبير من طفولته، عندما انتهى من العزف انفرجت شفتاه ولمعت عيناه لمعة حنين لأحب أيام حياته الي قلبه، فقد تذكر عندما اصطحبه جده إلى المعهد العالي للموسيقى لأول مرة وهو في السابعة من عمره، تذكر انبهاره بهذه البناية القديمة التي تعلو أصوات الموسيقى من كل أركانها ويسكن أنحاءها جهابزة الموسيقى وروائح الآتيم العتيقة التي ربما تكبره عمرا، لم يكن لديه الاختيار في انتقاء الآلة التي يود أن يعزفها لإصرار قاسم الشامي أن يكمل حفيده ما بدأه في مشواره مع آلة الكمان، ولكنه قد أدرك مع مرور السنوات أنها الآلة الوحيدة التي تتناسب مع شخصيته بشكل تام، أو ربما هي التي شكلت شخصيته لذلك اصبح من الطبيعي أن يراها بتلك النظرة الآن.. يقول كبار الموسيقيون أن من المستحب تعلم آلة الكمان في سن صغيرة حتي تتشكل عضلات الجزء العلوي من الجسد على وقتها.. فهل ربما شكلت آلة الكمان في علي الشامي شيئا أعمق من ذلك؟

- الو .

- أيوة يا مريم.

- أيوة يا علي، ازيك عامل إيه؟

- تمام الحمد لله.. بصي يا مريم أنا بصراحة عايز منك طلب وحاولي متستفسريش عنه كثير، ممكن؟

- مش فاهمة.

- بصي أنا عارف إن مكالمتي ليكي بشكل عام دلوقتي حاجة غريبة بس والله لولا إني مش عارف أوصل لخالد مكنتش عملت كدا.

- لأ مش غريبة ولا حاجة يا علي احنا صحاب.. وبعدين أنا مش فاهمة برضه، هو خالد مش عندك؟

- لأ.. خالد لم كل حاجته ورجع إسكندرية الفجر.

- غريبة يعني مكلمنيش.. طب هو مشي ليه برضه انتو اتخانقتوا؟ مامته حصلها حاجة؟

- اطمني والدته بخير الحمد لله.. أنا بس عايزك تبليغيه إنه غالي عندي وإني والله العظيم ما كنت واعي لأي كلمة خرجت من لساني امبارح، قوليله ميز علش مني وإني مش شايله أي حاجة جوايا.

- اه يبقى اتخانقتوا.. فهمني طيب يا علي إيه اللي حصل؟

- مريم ممكن تقويليه الكلمتين دول وبس؟

- ماشي بس هو قافل موبايله من امبارح وأنا كمان مش عارفة أوصله، كنت فاكراه نايم متأخر وقافل الموبايل أو موبايله فاصل شحن.. انت متأكد إنه كويس طيب؟

- اه متقلقيش عليه.. المهم لما توصليله قوليله الكلمتين دول وخلص.

- طيب ماشي.

- يلا سلام.

- باي.

مع حلول منتصف الليل كان قد استنفذ علي كل قواه في محاولات الخروج من تلك الحالة ولكن بلا فائدة.. لم يجد للخروج منها حلا سوى الغياب عن الوعي بشكل متعمد خوفا من أن يفقد السيارة علي نفسه ويعود لمحاولات الانتحار مرة أخرى، أخرج ما تبقى من حشيش من حقيبته بالإضافة إلى كل زجاجات البيرة المتبقية في الثلاجة وتوجه إلى ذات المقعد اللعين.. المقعد الذي شهد ليلة البارحة نهاية علاقته بأعز أصدقائه.. ربما أراد أن تسيطر عليه الحالة ذاتها التي سيطرت عليه ليلة البارحة من كره وحقد لخالد حتى يتوقف عن الشعور بالندم ولو بشكل مؤقت.. علي الأقل حتى تستطيع مريم الوصول إلى خالد، لم تأخذ الموسيقى محلا في المشهد تلك المرة ولم يكن يستهدف أي درجة من درجات النشوة، كان هدفه الوحيد يقتصر فقط على فقدان الوعي لما يحدث من حوله بقدر الإمكان.

مليش أمل في الدنيا دي

غير إني أشوفك متهنني

حتى إن لقيت إن بعدك راح يسعدك ابعد عني.

أما أنا مهما جرى

حفضل أصون عهد الهوى

وإن غبت يوم ولا سنة حفضل أنا برضه أنا

في تمام الواحدة والنصف بعد منتصف الليل التقطت آذان علي صوت الأغنية التي كانت تعزفها أصابعه منذ ساعات، لم يشعر بنفسه عندما ترك مقعده وذهب ليبحث عن مصدر الصوت، ذهب ليلقي نظرة على الشاليهات المجاورة ولكنه لاحظ أن الصوت يبتعد فعاد مرة أخرى إلى مكانه ليدرك بعد لحظات أن الصوت أت من شاطئ البحر.. بدأ يمضي في اتجاه الشاطئ مترددا؛ فإنه لم ير أيا من جنس البشر متوجها إلى الشاطئ منذ مجيئه.. أمتار قليلة قطعها أقدامه وكأنها أميال، كلما اقترب كلما رنت في آذانه كلمات ليلي مراد التي كانت للمرة الأولى تبدو مخيفة وحادة على مسامعه، مع نهاية الأغنية وصل للسور الذي يفصل ما بين حديقة الشاليه وشاطئ البحر ليرى آخر شيء يمكن أن يتوقعه، لم يكن هناك بعبعا ولا شيطانا بقرون حادة في انتظاره.. بل كانت ليلي، ظلا لامرأة يوحى جسدها بأنها في الثلاثينيات، شعرها طويل.. يكاد يصل إلى خصرها، تعطيه ظهرها وتنظر إلى البحر بتمعن وتركيز شديد وكأنها تحاوره في إحدى القضايا السياسية، حافية القدمين ترتدي معطفا طويلا وشالا يغطي رقبتها وتمسك في يدها شيئا أشبه بجهاز راديو صغير.. بعد لحظات من التحديق وجد علي نفسه يتوجه إليها وهو لا يزال فاقد السيطرة على تصرفاته.

- انتي مين؟

أدارت نظرها له ليرى علي أجمل وجه يمكن لأي انسان أن يراه، بشرة بيضاء لدرجة أظهرت ملامحها بالتفصيل في ظلمة الليل.. وكان القمر

قد وكلها لتحل محله في إنارة المشهد، عيون زرقاء وصافية كميّاه بحر لم يعكّر صفوها البشر منذ عقود، شعر أسدل الستار عن لونه الأصفر وبعض بقع النمّش التي سقطت من فرشة الخلاق عندما كان يرسمها، كانت جميلة لدرجة جعلته يشك للحظة أنها النداهة التي يحكى عنها في الصعيد.. ولكن ما الذي يأتي بالنداهة إلى الساحل الشمالي؟

- اقلع الجزمة اللي في رجلك.

- نعم؟

- زي ما سمعت.. اقلع الجزمة اللي في رجلك.

- حاضر .

خلع علي حدائه ثم سأل:

- بس ليه؟

- آداب البحر.. مسمعتش عن آداب البحر قبل كدا؟

- لا مسمعتش.

- البحر ورملته شيء مقدس، زي المسجد كدا.. ينفع تخش المسجد وانت لايس جزمة؟

- إيه؟.. اه.. لأ طبعا

عادت بنظرها إلى البحر مرة أخرى وهي تقول:

- ليلى.

صمت علي للحظات تعجب فيها من تشابه الأسماء بينها وبين بطللة
الرواية التي كان يقرأها عند مجيئه ثم مد يده بالسلام معرفا بنفسه:

- علي

- عارفة.

- عارفة منين؟

- أصلي سمعت خناقك انت وصاحبك امبارح.

- ياه.. هو احنا كنا مفضوحين للدرجادي؟

- لا مش مفضوحين ولا حاجة.. أنا بس اللي كنت قريبة فا سمعت.

- ممم.. هو انتي هنا من امتي؟ أصل أنا بصراحة من ساعة ما جيت
ماشوفتش حد في القرية كلها غير بتوع الأمن.

- أنا هنا من قبل ما انت وصاحبك تيجوا بيومين.

- شكلك كنتي مركزة معنا أوي.

- بصراحة اه.. القرية فاضية أوي اليومين دول وكنت محتاجة جيران
أتونس بيهم.

- انتي بقي اللي كنتي حاطة الكرسي والشمسية دول هنا؟

ابتسمت ليلي وهزت رأسها بالإيجاب فضحك علي قائلاً:

- تصدقي أنا قعدت شوية حلوين أفكر يا ترى مين الرايق اللي بييجي
لبيل متأخر كدا يقعد هنا.. لدرجة إنني فكرت مرة أستناه وأعمله كمين.

- أديك عرفت أهو يا سيدي مش محتاج تعمل كمين ولا حاجة.. أنا باجي هنا كل يوم الساعة واحدة بعد نص الليل وبمشي مع مطلع الفجر.
- ممكن أسألك سؤال؟ معلش أنا عارف إن أسألتني كترت.
- اسأل.

- انتي بتيجي هنا تعملي إيه؟

- شايف البحر دا؟

- اه

- البحر دا أغلى عندي من أي حاجة.. من وأنا صغيرة وهو بيسمعني ويحتوي مشاكلي أكثر من أي حد، أكثر من أهلي وأقرب الناس ليا، لما كل الدنيا بعدت عني فتحطي دراعاته وقالي تعالي احكي لي مالك، تفكر ينفع بعد كل دا مودوش وأسأل عليه من الوقت للتاني؟

- انتي غريبة أوي.

- لا مش غريبة ولا حاجة.. انت بس اللي لسه صغير علي الكلام دا، أنا بقى اللي عايزة أسألك سؤال يا شاطر ممكن؟

امتعض وجه علي من أسلوبها في الحديث ثم أجاب:

- اه طبعا.. اتفضلي.

- سيبته يمشي ليه؟

- هو مين دا؟

- صاحبك .

- دي حكاية طويلة أوي.. قولتيلي بتقعدي هنا للفجر؟

ابتسمت ليلى ثم هزت رأسها بالإيجاب، دعاها علي للجلوس على الرمال بدلا من الوقوف وقبلت دعوته، مد يده لها ليساعدها في الجلوس ثم مكث بجانبها وقام بإشعال سيجارة وبدأ في السرد.

- أنا وخالد نعرف بعض من ٥ سنين، من أيام ثانوية عامة.. كنا بناخد دروس مع بعض ومعانا شلة بنات كبيرة، عارفة أغنية كل البنات بتحبك كل البنات حلوين؟ أهو خالد كان كدا.. كان أكثر نوع من الشباب ممكن أكره إنه يكون صاحبي أو إني حتى أعرفه معرفة سطحية، النوع الملقق دا اللي أربعة وعشرين ساعة تلاقيه واقف بيضحك ويتمايش مع البنات المراهقين ودباديب بقى وكدا، وبرغم كل دا كنت بتعامل معاه عادي لكن في أضييق الحدود.. لحد ما في يوم جالي وحاول يتكلم معايا ويفهم أنا عازل نفسي عنهم وبتجنبهم ليه، حاولت أشرحله بأكثر طريقة محترمة قدرت عليها إني مليش في الجو دا.. ساعتها سكت كدا ومشى زي ما أكون أخرجته أو ضايقته، من الحصة اللي بعدها على طول بدأ التعامل بيننا يزيد وبقى يطلب مني أصوله ورق مع إنه لو شاور بصباغه بس هيلقي ألف واحدة تصور هوله.. ومرة تانية يقترح عليا إننا نروح نقعد على القهوة سوا ويفضل يحكي لي عن المعاناة اللي في حياته والمسئوليات اللي متشالة على كتافه.. زي ما يكون عايز يوصلني رسالة إنه مش كدا، عايز يغير لي الفكرة اللي أنا واخدها عنه.. ومرة في مرة بقينا صحاب وبدأت بالفعل أغير جزء كبير من فكرتي عنه لما عرفت إنه فعلا حياته مش سهلة وإنه مش بالتفاهة والسطحية اللي كنت متخيلها، مكانش صاحب اللي مفيش منه اتنين لكن كان فيه ميزة واحدة

معتقدش إني كنت هلاقيها في أي حد تاني.. إنه قبلني زي ما أنا في أكثر وقت كنت مرفوض فيه.. واللي اكتشفته مع الوقت إنها كانت ميزة متبادلة، عدت فترة ودخلنا نفس الكلية سوا وفي أول سنة لينا في الكلية شوفت مريم، بحكم إني مكانش ليا خبرات في التعامل مع الناس بشكل عام والبنات بشكل خاص فا مكننش عارف أعمل إيه عشان ألفت نظرها، كنت أقدر وقتها أطلب منه المساعدة لكن خوفت يعجبها هو وتشوفني جبان وكل حاجة تبوظ، فضلت على الحال دا ٣ سنين.. كل ما أخذ خطوة ناحيتها أرجع ١٠ خطوات لورا.. لحد ما في سنة رابعة حصل اللي كنت خايف منه، فجأة لقيتهم مع بعض في الكلية وفي نفس اليوم بليل جالي يحكي لي عنها وقاللي قد إيه هي مختلفة وتصلح أن يكون في بينه وبينها حاجة بجد، اللي اكتشفته امبارح إني من ساعتها بدأت من جوايا أكرهه وأحقد عليه من غير ما احس، أنا عارف إنه ملوش ذنب وإنه بيحبها بجد.. أكيد مش ذنبه إنه أشجع مني وقدر ياخذ خطوة ناحيتها في وقت أقصر، وبعد اللي حصل امبارح والكلام اللي قاله بقيت متأكد إنه لو كان يعرف اللي جوايا من ناحيتها مكانش فكر يبجي جنبها.. وده اللي تاغبني.

- محاولتش توصله؟

- أكيد حاولت.. من امبارح بكلمه وموبايله مقفول.. لدرجة إني كلمت مريم نفسها عشان توصله اعتذارى من غير ما أفهمها أي حاجة.

- طب مفكرتش ترجع إسكندرية تشوفه؟

- ملهاش لازمة، كدا كدا مش هينفع نكون اصحاب تاني.. ولا هو هيقبل يكون مع واحد حاسس طول الوقت إنه عينه على حبيبته اللي قريب

ممكن تبقى مراته ولا أنا هقبل إني أنا فقه تاني وأمثل الروح الرياضية بعد ما عرفت حقيقتي.. أنا بس كنت عايز أخلص ذمتي من الموضوع وأعتذرله وبعدها كل واحد فينا يشوف دنيته.

نظرت ليلي في ساعتها لتجدها الثالثة بعد منتصف الليل فقالت:

- أنا لازم أمشي.

- زهقتي مني؟

- لأ بالعكس.. هو بس الفجر قرب، وانت عارف بقي.

قامت ليلي من مكانها استعدادا للرحيل:

- طب استني بس.. أنا لسه معرفش عنك حاجة.

- زي ما قولتلك.. هتلاقيني هنا كل يوم الساعة واحدة.

قالت تلك العبارة مع ابتسامة اخيرة وهي تنظر في عينيه ثم رحلت وعاد الأخير إلى الشاليه متجاهلا التفكير في ما حدث حتي لا يتلف إحساسه غير المبرر بالسعادة الغامرة التي لم يتذوق طعمها منذ زمن.

الأربعاء ١٣ يوليو ٢٠١٦

استيقظ علي في تمام الثانية عشر ظهرا من يومه الرابع وهو يشعر بالخمول والإجهاد الشديد، على غير عادته نام لقرابة التسع ساعات دون أن يشعر بعد ليلة كانت بمثابة حلم لم ير في جماله من قبل، أخرج هاتفه ليسجل ما حدث ليلة البارحة في فصل جديد من مذكراته.

"١٣ يوليو ٢٠١٦ امبارح كنت قاعد بشرب على البحر بليل وقابلت واحدة حلوة أوي.. حلوة بشكل غريب، وهي غريبة شوية بصراحة.. خلنتي من غير ما أحس أحكيها عن خالد وتاريخ معرفتي بيه من يوم ما عرفنا بعض، وحكيها كمان عن مريم وقعدنا نتكلم لحد الفجر، اسمها ليلي وبتقول إنها بتبقى موجودة على البحر كل يوم في نفس الميعاد دا وبتمشي مع مطلع الفجر.. مش عارف إيه الجو الغريب دا بس حاسس إنني عايز أشوفها تاني وأحكيها أكثر عن نفسي وعن حياتي.. أول مرة أحس الإحساس دا من ناحية أي حد، مظنش حتى إن سر انجذابي ليها هو شكلها بس.. فيها حاجات كتير مفكرش إنني شوفتها في أي بني أدمة قبل كدا، لدرجة إنها خلنتي أنسى أسألها الأسئلة البديهية بين أي اتنين بيتعرفوا على بعض في موقف زي دا.. هروح أستناها تاني النهاردة في نفس الميعاد والمكان، ويارب تصدق وتيجي بقى"

بعدا انتهى من التسجيل أدرك حاجته لجرعة مكثفة من الكافيين حتى لا يعاود النوم مرة أخرى فتوجه إلى المطبخ لتحضير فنجان من القهوة، سرحت عيناه للحظات في منظر القهوة وهي تغلي وتذكر واحدة من آخر المحادثات التي دارت بين والده وجده عندما كان صغيرا بينما كان يختبئ خلف الحائط.

فلاش باك

- شوف يابني انت سايبلي الولا من ساعة ما أمه ماتت وعلى طول في شغلك ولا بتسأل فيه ولا بتصرف عليه مليم وقولت ماشي أهو حفيدي وفي يوم من الأيام هيكبر ويبقى سندي في الدنيا.. بس متجيش بقى دلوقتي بعد ما أنا اللي ربيته وبقى من صلبى تقولي أنا مسافر وعائزه معايا.. عايز تسافر تعمل فلوس وماله يا حبيب أبوك سافر بس علي هيفضل معايا.. وفي الآخر انت أبوه وليك الحق تشوفه وقت ما انت عايز لكن هنا في مصر مش في حنة تانية.

- يا حج اسمعني بس.. أنا ما أنكرتش والله أي حاجة من اللي انت عملتها للواد، بس في الآخر علي ابني ومش هقدر أستغنى عنه، سيبه بس يسافر معايا وأنا وعد مني هجييه يزورك بنفسى كل أجازة.

- علي مش هيتتبع من جنبي يا محمود لو عملت إيه.. جرا إيه يابني.. انت فاكِر الواد لعبة هتاخده وقت ما تحب وتسببه وقت ما تحب؟

- يا حج.. يا حج انت منفسكش الواد يتعلم تعليم نضيف ويتربى وسط ناس متحضرة ويرجعلك بعد كام سنة كدا وهو معاه شهادة محترمة وتتشرف بيه قدام الناس؟

- شهادة محترمة.. قولي يا محمود هو ابنك في سنة كام؟

- لا يا حج مش فاهم السؤال بصراحة.

- رد عليا بس من غير مناودة.. تعرف ابنك في سنة كام؟

- لا يا حج معرفش.

- طب بلاش في سنة كام.. تعرف ابنك عنده كام سنة؟ أراهنك إنك برضه متعرفش.. شوف يا محمود يابني، ابنك هنا بيتعلم أحسن تعليم وبياكل أحسن أكل وبيشرب أحسن شرب وغصب عن أي حد هيكبر ويبقى أحسن واحد في الدنيا وهيبقى بار بأبوه وابنه اللي هيخلفه إن شاء الله، انت بس سيبنا في حالنا واتكل علي الله شوف حالك.

- ماشي يا حج اللي تشوفه.. بس ليا عندك طلب.

- اتفضل.

- مصاريفه أنا اللي هبعتهالك أول كل شهر.. بعد إذناك يا حج دا برضه ابني وليا فيه وإن شاء الله ربنا هيفتحها عليا هناك والحال هيتعدل.

- ماشي ياخويا متتحمقش أوي كدا.. ولو الحال متعدلش أنا أشيله في عينيا، متحملش هم انت بس واتوكل علي الله.

- ماشي يا حج.. خلي بالك عليه.

استفاق علي من غفاته على منظر فوران القهوة فحاول إنقاذ الموقف سريعا بأن يبعد "الكنكة" عن النار ويسكب المتبقي من القهوة في الفجان ولكن كلفه هذا حرق في يده اليمني من سخونة مقبض الكنكة، عندما انتهى من وضع بضع مكعبات الثلج علي مكان الحرق طرق الباب الخلفي للشاليه، ذهب ليفتح الباب وسرعان ما تفاجأ بعبادة في هيئة مغايرة تماما للهيئة التي ظهر بها البارحة، كان وعلى غير المتوقع

يبدو أنيقا ببساطة حيث كان يرتدي قميصا يبدو وكأنه قد قضى ليلة كاملة في كيه وسروالا من خامة "الجينز" وحذاء أسودا قد تم تلميعه بحرفية، شعره مهذب وتفوح منه رائحة عطر تملأ المكان.

- صباح الفل يا باشا.

- صباح النور يا عبادة.. كويس إنك منستنيش.

- وأنا أقدر يا باشا؟

- طب تعالى بس معلش استناني جوة لحد ما أكتيلك الطلبات اللي عايزها في ورقة.

- ميجراش حاجة يعني يا باشا خد راحتك وأنا مستني هنا.

- يا عم خش بس بلاش هبل.

- ماشي يا باشا.. يا ساتر.

- لا مفيش حد غيري هنا متقلقش.

- مال إيدك يا باشا ألف سلامة.

- لا مفيش دا حرق صغير كدا.

- ألف سلامة يا باشا.

- الله يسلمك.. أنا عملتلي قهوة، أعملك حاجة تشربها معايا؟

- العفو يا باشا يعني العين متعلاش عن الحاجب.

- عين إيه بس يابني وحاجب إيه.. قول عايز تشرب إيه؟

- ولا حاجة يا باشا تسلم.

- ماشي يا سيدي.. أومال إيه بس الشياكة دي صحيح.

- ربنا يكرمك يا باشا كلك ذوق.. أنا أصلي نازل أجازة خطف كدا لأهلي في البلد وراجع على بعد بكرة على طول إن شاء الله فا قولت أعدي أشوف طلبات سيادتك لالنهارة وبكرة قبل ما أمشي.

- انت شغال هنا أصلا ولا جيشك اللي جابك هنا؟

- لا يا باشا أنا شغال هنا من زمن.. من وأنا عيل صغير، عارف يا باشا؟ الشاليه دا زمان كان بيتأجر مخصوص لقبطان كبير أوي، كان راجل سكرة كدا ميتخيرش عن سعادتك.. أنا حضرته وهو كبير لكن أبويا الحج بقى كان شغال هنا من قبلي وحضره أيام شبابه، كان دايمًا يقولي الراجل دا على قد ما هو مقتدر ومعاه فلوس يأجر بدل الفيلا عشرة لكن مكانش يحلاله أبدا السكن غير في الشاليه دا.. أنا حتى مش ناسي اسمه.. كان اسمه قاسم بيه الشامى، الله يرحمه بقى سمعت إنه اتوفى من كام سنة.. سعادتك أول زبون تسكن هنا من بعده.

- الله يرحمه.. وانت إيه اللي فكرك بالحكاية دي دلوقتي؟

- أصلي لمحت برة عربية تشبه عربيته بظبط وأنا داخل لسعادتك.

- ماشي يا عم عبادة.. دي ورقة فيها كل الطلبات اللي محتاجها ومعلش لو مفهائش تعب هاتلي معاهم كام إزارة بييرة.

- لا يا باشا تعبك راحة.. بس لا مواخذة يعني يا باشا أنا متشرفتش باسم سعادتك.

- اسمي علي يا سيدي.. علي الشامي.

مع دقة الساعة مساء كانت قد وصلت مريم بسيارتها الفخمة إلى منزل خالد البسيط، لم تقو على تحمل مشاعر القلق والخوف أكثر من ذلك حيث استمر خالد في غلقه لهاتفه لليوم الثاني على التوالي، لم تهبأ كثيراً للحى الشعبى الذى ينتمى له ولا للبناية المتهاككة التى يسكن فيها ولكن كان السبب الحقيقى وراء تردددها لأخذ تلك الخطوة وزيارته فى منزله منذ البارحة هى المضايقات التى قد تتعرض لها فى هذا الحى، طال انتظارها لبضعة دقائق عندما طرقت جرس الباب للمرة الأولى فعادت المحاولة لعدة مرات أخرى حتى فتح لها الباب وهو لا يبدو فى أفضل أحواله.

- انت فىن يا خالد؟ بقالك يومين قافل موبايلك ومبتردش على الرسايل اللى ببعتهالك.. كان لازم يعنى أجيلك البيت عشان أعرف أوصلك؟

- مفيش كنت مخنوق شوية.. خشى.

- لا مش هينفع.. غير هدومك وأنا هستناك تحت.

- يا بنتى خشى متخافيش أمى جوة.

اطمأنت مريم أنه ليس وحده بالمنزل فدخلت:

- ماشى أدينى دخلت.. مالك بقى فىك إيه؟

- قولتلك مفيش يا مريم.. انتى عرفتى منين إنى فى إسكندرية؟

- ما هو علي كلمني لما معرفش يوصلك ووالي إنك سيبتته ورجعت.
- بنقولي علي كلمك!؟
- أيوة كلمني عادي يعني.. وطلب مني كمان لما أوصلك أقولك إنك غالي عنده وإنه مقصدش حاجة من اللي قالهالك، هو إيه اللي حصل؟
- وهو مقالكيش اللي حصل؟
- لأ مقالكيش حاجة.. هو اتصل بيا وكان صوته متضايق كدا ولقيته بيسألني عليك وطلب مني لما أوصلك أقولك الكلمتين دول وبس.
- طب كويس.. أهو النبيه طلع بجح كمان.. عاملي فيها الصاحب الوفي وبيتصل بيكي انتي بذات عشان توصيلي الكلمتين الخايبين دول.
- فيه إيه يا خالد أنا مش فاهمة حاجة!
- ما تبطلي استهبال بقى انتي كمان.
- استهبال؟ خالد أنا مش بستهبل أوكيه، ممكن تبطل انت بقى الطريقة دي وتفهمني في إيه؟
- طريقة إيه! انتي بجد مش عارفة إن علي بيحبك؟
- علي بيحبني؟ إيه الكلام الأهل دا!
- دا مش كلام أهل يا مريم.. البيه بيحلم بيكي كل يوم ومستكترك عليا.. قوليلي إنك مكنتيش تعرفي، اكدي عليا وقوليلي إنك مكنتيش تعرفي وأنا هصدقك.

بدأ خالد في البكاء فقام بإبعاد وجهه عن مريم حتى لا تلاحظ دموعه ولكنها لاحظتها وقامت بوضع يدها على كتفه قائلة:

- خالد أنا والله العظيم مكنتش أعرف.. ممكن متعيطش بليز عشان خاطري متعيطش.. الموضوع مش مستاهل كل دا، وعلى فكرة كمان علي مرضيش يقولي أي حاجة من دي لما كلمني ولا عمره لمجلي بأي حاجة عشان ميخسر كاش.. كل اللي حصل إنه لما معرفش يوصلك ملقاش حل غير إنه يكلمني ويطلب مني إني أوصلك الكلمتين دول بس، أنا متأكدة إنك غالي عنده زي ما هو غالي عندك بالظبط.

- امشي دلوقتي يا مريم ونتكلم بعدين.

- مش همشي يا خالد طول ما أنا شايفاك كدا.

- يا مريم امشي بقولك!

- ماشي يا خالد انت حر خليك كدا، أنا ماشية.. سلام.

ذهبت مريم بعد أن أغلقت باب المنزل بعنف لم تعتد عليه وتركت خالد وحيدا مع قبيلة مكتملة العدد من الأوهام والخيالات التي تمتلكه وتسيطر على عقله شيئا فشيئا.

مع حلول منتصف الليل كان قد اقترب الموعد المنتظر لعلي مع ليلي، لم يتوقف عن التفكير بها منذ أن رحل عبادة، لا يعلم السر الحقيقي وراء انجذابه لها ويدرك جيدا مدى غرابة الموقف وأنها شخصية لن تدوم في حياته طويلا ولكن في الحقيقة هذا لا يزعجه، كان فقط لديه بعض

الأسئلة التي يود أن يعرف إجاباتها، مضت ساعات من التفكير في كيفية استغلال الساعتين الذين سوف يقضيها معها في أن يعلم عنها المزيد قبل أن تنظر تلك النظرة السخيفة إلى ساعتها وترحل مرة أخرى.. كانت تبدو ليلة البارحة كنهاية مبهمة من النهايات التي لا يحبها في الروايات، وكان يبدو موعده معها الليلة كموعده له مع أحد كتاب النهايات المبهمة ليعرف منه الحقيقة.. احتاجت ليلي لساعة ونصف فقط حتى تجعله ينتظر موعدها في اليوم التالي على نار، حيث إنه ذهب ليلقي بنظره على شاطئ البحر قبل الميعاد المحدد بنصف ساعة على أمل أن يجدها ولكن دون فائدة، مضى النصف ساعة التي تسبق الموعد وهو لا يفعل شيئاً سوى النظر في ساعته مراقبا حركة العقارب.. كم هو غريب الأمر أن تتمنى مرور الوقت بسرعة لتقابل امرأة لا تعلم عنها سوى اسمها في مكان من الممكن ألا تستمر فيه ليومين إضافيين في مدينة تستعد لتركها إلى الأبد عن قريب، عندما دقت الواحدة بعد منتصف الليل وحان الوقت أخيراً بدأ يتوجه إلى شاطئ البحر ولكن هذه المرة بخطى ثابتة وربما سريعة بعض الشيء، عندما وصل للسور وجدها جالسة على الرمال وتنظر للبحر بنفس الشغف والحب التي كانت تنظر بهم ليلة البارحة، كانت ترتدي فستاناً صيفياً يظهر جسدها الذي لا يقل جمالا عن ملامحها، خلع حذاءه واقترب منها قليلاً ليتفاجأ بها تنطق أولى كلماتها دون أن تلتفت إليه:

-في معادك بالظبط.

-عرفتي منين إني جيت!

- العصفورة قالتلي.

- العصفورة قالتلك اه.. شكلك ناوية تبدأي الليلة صح.

نظرت في عيناه للحظة ثم استكملت حديثها قائلة:

- وقالتي كمان إنك جاي وجواك أسئلة كتير ملحقنتش تسألها امبارح.

- العصفورة؟

- لا، عينيك.

- طيب كويس وفرتي عليا نص السكة.. بصي هو بصراحة مفيش أسئلة بعينها بس أنا حاسس إنني محتاج أعرف شوية حاجات عنك عشان أطمئن نفسي إنني لسه طبيعي ومتجننتش ولا ببجيلي تهيؤات مش أكثر.

- أنا يا سيدي من إسكندرية.. عندي ٣٤ سنة، كنت بشتغل مذيعة راديو لكن سببت الشغل عشان أهلي صعايدة مقتنعوش بالموضوع وقتها وتقريبا اتبروا مني بسببه، مش متجوزة ومتجوزتش قبل كدا.. يعني تقدر تقول بالبلدي كدا عانس، بقضي شهور الصيف هنا وباقي السنة عندي حضانة أطفال بديرها، يتهيألي دي كل حاجة كنت محتاج تعرفها.

- ياه.. جميل أوي اللي انتي بتعمله دا.

- اللي هو إيه بالطبط؟

- إنك فاتحة حضانة أطفال.. يعني يتهيألي أنا لو كنت بصطبح بوش زي وشك دا كل يوم وأنا صغير كانت الحياة هتختلف.

- انت مدرك إن اللي بتعاكسها دي واحدة ست قد أمك صح؟

- لا مش للدرجادي، أنا عندي ٢٢ سنة.

- طيب يا أبو ٢٢ سنة، قولي بقى.. مال إيدك؟

- لا مفيش اتلست بس الصبح وأنا بعمل قهوة.

- ماشي يا عم قهوة وبتاع.. بس أنا مش قصدي على دي.

- أو مال قصدك علي إيه؟

نظرت ليلي إلى آثار محاولات الانتحار التي علي معصمه فأجاب علي:

- اه.. فهمت.

- طب إيه ناوي تحكي ولا مش حابب؟

سرح علي في عينيها للحظات مقررا فيهم أن يكشف لها عن أهم ما يسكن بداخل صندوقه الأسود.

- أنا قتلت جدي.

ابتسمت ليلي ابتسامة تحمل إشباعا كبيرا لغرورها، فقد شعرت من اللحظة الأولى أن هذا الشاب الذي يمكث بجانبها وراءه قصة مثيرة للاهتمام.

- احكي لي من الأول خالص.

- أمي ماتت وأنا عندي سنتين.. أبويا خدني يربيني بس كان بيسيبيني أغلب الوقت عند جدي عشان ظروف شغله، جدي وقتها كان قبطان متقاعد وعنده فلوس وأملاك كتير لكن برغم كدا أبويا مكانش بيقبل مساعداته غير في أضيق الحدود، كان راجل طيب.. مقدرش أقولك غير كدا، كنت بحبه جدا وهو كان بيحبني يمكن أكثر من ابنه.. أعز من الولد

ولد الولد بقى.. اهتم بيا وصرف عليا دم قلبه عشان يوديني أحسن مدارس ويهيألي بيئة نضيقة أتربى وأعيش فيها، يمكن كان عايز يعوضني عن موت أمي أو عن انشغال أبويا، أو يمكن كان عايزني أكبر وأشيل اسمه وأبقى سنده وضهره في الدنيا زي ما كان بيقول.. كان حاطط في دماغه دايمًا إني لازم أطلع بني آدم مثقف ومحترم أهم من أي حاجة تانية، علمني أحترم وأحب الفن والقراءة والمزيكا برغم إنه كان راجل شديد من بتوع زمان، علمني كمان الصلاة والصوم وكان بيحفظني قرآن.. تصدقي؟ أنا جيت معاه هنا أكثر من مرة وأنا صغير وكنا بننزل البحر ونضحك ونتبسط هنا في نفس الحتة اللي احنا قاعدين فيها دي.. لما كملت ٩ سنين أبويا سافر يشتغل برة عشان يحسن دخله ويعمل فلوس وأنا كملت حياتي عند جدي، ومن هنا بدأت كل حاجة حلوة تتغير واحدة واحدة.. بدأت سنة ورا سنة أحس إن كل حاجة عملها كانت عشان أحققله أهدافه وأحلامه القديمة اللي مقدرش يحققها هو، بقى بيتحكم في كل صغيرة وكبيرة في حياتي بشكل مش مناسب لسني.. وبصراحة أنا كمان بحكم إني كنت في سن مراهقة فا كنت بترجم حاجات كتير منه غلط، في الوقت دا كرهته لدرجة إني كنت مستني موته بفارغ الصبر.. وفعلا معدش وقت لحد ما في ليلة تعب واستغاث بيا.. ساعتها لما دخلت أوضته وشوفت في انعكاس عينه الموت وهو بيقترب قررت أسيبه.. قولتله إني هروح أجيب دكتور لكن الحقيقة إني دخلت أوضتي ققلت عليا الباب ونمت على أمل إني أصحى الصبح الأقيه ميت، وفعلا ثاني يوم كنت بدفنه، أنا حتى معملتلوش عزا يليق بمقامه.. أبويا لما جه الدفنة حاول يقنعني أسافر معاه لكني اتحججت بالدراسة وأقنعتة إني هقدر أعيش لوحدي، كنت وقتها في ثانوية عامة فا وافق بسهولة وكتب أغلب ممتلكات جدي باسمي.. حسيت بالانتصار في الأول لكن بعدها بدأت أندم وأغير وجهة نظري

في الموضوع، فضل الندم ووجع الضمير يسيطروا عليا واحدة واحدة لحد ما حاولت أنتحر وفشلت، بعدها حاولت أكثر من مرة بنفس الطريقة لكن برضه كنت بفشل.. زي ما أكون مش عايز أموت بجد قد ما أنا بعاقب نفسي على اللي عملته، وأديني اتخرجت وهسافر قريب أشتغل عند أبويا.. بس هي دي الحكاية.

- بس أنا مش شايقة إنك كدا قتلته.. انت اه ممكن متكونش ساعدته لما استغاث بيك لكن برضه انت مقتلتوش.

- لو شوفتي حيوان في الشارع بيموت وسبتيه ومشيتي ضميرك ببوجعك وممكن متعرفيش تنامي بليل، ما بالك بقى لما يكون الإنسان اللي من غيره كان زمانك مشردة؟

- انت جيت هنا ليه؟

- عايزة تعرفي اللي قولته لنفسي ولخالد ولا الحقيقة؟

- الاتنين.

- اللي قولته لنفسي ولخالد هو إني عايز أفضي دماغي من المشاكل ووجع الدماغ وأعيشلي يومين حلوين قبل ما أسافر، لكن الحقيقة إني جيت عشانه.. جيت عشان أودعه وأدفن أي ذكريات جوايا من اللي عيسته في آخر خمس سنين من عمري هنا.. أنا مش عارف ازاي بحكيك الكلام دا أصلا.. دي حاجات أنا بتجنب أواجه نفسي بيها.

- يمكن تكون فكرة إنك ترمي همومك وأسرارك على حد متعرفوش وبعد شوية ممكن متقابلوش تاني فكرة كويسة.

- على رأيك.

نظرت ليلي في ساعتها تلك النظرة التي كان يخشاها علي فسأل بقلق:

- إيه هتمشي؟

عادت بنظرها إليه وهي تضم كتفيها وتبتسم قائلة:

- لا قاعدة معاك شوية.

ابتسم علي فرحا ثم نظر في عينيها للحظات وسأل:

- تحبي تنزلي البحر؟

ابتسمت ابتسامة قبول فخلع علي قميصه ثم أخذ بيدها ونزلوا البحر دون أن يهتم أحدهم للبرد أو لغرابة الموقف، بعد قليل من المرح والضحك ساد الصمت في المشهد، تبادلوا النظرات في الأعين ثم ترك كلاهما الأمواج لتقربه من الآخر حتى احتضنها وبدأوا في تبادل القبلات، كان يبدو المشهد كمشهد النهاية في فيلم يحكي عن قصة حب بين "بوسيدون" إله البحر وعروس البحر، شد يدها وخرجوا من المياه مسرعين، لحظات قليلة وكانت ليلي نصف عارية تجلس فوقه على رمال شاطئ البحر ليلا، تلامس الأمواج أنامل قدمه، تحتضن كل ذرة من أجسادهم قرينتها من جسد الآخر، تقطع أظافرها المخدرة كل بقعة جلد من ظهره دون أن يشعر.. ويمزق بأسنانه أطراف شفتيها كفهدهم يلتهم آخر غزالة على الأرض أو مصاص دماء طال صيامه لسنوات.

الخميس ١٤ يوليو ٢٠١٦

"١٤ يوليو ٢٠١٦ امبارح كان أسعد يوم في حياتي، قابلت ليلي تاني وقضيت معاها ليلة ولا في الأحلام.. طول عمري كنت بتمنى أعيش حدوتة شبه حواديت الأفلام والروايات اللي بقراها لكن عمري ما كنت أتخيل إن دا هيحصلي فعلا وهيبقى بالحلاوة دي.. ياه.. من زمان مفرحتش أوي كدا، والأحلى من الفرحة إنني مش خايف.. مش خايف حاجة تبوظ ولا متعشم في حاجة تحصل، مش عايز أي حاجة غير إنني أشوفها تاني".

كانت هذه أولى كلمات علي التي قام بتسجيلها كمذكرة جديدة عند استيقاظه في مغرب اليوم الخامس، أدرك بعدها أنه من المقرر رحيله في صباح اليوم التالي أو تمديد فترة الاستئجار لخمسة أيام أخرى، لم يتردد في ارتداء ملابسه والتوجه إلى مكتب التسكين حتى يمدد فترة استئجاره للشاليه ويمضي بضعة أيام أخرى في هذا الحلم الجميل، كانت المرة الأولى له منذ مجيئه أن يخرج من الشاليه وقبلته ليست لشاطئ البحر، فضل اصطحاب "عزيزة" عن الذهاب سيراً على الأقدام حتى يلحق بمكتب التسكين قبل أن يغلق أبوابه، عند وصوله وقبل أن يخرج من السيارة بلحظات تلقى مكالمة دولية من رقم غير مسجل فظن أنها من والده وأجاب:

- الو.

- أيوة يا علي ازيك؟

- تمام الحمد لله، مين معايا؟
- أنا عمك كمال اللي شغال مع والدك.
- اه أهلا وسهلا بحضرتك.. أو مرني؟
- الأمر لله وحده.. علي أنا بس كنت عايز أسألك، هو انت جاي امتي؟
- أنا جاي قريب أهو والله، خلصت كل ورقني وإن شاء الله بالكثير أسبوع أو اتنين وهكون عندكم.
- إن شاء الله يا حبيبي.. بس متعرفش تستعجل أمورك شوية؟
- خير هو فيه حاجة؟
- بص يا علي انت دلوقتي كبرت وبقيت راجل ما شاء الله عليك ومش هخاف أقولك حاجة زي كدا.. والدك حالته الصحية ساءت أوي الفترة الأخيرة وبقى محتاجك جنبه في أسرع وقت، هو ميعرفش إنني بكلمك المكالمة دي بالمناسبة.. أنا اللي اتسحبت وجبت رقمك من سجل الأرقام اللي في مكتبه واتصلت بيك لما بقيت شايف حالته وهي كل يوم بتسوء عن اليوم اللي قبله.
- بس أنا لسه عندي شوية التزامات هنا لازم أخلصها.
- والدك أهم يا علي.. نصيحتي ليك يا بني تعالى شوف أبوك واطمن عليه في أسرع وقت بعدها ابقى اعمل اللي يريحك.
- طيب.. أنا هكون عندكم في أقرب وقت إن شاء الله.
- إن شاء الله يا بطل.. توصل بالسلامة.

أغلق علي باب السيارة بعد أن كان على أتم استعداد للتوجه إلى مكتب التسكين وتمديد فترة استئجاره للشاليه، قرر العودة مرة أخرى والتوجه في الصباح إلى المطار، كان في غاية الضيق عندما أدرك أن الليلة ربما تكون آخر لياليه مع ليلى ولكن لم يكن باليد حيلة.. لم يأبه كثيرا لمرض والده بقدر خوفه من أن يندم مرة أخرى، فقد ذكرته كثيرا تلك المحادثة التليفونية بنداء الاستغاثة الذي تجاهله من قاسم الشامي ليلة وفاته.

" مريم سامحيني أنا آسف على الطريقة اللي عاملتك بيها امبارح، أنا عارف إن ملكيش ذنب ومصدقك من أول مرة قولتي فيها إنك متعرفيش حاجة عن إحساس علي تجاهك.. بس أنا كمان مكنتش في حالتي.. على فكرة أنا مش زعلان إنه بيحبك، هو مختارش يحبك انتي بذات ويمكن أصلا يكون بيحبك من قبل ما نعرف بعض.. أنا زعلان منه عشان الكلام اللي سمعته بوداني وهو بيقوله عليا، قال عليا كلام وحش أوي يا مريم.. لكن عشان خاطرك انتي بس وعشان أبقى خلصت ذمتي هروحله بكرة الشاليه تاني واحاول أصلح اللي حصل.. هحاول أقنع نفسي إنه كان سكران وببهرتل بأي كلام زي ما بيقول.. المهم انتي متزعليش مني، انتي عارفة إني مليش غيرك في الدنيا دلوقتي".

كانت تلك هي الرسالة الصوتية التي أرسلها خالد إلى مريم في تمام التاسعة ليلا بعد أن يئس من محاولات اتصاله بها التي باءت بالفشل.

مع اقتراب منتصف الليل كان قد انتهى علي من حزم آخر أمتعته استعدادا للسفر في الصباح الباكر بعد أن حجز مقعدا على الطائرة التي ستقلع في التاسعة صباحا، أرسل للعم كمال رسالة تحمل موعد وصول طائرته ثم جلس يفكر في تذكارا يتركه لليلي قبل أن يرحل حتى تتذكره به في غيابه، لم يجد أنسب من الكمان الذي ورثه عن جده حيث كان يؤمن أن جزءا من روحه يسكن في هذا الكمان العتيق وأن لولاه لما كان التقى بليلى، أخرجها من صندوقه الخشبي ليتحسس ملمسه ويعزف عليه للمرة الأخيرة، برغم العشوائية التي كانت تنتقل بها أصابعه على أوتار الكمان ولكنها كانت من أفضل المرات التي عزف فيها منذ بداية رحلته مع الموسيقى، عزفت أصابعه مزيجا بين كل الألحان التي درسها منذ أن خطى أولى خطواته في معهد الموسيقى، بعد أن انتهى من العزف ونظر في ساعته ليدرك أنه قد حان موعد لقاء ليلى وضع الكمان بلطف في صندوقه الخشبي وهو يودعه ويلقي عليه آخر نظراته حيث أدرك في تلك اللحظة أنه كان رفيق رحلته الوحيد الذي لم يفارقه منذ البداية حتى ذلك الحين، أغلق أنوار الشاليه وخرج ليمضي في طريقه لأخر مقابلاته مع ليلى.

- يعني بدمتك أنا ولا الكمانجة؟

قام بتقبيلها من رقبتها وهو يجلس بجانبها قائلا:

- ودي فيها كلام برضه؟ انتي طبعا.

- أو مال يا عم سايبني هنا وقاعد بتعزف على البتاعة دي جوة ليه؟

- معلش بقى.. أصل دي آخر مرة هشوفها فيها.

- إيه دا ليه كدا؟

- أبويا تعبان أوي وحالته الصحية بتتدهور، لازم أسافر الصبح.

- هتسييني وتمشي؟

- أعمل إيه بس.. انتي عارفة إن لو عليا أنا عايز أعيش باقي عمري جنبك هنا، بس خايف أندم تاني وأحس إنه احتاجني جنبه وخليت بيه.

- معاك حق.. بس أنا مش فاهمة برضه، دا إيه علاقته بالكمانجة؟

- الكمانجة دي أنا عايزها تفضل معاكي، اعتبريها تذكاري مني لحد ما نتقابل تاني، وحتى لو متقابلناش تاني خليها معاكي.

- ماشي يا سيدي تذكارك مقبول.. بس اشمعني الكمانجة يعني؟

- وانتي عينك كانت في حاجة تانية ولا إيه؟

- لأ بجد مبهرزش.. يعني قصدي إن انت موهوب وعزفك كويس، ليه تستعني عن الحاجة اللي بتطلع فيها موهبتك لواحدة مش عارف هتقابلها تاني ولا لا؟

- الكمانجة دي عمرها فوق الأربعين سنة، جدي كان قبطان رحلة لليونان في السبعينات واشترأها من هناك، في مرة وأنا صغير صحيت من النوم لقيته بيطلب مني ألبس عشان أنزل معاه مشوار، كان عندي ٧ سنين تقريبا وقتها.. نزلنا وكان شايل في إيده صندوق خشب كبير كدا، سألته الصندوق دا فيه إيه مجاوبش عليا، فضل طول السكة كل ما أسأله يقول "استنى بس يا علي هتشوف"، فجأة لقيته بيركن العربية وبيقولي انزل، خدني من إيدي ودخلنا مبنى قديم كدا ومعتق، الطرقة كانت

فاضية لكن كنت سامع من كل الأوض اللي بنعدي عليها أصوات آلات موسيقية وناس بتعزف، لقيتته بيخبط على باب أوضة من الأوض وبيسأل عن تعليم كمانجة للأطفال، فهمت إنه عايز يعلمني موسيقى لكن مفهمتش ليه كمانجة بالذات طلا ما لسه عندنا الاختيار؟ لحد ما لقيتته بيفتح الصندوق اللي معاه ويخرج منه الكمانجة دي.. وقتها محبتش الموضوع أوي وكرهت فكرة إني مختار تش الآلة اللي هتعلمها بنفسي، لكن مع الوقت حبيتها جدا واتعلقت بيها لحد ما بقت جزء مني.. أول لحن اتعلمت أعزفه عليها كانت نفس الأغنية اللي كنتي مشغلاها يوم ما اتقابلنا، يتهيألي مفيش أي حاجة أنسب منها أقدر أسبها لك تذكرك، ولو على العزف يا ستي متقلقيش هشتري واحدة غيرها.. بس الكمانجة دي بالذات لازم تفضل معاك.

- علي انت حد قالك قبل كدا إنك جميل أوي؟

ابتسم علي وضمها إلى صدره للحظات ثم قال:

- المهم أنا عايز أطلب منك طلب.. فيه شاب بيشتغل هنا في مركز الخدمات اسمه عبادة، هكتبلك اسمه على ورقة عشان متنسيش.. عايزك تسألني عليه وتديله الفلوس دي.

أخرج علي من جيبه بضعة ورقات من فئة المئتين ثم أخرج من صندوق الكمان ورقة من نوت العزف وكتب على ظهرها اسم عبادة وبالأسفل "مركز الخدمات" حتى لا تتوه عنه وأكمل حديثه قائلاً:

- هو في اجازة دلوقتي والمفروض كان هيعدي عليا بكرة لما يرجع بس شكله كدا مش هيلحقني، أنا لازم أمشي دلوقتي.

- مش هتخليك معايا شوية؟

نظر هو في ساعته تلك المرة ثم قال:

- لا يدوب كدا.. طيارتي هتطلع تسعة الصبح، ممكن رقم موبايلك
عشان أقدر أوصلك وأنا هناك؟

- أنا معنديش موبايل، بس اديني ورقة وقلم أكتبلك عنواني.. يعني
عشان لو رجعت في يوم من الأيام وحببت تزورني.

ابتسم علي وأخرج لها ورقة أخرى من الصندوق وأعطاهها القلم، كتبت
عنوانا بإحدى المناطق القديمة بالإسكندرية ثم أعادت له الورقة فأعطاهها
قبلة أخيرة على جبينها ثم ترك مكانه وأدار ظهره استعدادا للرحيل،
مشى بضعة خطوات حتى سمعها تناديه:

- علي.

عاد بنظره إليها مرة أخرى:

- متحاولش تموت نفسك تاني.

الفصل الثالث

بتوقيت الإمارات

الجمعة ١٥ يوليو ٢٠١٦

الساعة الثانية والنصف مساءً.

هبطت طائرة علي في مطار الإمارات الدولي، خرج من الطائرة بعد رحلة جوية استمرت لقرابة الثلاث ساعات ونصف ليمشي أولى خطواته في مدينة لم يسبق له زيارتها من قبل ويستنشق الأوكسجين خارج حدود مصر للمرة الأولى منذ ميلاده، عندما انتهى من الإجراءات الروتينية التي تفيد دخوله للإمارات قرر الخروج لاستئجار سيارة نقله إلى منزل والده الذي كان قد كتب عنوانه في ورقة حتى لا يتوه عنه.. ولكنه سرعان ما سمع صوتاً من خلفه منادياً باسمه، نظر إلى الخلف ليرى رجلاً قصير القامة ويبدو في الخمسينيات من عمره، تنتشر في شعره الأسود بضع الخصال البيضاء، يرتدي بذلة عمل مهندمة وتبدو على ملامحه البشاشة.

- أيوة حضرتك بتناديني؟

- إيه يابني معرفتنيش ولا إيه؟ معلى معذور ما انت برضه ماشوفتنيش من أيام ما كنت عيل، أنا عمك كمال صاحب والدك.

- اه ازاي حضرتك؟ أنا بعث لحضرتك رسالة بميعاد الطيارة اللي هاجي عليها امبارح بس مكنتش عارف إنك هتيجي بنفسك تاخدني، ليه حضرتك تعبت نفسك كدا بس؟

- يا واد عيب اللي بتقوله دا تعبت نفسي إيه.. دا لولا إن الوقت كان ضيق ومجاتش فرصة كنت حكيتلك وأنا بكلمك عن أيام ما كنت بشيك علي حجري وانت صغير وتعملها عليا.

ضحك علي وظهرت على وجهه ملامح تعجب لما يسمعه قائلا:

- ياه! دا واضح إن حضرتك معرفة قديمة بقي.

- أيوة طبعا يابني أومال بشتغلك؟.. أنا وأبوك نعرف بعض من أيام البهدلة، بس أبوك بقى الله يرزقه ويفتحها عليه أول ما جه اشتغل هنا وعمل اسم بعثلي أجيله عشان يشوفلي شغلانة معاه.

- غريبة.. سامحني يا عمو يعني بس أنا مش فاكرا إنني شوفت حضرتك قبل كدا.

- طيبعي يابني.. انت آخر مرة شوفتني فيها كانت وانت عندك سنة قبل ما والدتك الله يرحمها تروح عند اللي خلقها، المهم بس تعالى أما أوصلك البيت تقابل أبوك.. دا انت تلاقيك واحشه أوي يابني.

حمل العم كمال إحدى حقائب علي عنه ومضى كلاهما في اتجاه بوابة الخروج من المطار، لحظات وسأل علي:

- أومال بابا مجاش مع حضرتك ليه صحيح؟

- هو انت يابني مصدقتنيش لما قولتلك إنه تعبان ولا إيه؟

- لا العفو طبعاً.. بس للدرجادي يعني؟

- لما تشوفه هتفهم.

- هو تعبان عنده إيه طيب؟

- ياريتة يابني راضي يروح لدكتور يكشف أو حتى نجيله دكتور مخصوص لحد البيت.. أبوك دماغه ناشفة، كل ما أقوله نروح لدكتور يعرفنا عندك إيه يتحجج بالوقت وزحمة الشغل.. بس اللي هو فيه دا طبيعي يابني بالنسبة لواحد في سنه وشايل حمل الشغل كله على كتافه.

- وارد برضه.

ابتسم العم كمال ثم نظر إلى علي سائلاً:

- وحشك ها؟

- هو مين دا؟

- الله! أبوك يا واد.. يعني هيكون مين يعني؟

- اه وحشني.. وحشني أوي.

انتهى العم كمال من مساعدة علي في وضع حقائبه في السيارة ثم ركب على مقعد السائق وركب علي بجانبه متجهين إلى منزل محمود قاسم الشامي.. بعد أن تحركت السيارة بدقائق قطع العم كمال هدوء الرحلة بقوله:

- بالمناسبة يا علي أنا نسيت أعزيك في روح جدك الله يرحمه، أنا عارف إنها متأخرة شويتين بس والله يابني كان بودي آجي العزاء

وأعزيك بنفسي لولا إن أبوك طلب مني إنني أفضل هنا وأخلي بالي من الشغل لحد ما يرجع.

- لا ولا يهم حضرتك أنا فاهم أكيد.. الله يكون في العون.

- بطل حضرتك حضرتك اللي عمال تقولها دي يا واد أنا زي أبوك.

ابتسم علي ثم سأل:

- أو مال تحب أنادي حضرتك بإيه طيب؟

أجاب العم كمال ضاحكا:

- شوف الواد برضه هيقولي حضرتك.. قولي يا كمال.

- مش صعبة شوية دي؟

- لا ولا صعبة ولا حاجة، أحفادي بيقولولي يا كمال.. وبعدين احنا لسه قدامنا شغل كثير والألقاب دي هتعتلنا ولا إيه يا بطل ها؟

- ماشي يا كمال مفهوم.

مع دقة الساعة الرابعة كان قد وصل علي إلى منزل والده بصحبة العم كمال الذي ظل طوال الطريق يحدثه عن جمال المدينة ورفاهية الحياة التي يقبل عليها والأماكن التي يود أن يصطحبه إليها قبل بدء العمل، عندما وصل علي وألقى بنظرته الأولى تفاجأ من فخامة مسكن والده.. فيلا من الطراز الحديث تحيطها حديقة واسعة وحمامي سباحة بأطوال مختلفة، عدد فردين من الحراسات الخاصة يتقدمون بوابتها الداخلية وثلاثة آخرون علي البوابة الخارجية.

- دا بجد دا ولا إيه؟

كانت تلك هي الكلمات التي همس بها علي وهو على بعد خطوات من الدخول، فإنه لم يتخيل يوماً أن والده الذي كان موظفاً كادحاً في إحدى المؤسسات الحكومية قبل أعوام يملك الآن كل هذا القدر من المال والرفاهية وله من الأهمية ما يجعله يعين خمسة أفراد لحراسته الشخصية.. ابتسم العم كمال ثم نظر إليه وقال:

- أنا عارف إنك مستغرب يا علي.. بس اللي عايزك تفهمه يابني إن كل دا مجاش بالسهل، أبوك تعب وشقي سنين طويلة عشان يوم ما انت تشرف تلاقي المنظر دا.. أقسملك بالله يابني كنا بنقعد أنا وأبوك بالأيام ميناكلش.. كنت أفضل أقوله يا محمود متنشفش دماغك وابتعت هات ابنك الغلبان اللي مرمي في مصر لوحده دا يعيش معاك هنا وأهو يشيل عنك الشغل شوية.. لحد ما يزهدق من زني ويكلمك تقوم انت كمان منشف دماغك ومعرفش ألقاها من مين فيكو.. وقتها افتكرت إنه بيراضيوني وإنه مش شايل هم مجيتك لكن بعد كذا فهمت إنه مكانش عايز يبعث يجيبك غير لما يوفرك عيشة تعوضك عن اللي فات.. تعالى بقى يا بطل أما أفرجك على البيت.

تقدم العم كمال وطرق جرس الباب، مرت لحظات حتى فتحت له الباب شابة في مقتبل العمر.. قمحية اللون ذات شعر أسود لامع وعينين بنيتين وبشرة نقية، لها غمازتان واضحتان وتتمتع بلامح شرقية تضيف علي وجهها السحر، طويلة القامة ذات جسد متناسق وترتدي ملابس عمل رسمية مع بضعة لمسات أنثوية تلائم نضرتها:

- ازيك يا عمي؟

- أهلا يا بنتي ازيك؟

- الحمد لله كله بخير.

- طب إيه ناوية تسيبيننا واقفين على الباب كدا؟

- لأ طبعا يا عمي آسفة.. اتفضلوا.

دخل العم كمال إلى المنزل وبرففته علي، اقتربت الفتاة من أذن العم كمال وسألته بصوت خافت وهي تشير برأسها إلى علي:

- هو مين دا؟

- اه أنا نسيت أعرفكم ببعض.. أعرفك يا بنتي، دا علي.

- إيه دا علي مين؟! علي ابن محمود بيه؟

- أيوة مضبوط.. أول ما عرف بالحالة اللي محمود فيها ساب كل التزاماته ودنيته في مصر وجه عشان يطمئن عليه.. اعلمي حسابك كمان إنه من هنا ورايح هيبقى معانا في الشغل.

- ممم.. طيب كويس والله.

- وانت يا علي يابني أعرفك.. دي نغم، سكرتيرة والدك ودراعه اليمين في الشركة، مش بس كدا.. احنا هنا كلنا بنعتبرها بنته وهو قبلنا، الله يكرمها ويجازيها كل خير واخدة بالها من صحته طول الوقت ومش مخلياه محتاج أي حاجة من يوم ما رجليها خطت عتبة البيت دا.. يعني تقدر من هنا ورايح تعتبر إن بقى ليك أخت جديدة.

نظر العم كمال إلى نغم موجهها حديثه لها وقال:

- يلا يا نغم يا بنتي خدي علي فرجيه على البيت ووريه أوضته فين
عشان زمانه تعبان من السفر وعايز ينام.

عاد بنظره مرة اخري إلى علي قائلا:

- والدك زمانه اخد كورس المهدئ ورايح في سابع نومة دلوقتي..
هخش أنا أصحيه على ما نغم تفرجك على البيت، سيب انت شنطك هنا
والشغالين هيطلعوهم على الأوضة متقلقش.

ترك علي حقائبه وذهب بصحبة نغم ليلقي نظرة على منزله الجديد، لم
تبد تعابير وجه نغم مرحبة بوجوده ولكنه لم يأبه لها كثيرا.. فقد ظن أنها
مجرد ساقطة من الذين اختارهم والده ليؤنسوا وحدته في الغربة.. ربما
ساقطته المفضلة، فليس من الطبيعي لساقطة عشرينية أن تحبذ وجود
الشخص الذي تظنه جاء ليستولي على كل ورقة نقدية كانت سببا في
مضيعة شبابها بجانب رجلا في السابعة والخمسين من عمره.

كان للمنزل ذوق رفيع.. حيث كانت قطع أثائه قليلة العدد وفي غاية
الأناقة.. تماما كما يفضل فنانون القرن الواحد والعشرون مثال علي،
كانت هنالك أيضا بضعة قطع من الأنتيكات التي ذكرته بفيلا قاسم
الشامي كالجرامفون والمراكب المصنعة يدويا والمنحوتات المصغرة
للآلهة اليونانية، بارا للخمور في غرفة المعيشة وعلى الحائط لوحة
تخليية بألوان الزيت لأحد محاربي الثيران في "الكولوسيوم"، وفي آخر
محطاته كانت هنالك غرفة نوم من الطراز الحديث لم يلفت انتباهه شيئا
منها في تلك اللحظة إلا سرير واسع يناديه.. قام بشكر الساقطة على
رحلتها معه وأبلغها بحاجته للنوم فسألته:

- مش حابب تقابل محمود بيه قبل ما تنام؟

- لأخليه هو كمان نايم بلاش أصحيه.. هبقى أقابله بليل.

- طيب زي ما تحب.

خرجت نغم وتركته لينام، ألقى بجثته على الفراش وعلق بصوت خافت على آخر كلماتها: "طبعاً زي ما أحب.. ما كنتي تيجي شوية.. هاها"

السبت ١٦ يوليو ٢٠١٦

الساعة الخامسة صباحا بتوقيت الإمارات.

استيقظ علي بعد رحلة من الأحلام طالت مدتها ثلاث عشرة ساعة، تعجب أنه قد نام كل تلك المدة عندما نظر في ساعته.. قام بإشعال سيجارة ثم أنار هاتفه ليلقي نظرة سريعة على حساباته بمواقع التواصل الاجتماعي التي كان قد أهملها على مدار الأيام السابقة، تفاجأ بعدم وجود اسم خالد على قائمة محادثاته واستنتج سريعا أنه قد قام بعمل "بلوك" له فنفخ من فمه كتلة من الضيق وعاد برأسه إلى الخلف موجهًا نظره للأعلى ثم أغلق هاتفه دون أن يلتفت، ترك مكانه في الفراش وارتنى قميصه ليذهب باحثا عن الحمام حتى يقوم بغسل وجهه، لم يجد غايته في الطابق العلوي فمضى بخطوات هادئة إلى الطابق السفلي حتى لا يزعج سكان المنزل الذي لا يعرف شيئا عن عددهم وهوياتهم حتى الآن، وصل إلى غرفة المعيشة بالطابق السفلي ليتفاجأ برجل ماكث على سجادة صلاة في ظلمة الفجر، يعطيه ظهره موجهًا قبلته إلى لوحة محارب الثيران ويقرأ التشهد بصوت مسموع، بالرغم أنه لا يرى منه سوى انعكاس ضوء القمر على كتفه الأيمن ولكنه لم يحتج للكثير من الوقت حتى يستشف هويته.

- تقبل الله.

التفت الوالد مسرعا عند سماعه تلك الكلمات ثم ابتسم ابتسامة عريضة أظهرت على وجهه ملامح المرض وتقدم السن، بادله علي الابتسامة ثم أكمل حديثه بتعليق ساخر:

- طب مش كنت تداري أزييز الخمرة اللي على البار اللي جنبك الأول؟
ولا دول لزوم الضيافة ولا إيه؟

- مفيش فايده فيك.. لسه لمض زي ما انت.

ضحك علي ثم اقترب منه ومد له يد العون ليساعده على القيام من مكانه
ثم سارع كلاهما باحتضان الآخر بحرارة:

- ازيك يا بابا؟

- ازيك يا حبيبي؟ وحشتني.

- وانت أكثر والله.

- مش باين ياخويا.

- ليه كدا بس؟

- بقى يا واد يا ندل انت أعرف بالصدفة إنك هنا من امبارح وطلعت
أوضتك نمت من غير ما تيجي تسلم عليا؟

- معلش بقى يا بابا انت عارف تعب السفر.. وبعدين عرفت من عم
كمال إنك تعبان ومرضتش آجي أصحيك.

- ولا تعبان ولا حاجة أنا زي الفل الحمد لله بس هو عمك كمال عادته
كدا بيحب يببالغ.. انت مقولتليش ليه يابني إنك جاي دلوقتي؟ مش كنت
هتيجي كمان أسبوع أو أسبوعين باين؟

- لا ماهو.. ماهو أصل أنا لقيت نفسي خلصت كل حاجة ورايا في
إسكندرية فا قولت آجي علي أول طيارة بقى هستنى إيه.

- نورت يا حبيبي.. المهم قولي، قابلت نغم؟

- نغم مين؟!.. اه نغم.. قابلتها اه اشمعنى؟

ابتسم الوالد ثم سأل بصوت خافت:

- عجبك؟

- نعم!!

- إيه مسمعتنيش؟! بقولك عجبك؟

- إيه اللي انت بتقوله دا بس يا بابا عجبنتي إيه.. احنا متفقين إني جاي
أشيل عنك الشغل مش جاي عشان حاجة تانية.

- وماله يا حبيبي هو حد قال حاجة.. تشيل عني الشغل وأفرح بيك في
نفس الوقت.. ولا انت مستكتر عليا أفرح بيك؟

- تفرح بيا يعني إيه؟ انت بتتكلم بجد؟

- يابني هو أنا بعد العمر دا كله ههرج معاك؟ البت بنت أصول
ومتعايبش.. ولو على الجمال فا هي ما شاء الله عليها قمر أربعاشر.

قطع حديثهم صوت جرس الباب فسأل علي والده:

- وده مين دا اللي جاي دلوقتي؟

- دا تلاقيه عمك كمال.. روح افتحله.

ذهب علي ليفتح الباب ثم قال والده بنبرة صوت عالية:

- واعمل حسابك كلامنا لسه مخلصش ها!

- إن شاء الله.

فتح علي الباب ليجد خلفه العم كمال تماما كما توقع محمود الشامي،
كان يحمل في يديه بعض الأكياس التي تفوح منها رائحة الطعام:

- صباح الخير يا عم كمال.. اتفضل.

- صباح النور يا علي يابني.

- تعالى يا كمال احضرنا.

- خير في إيه؟

- مفيش حاجة يا عم كمال.. دا بابا بس زعلان إني مدخلتش سلمت عليه
امبارح أول ما جيت.. خلاص بقى يا بابا متزعلش.

- متصغرش دماغك بقى يا محمود الواد أكيد كان تعبان وعايز ينام
ومرضيش يقلقك انت كمان من منامك.

- أهو شوفت بقي؟

- ماشي ياخويا.. هعديهالك.

- أما أنا بقي جبتلكوا معايا شوية فول وفلافل من بتوع إسكندرية إنما
إيه.. هتاكلوا صوابكم وراهم.

- تعبت نفسك برضه انت يا عم كمال.. وبعدين جبتهم منين دول؟ هو
فيه حد بيبيع فول وفلافل هنا؟

- لا عيب.. دول عمائل إيديا.

- تسلّم إيدك.

- يلا بقى خذ أبوك وروحوا استنوني في الجنينة على ما أحط الأكل في الأطباق وأجيلكوا نفطر سوا.

- استنى طيب هاجي أساعدك.

اتجه محمود إلى طاولة الطعام بحديقة الفيلا، جلس وأخرج علبة سجائر من أحد جيوبه وقام بإشعال سيجارة منتظرا أن يأتي علي وكمال بوجبة الفطور، تعجب قليلا من تلك الارتياحية التي جاءت سريعا في التعامل ما بين نجله وصديق عمره.. فمن معلوماته القليلة عن شخصية علي أنه طالما كان شابا ذا شخصية انطوائية لا يحبذ وجود الأعراب ولا يجيد التواصل معهم.. فربما غيرته حياة الوحدة، أو ربما بشاشة العم كمال وشعره الأبيض هم الذان جعلوه من القلة المؤهلة لنيل ثقة الآخر دون عناء.. قطع حبل أفكاره وصول علي بصحبة العم كمال حاملون معهم أطباق الطعام بالفعل.

- وبعدين معاك بقى يا محمود.. اظفي البتاعة اللي في إيدك دي وابقى ولعها بعد ما ناكل.. بلاش على الريق كدا.

- انت بتدخن يا عم كمال؟

- لا يابني الحمد لله عمرها ما دخلت بوقى.

- اه.. يبقى عشان كدا متعرفش حلاوة السجارة اللي بتبقى عالريق دي.

- سامع ابنك يا محمود بيقول إيه؟ انت عارف إنه بيدخن وسايبه كدا؟

- يعني هو كان لسه عيل في ثانوي يا كمال.. وبعدين دا أول مرة في حياته يقول حاجة صح.. جدع يلا يا علي.

- شكل كدا ربنا ابتلاني باتنين عيال أكثر من بعض.. يلا ما علينا، مدوا إيديكوا بسم الله.

مضت قرابة العشر دقائق لهم وهم يتناولون الفطور حتى قطع العم كمال صوت تصادم الملاعق والسكاكين بالأطباق وسأل:

- أو مال البت نغم فين صحيح؟

- أنا صحيت ملقتهاش.. تلاقيها سبقتنا عالشركة كالعادة عشان تفتح للموظفين.

- الله يكون في عونها.. البت دي بمية راجل والله.

رفع محمود رأسه من الصحن ونظر إلى علي قائلا:

- علي رأيك.. بت جدعة وزى القمر.. بس هنقول إيه بقى.

قطع علي حديثهم بسؤال عابر لا يوجد من ورائه أي أهداف سوى إنقاذ نفسه من نقاش قد استنشمت رائحته من علي بعد:

- ألا قولني يا عم كمال صحيح.. أنا لسه محدش فهمني دوري هيبقى إيه في الشركة.. هعمل إيه يعني؟

نظر العم كمال إلى محمود فهز محمود رأسه بالإيجاب مشيرا للعم كمال أن يشرح له دوره المستقبلي في الشركة فعاد بنظره لعلي مرة أخرى وأجاب مبتسما:

- هذربك عشان تمسك الحسابات إن شاء الله.
- بس أنا مفهمش أوي في شغلانة الحسابات دي لسه.
- ملكش دعوة.. سيبلي نفسك انت بس وأنا هعلمك كل حاجة بتمشي ازاي.
- ماشي، أنا كدا شبعنت الحمد لله.. هقوم ألبس في السريع وأنزل أستناكوا عشان نروح الشغل.
- لا لا على فين؟.. انت معايا النهاردة يا بطل، مش اتفقنا امبارح؟
- سأل محمود:
- اتفقتوا على إيه؟
- أنا و علي اتفقنا اني هاخذه أفرجه على البلد وأفسحه فيها شوية قبل ما نبدأ شغل.. دا بعد إذتك يا محمود طبعاً.
- لا مفيش مشاكل.. بس خد بالك انت وهو من بكرة مفيش الدلع دا.
- عيب عليك يا محمود.. سيبهولي انت بس ووعد مني بكرة من النجمة هيبقى عندك في الشركة.
- ماشي.. أما نشوف.

مع دقة التاسعة مساء كان قد أنهى علي رحلته الاستكشافية مع العم كمال وعاد إلى المنزل ليبدل ملابسه ثم يخرج للجلوس في الحديقة وحيدا في هدوء لا يعكر صفوه إلا صوت تصادم الرياح بالأشجار، تؤكد

من عدم وجود أحد من سكان المنزل في المحيط ثم أخرج هاتفه ليسجل أولى مذكراته بعد السفر:

"١٦ يوليو ٢٠١٦.. النهاردة تاني يوم ليا هنا.. هنا فين؟ هنا في الإمارات، زي دلوقتي من يومين كنت بحضر نفسي عشان أقابل ليلي وفاكر إنني هعرف أقعد معاها كام يوم كمان، ومن بييجي أسبوع كنت ببارك لخالد على التخرج وفاكر إننا هنفضل صحاب للأبد، لكن اللي حصل إنني بين يوم وليلة لقيت نفسي هنا.. ازاي؟ معرفش، لقيت نفسي هنا وأنا خسران كل حاجة أولهم نفسي، نفسي اللي بيعتها عشان أبدأ حياة جديدة في بلد جديدة وبشخصية مش شخصيتي في بدلة مش لايقة عليا.. على رأي خالد، اللي أبويا عمله زمان كان يديني الحق إنني أرفض أسافرله من غير ما أضطر أدي أي مبررات، بس أنا اللي اخترت أبقى هنا.. مقدرش أقول إن البلد هنا وحشة أو إن العيشة هنا خذلت توقعاتي بالعكس.. البلد حلوة أوي وأبويا طلع غني فتيخ وعنده فيلا وطقم عربيات محترم وبتاع.. قابلت كمان راجل طيب كدا اسمه كمال، بيقول إنه صاحب أبويا وشغال معاه من زمن.. وبيقول كمان إنه كان بيشيلني وأنا صغير وكنت بعملها عليه.. بعيدا عن إنني مش مصدق حكاية إنني كنت بعملها عليه وأنا صغير دي بس هو راجل زي السكر والله.. بيعاملني زي ابنه لدرجة إنه ساب شغله النهاردة مخصوص عشان ياخذني يفرجني على البلاد حنة حنة.. على قد ما اليوم النهاردة كان حلو وعلى قد ما عيشتي هنا شكلها هتبقى كويسة وفيها برستيچ محترم بس أنا برضه مش حاسس إنني مرتاح.. حاسس إنني عايز أرجع إسكندرية تاني سواء على البيت أو الشاليه، نفسي ألبس وأنزل أقعد مع خالد على القهوة تاني وسط زحمة الناس ونفضل نضحك ونتكلم لغاية الشمس ما تطلع، نفسي أرجع ليوم من أيام الكلية لما كنت بقضي النهار

كله من أوله لآخره مبعلمش أي حاجة غير إني قاعد بتفرج على مريم وبراقيب تصرفاتها من غير ما حد يعرف.. أو حتي أرجع على الشاليه تاني وأستنى لما تيجي الساعة واحده عشان أطلع أقابل ليلى زي المجانين، بس خلاص بقى مبقاش ينفع.. ولا خالد بقى ينفع بعد اللي حصل إني حتى أكلمه على التليفون أسأل عليه.. ولا بقى في كلية أشوف فيها مريم.. ولا حتى بقى ينفع أرجع الشاليه تاني عشان أشوف ليلى، يمكن ربنا يكون كاتبلي حاجة جديدة أعيشها هنا، ويمكن تلف بيا الأيام وأرجع لحياتي القديمة تاني.. كل اللي بايدي أعمله إني أستنى وأسيب الموجة تاخذني وتوديني وأشوف في الآخر ناوية ترسي بيا على أنهى بر"

- معاك ولاعة؟

سمع علي تلك الكلمات آتية من الخلف بصوت أنثوي هادئ فور انتهائه من التسجيل، انتفضت رأسه ونظر خلفه ليجدها نغم:

- نعم؟؟

- معاك ولاعة؟!

- اه.. اتفضلي.

أخرج علي من جيبه ولاعة وأعطاها لها، قامت بإشعال سيجارة ثم أعادت له ولاعته قائلة:

- شكرا.

- العفو على إيه.

سحبت نغم أولى أنفاسها ثم نظرت إلى علي لوهلة وقالت:

- لما انت عايز ترجع إسكندرية.. إيه اللي جابك؟

- انتي كنتي بنتصنطي عليا؟

- وأنا أتصنت عليك ليه! أنا بس سمعتك بتقول كدا بالصدفة وأنا جاية.

- ممم.. وسمعتي إيه كمان؟

- مش مهم ومش فارق معايا أي حاجة تانية سمعتها، أنا بس تفرق معايا
إجابة السؤال دا.. دا لو معندكش مانع تجاوبني عليه يعني.

- لا مش مهم ازاي بقى.. ماهو انتي لو بتسمعي من بدري كان زمانك
عرفتي الإجابة.

- ريح نفسك.. أنا لسه جاية دلوقتي، هتجاوبني ولا أمشي؟

- لا وعلى إيه.. جيت عشان أبويا كبير وبقى محتاجني أبقى جنبه
وأساعده في الشغل، أي أسئلة تاني؟

ابتسمت نغم ابتسامه سخرية ثم قالت:

- أبوك تعبان ومحتاجك جنبه بقاله سنين وانت مبتسألش فيه.. اشمعنى
دلوقتي يعني؟

- مش فاهم.

- يعني إيه اللي خلاك تيجي دلوقتي بالذات؟

- جيت دلوقتي عشان مكانش ينفع آجي قبل كدا.. أنا كنت في كلية ولسه متخرج من أسبوع لو متعرفيش يعني.

- لا عارفة.. وعارفة كمان إنك كنت من المتفوقين في دفعتك ما شاء الله، بس أنا مش قصدي كدا.. قصدي انت فاهمه كويس.

- لا الحقيقة مش فاهم.. ممكن تتكرمي وتفهميني؟

بدأت ملامح العبوس في الظهور على وجه نغم، حاولت تمالك أعصابها ولكنها فشلت في السيطرة على لهجتها الحادة وقالت:

- طب اسمعني بقى وركز في كلامي كويس أوي.. أبوك الغلبان اللي فوق دا من يوم ما عرفته وهو بينام يقوم يحلم بيك، يا حرام فاكرا إن دراستك هي اللي مانعاك عنه وبيدورك على حجج في كل دقيقة بتعدي من غير ما تكلمه تسأل عليه.. فا ياريت بعد إذن سيادتكم لو عندك ريحة الدم تبطل تشتغل الراجل الطيب اللي بيموت فوق دا وتاخذ بعضك وتمشي.

بات الاندهاش على تعابير وجه علي من لهجتها الهجومية، لم يتقبل عقله استيعاب اسلوبها في الحديث فقال:

- بس بس بس.. انتي مجنونة ولا حد ضاربك على دماغك ولا إيه؟
انتى مين أصلا عشان تكلميني كدا؟

- اعتبرني مجنونة.. لو عايز فلوس اطلع خد اللي انت عايزه وامشي..
إنما جو الحنين إلى الأب والأفلام الهندي اللي جاي تعملها على أبوك دي لو دخلت عليه فامش هتدخل عليا.. أنا عارفة كويس إنه مش فارق معاك بنكلة وإنك جاي تورثه وتمشي.. لكن تبقى عبيط لوجه في بالك

اللحظة إنك هتتعرف تضحك عليه وتخليه يموت وهو فاكرك الابن الوفي طول ما أنا موجودة.

- خلصتي؟

ربعت نعم ذراعيها ونظرت إليه بتحدي فقال:

- احنا مبنشغلش مجانيين عندنا.. اعتبري نفسك مرفودة من بكرة.

ألقت نعم بسيجارتها علي الفور ثم التفت بظهرها عائدة من حيث أتت وابتسم علي ابتسامة انتصار، مرت لحظات معدودة حتى عادت مرة أخرى بخطى تحمل ذات الإيقاع التي تحمله لهجتها الهجومية وقالت:

- انت فاكر نفسك مين! لو فاكر إن البيت دا بيتك تبقى غلطان! البيت دا بيتنا احنا وانت اللي ضيف علينا.. مش بعد كل السنين دي هيجي عيل زيك يمشي كلمته عليا هنا انت فاهم!

كانت كلماتها كالقذائف التي أطلقت على وجه الأخير لتعبت بتعابيره وتؤرجحها ما بين الاندهاش والغضب، لم تعطه حتى فرصة الرد حيث عادت مرة أخرى من حيث أتت بعدما ركلت في طريقها أحد كراسي الحديقة تعبيراً عن البركان الذي يشتعل بداخلها.

الأحد ١٧ يوليو ٢٠١٦

الساعة الثانية عشر ظهراً بتوقيت الإمارات.

أنهى علي تدريبه الأول في قسم الحسابات تحت إشراف خاص من العم كمال الذي استثناه عن بقية المتدربين وعين له مكتبا خاصا من مكاتب قدامى الموظفين على اعتبار الأفضلية التي يملكها عن بقية المتدربين والمنصب الذي يستعد لأخذه في المستقبل القريب، كان يعامل باحترام بالغ من جميع الموظفين بعد أن علموا عن طريق إحدى هفوات العم كمال أن هذا الشاب البوهيمي ذو اللحية الطويلة وربطة العنق غير المحكمة ربما تكون له اليد العليا في حياتهم مستقبلا، نظرات حاقدة من الجميع تصطبح معها ابتسامات مزيفة ومجاملات كاذبة.. كان هذا ما لم يحبه علي خصوصا وأن أغلبهم يكبرونه عمرا وخبرة، قرر عزل نفسه عن تلك الأجواء فطلب من عامل البوفيه إحضار فنجان من القهوة وذهب لينتظرها على مكتبه الجديد، مكتب من الطراز الملكي ذو مساحة يرمح فيها الخيل ومقاعد مغطاة بالجلد الطبيعي، لم يهتم علي كثيرا لتلك المظاهر بقدر اهتمامه لبرواز صغير على طاولة المكتب يحمل صورة لامرأة ثلاثينية لا يتذكر رؤيتها من قبل.

- القهوة دي داخله لمين يا عم حسين؟

- دي داخله للأستاذ علي.

- طب هات هدخلهاله أنا.

كان هذا الحوار القصير الذي سمعه علي يدور خلف باب المكتب ما بين العم كمال وعامل البوفيه قبل أن يطرق العم كمال باب المكتب ويدخل حاملا معه القهوة.

- أتمنى يكون المكتب عجبك يا علي يا بني.

وضع العم كمال فنجان القهوة على الطاولة بينما أجابه علي مبتسما:

- تسلم إيدك.. المكتب حلو بس مكانش له لزوم دلوقتي يا عم كمال..
مش لما أشتغل الأول؟

- يا سيدي متستعجلش الشغل جاي جاي يعني هيروح فين.. كلها أسبوع ولا اتنين وتخلص التدريب وتتعين رسمي، لولا إن أبوك هو اللي طلب مني تنزل تدريب الأول عشان الموظفين مياكلوش وشنا كان زمني قاعد معاك دلوقتي بباركلك على مكتب مدير الحسابات فوق.

ضحك علي قائلا:

- مش للدرجادي يعني يا عم كمال دي كدا تبقى كوسة رسمي.. على الأقل راعوا شعور الشباب الغلبان اللي قاعد برة دا.

- الحكاية مش كدا يا بني والله.. كل الحكاية إن أنا وأبوك عجزنا ومبقيناش ضامنين نعيش لبكرة.. ولو حصلنا حاجة انت هتلاقي نفسك معكوك في الهايلامان دا كله لوحذك.. فا لازم على الأقل تاخذ كرسي كبير من دلوقتي عشان تعرف الإدارة بتمشي ازاى وأبوك يبقى مطمئن على الشركة اللي ضيع عمره بيبنى فيها.

- متقولش كدا بس يا عم كمال بعد الشر عليكوا.. وبعدين هو مين ضامن يعيش أبكرة يعني يا راجل يا طيب.. سببها على الله.

- ونعم بالله يابني.. المهم أنا عايزك في موضوع..

- موضوع إيه؟

- نعم حكنتي على اللي حصل بينكم ليلة امبارح.. وبصراحة زعلتني منك يا علي.

- يا عم كمال دي بت مجنونة.. كنت قاعد في حالي لقيتها جاية ترمي بلاها عليا وتقولي مش عارف إيه اشمعنى جاي دلوقتي وتلقح بكلام عيبط.. انت أكثر واحد عارف إني مجتش عشان فلوس ولا نيلة وإني مكنتش ملهوف على السفر ولا مستعجل لحد ما انت بنفسك كلمتني وقولتلي إن أبويا بيموت، ساعتها سببت كل حاجة ورايا وكنت عندكوا ثاني يوم الصبح.

- يابني هو انت محتاج تقولي أنا الكلام دا ما أنا عارف.. وعارف كمان إن جدك الله يرحمه كان سايبلك فلوس كويسة تعيشك مرتاح في مصر، بس برضه البت غلبانة ومكانتش تستاهل منك تقولها نرفدك وشغالة عندنا والكلمتين اللي ملهمش لازمة دول.

- يا عم كمال انت عارف إني مش كدا وإن دي مش أخلاقي ولا طريقتي في التعامل مع الناس.. بس حط نفسك مكاني، واحدة متعرفهاش ولا تعرفها أصل ولا فصل تدخل عليك بليل تتهمك إنك جاي تسرق أبوك وتورثه وتمشي ونزقك فيك زي المجانين.. عايزني أطبب عليها ولا أسببها تهزقني وتمشي؟

- معلش يابني معلش حقا عليا .. هي بس عشان لسه متعرفكش ولا تعرف الحكاية من أولها، بس أنا من ناحيتي بأكدك يابني إن البت دي بنت ناس وغلبانة.. وأقسمك بالله إن لولاها كان زمان أبوك اتبهدل، هي بس طاقة شوية ولسانها فالت.

- على نفسها يا عم كمال الله يرضى عليك مش عليا.. عموما أنا ولا كنت عايزكوا ترفدوها ولا بتاع.. هي بس حرقتلي دمي وكنت عايز أردلها حرقه الدم مش أكثر.. ربنا ما يجعلنا من قطاعين الأرزاق.

- يسلم فمك يا أبو قلب نضيف.. أيوة كدا يا واد.. هو دا علي اللي أنا أعرفه وشيلته علي كتافي وهو صغير.

ضحك علي قائلا:

- تاني هتقولي شيلتك على كتافي يا عم كمال؟ خلاص يا عم كمال ارفدوها.

بادلته العم كمال الضحك ثم قال:

- ومعلش يابني أنا ليا عندك طلب تاني.

- إيه تاني؟

- أنا عايزك تقعد معاها وتطيب خاطرها بكلمتين.. البت يا ولداه مقهورة ومتحسرة من امبارح إن بعد العمر دا كله تسمع الكلمتين دول.

قاطع علي حديثه منفعلا:

- لا لا لا .. أقعد مع مين يا عم كمال وأطيب خاطر مين؟ دا هي اللي تيجي تعتذر على البلاعة اللي فتحتها عليا امبارح دي.

- يابني اسمعني بس.. ماهو برضه مينفعش تبقوا قاعدين مع بعض في بيت واحد وشكوا في وش بعض والنفوس مش صافية، وبعدين ما قولتلك إنها متعرفش حكايتك انت وأبوك من الأول.

- ولما هي متعرفهاش بتروح ترمي تهم على الناس بالباطل ليه يا عم كمال؟

- يابني معذورة حط نفسك مكانها.. البت من يوم ما شافت أبوك مسمعتش عنك لدرجة إنها سألتني قبل كدا إذا كنت متبري منه.. متعرفش حاجة عن الاتفاق اللي دار بين أبوك وجدك زمان ولا تعرف إنك متوعاش على أبوك من وانت عيل في ابتدائي.

- حتى لو.. وهي مالها أصلا أنا جاي أورث ولا أنتيل.. يشغلها في إيه؟

- لأ في دي اسمحلي يابني أقولك انت غلطان.. نعم بقالها بيجي عشر سنين سايبة دنيتها ومفيش وراها حاجة غير أبوك وخدمته لحد ما بقينا نعتبرها واحدة مننا وأبوك بقى يعتبرها بنته اللي مخلفهاش، حتى الجواز كبرت وهي مستغنية عنه عشان هيبيدها عن أبوك.. فا طبعي دلوقتي تبقى خايفة على مصالحته وتهب في أي حد تحس بس إن نيته مش صافية من نحيته.

هدأ علي بعض الشيء ورضخ لكلمات العم كمال قائلا:

- ماشي يا عم كمال هبقى أقعد معاها بس بعدين مش دلوقتي.. المهم صحيح أنا عايز أسألك على حاجة.

- اتفضل يا بني.

- هي مين الست اللي صورتها في البرواز دي؟

صمت العم كمال للحظات ظهرت فيها ملامح التعجب على وجهه فسأل علي:

- إيه يا عم كمال مالك؟

ضحك العم كمال قائلاً:

- انت بتهزر صح؟

- لا مش بهزر والله.. مين دي؟

- دي والدتك الله يرحمها يا بني!

لم يتعجب علي كثيراً من إجابة العم كمال مدركاً أنه لم يرها بالفعل منذ أن كان طفلاً حتى ضاعت ملامحها من ذاكرته، شعر بالخجل الشديد من نفسه في تلك اللحظة فقرر ألا يعترف للعم كمال بذلك:

- اه.. ما أنا بهزر.

ضحك ضحكة مزيفة حتى يقنع الآخر بأنها كانت مجرد مزحة ولكنها قوبلت بالتصديق من العم كمال الذي عادت الابتسامة إلى وجهه قائلاً:

- أبوك وصاني أحطلك الصورة دي على مكتبك عشان تفضل فاكرها على طول.. وعشان كمان تبقى عارف إنه محبش واحدة تانية من بعدها.. الله يرحمها.

أنهى علي حديثه مع العم كمال ثم طلب منه الإذن ليعود إلى المنزل ويأخذ قسطاً من الراحة، وافق العم كمال على الفور مؤكداً له أنه قد أنهى أول أيامه التدريبية وأن بإمكانه الرحيل وقتما يشاء، خرج من الشركة بخطوات سريعة ثم استقل إحدى سيارات الأجرة وعاد إلى المنزل في تمام الثانية ظهراً، بدأ بخلع ملابسه بداية من طريقه إلى غرفة النوم متجاهلاً أن يراه أحد الخادمين ثم وصل إلى غرفة النوم ليلقي بجثته على الفراش ويذهب لموعد مع أحلامه الفنتازية.

استيقظ علي في تمام التاسعة والنصف مساءً، ترك فراشه ثم خرج من الغرفة ماضياً بخطوات غير متزنة نحو الطابق السفلي، لم يلتق في طريقه بأي من سكان المنزل مما جعله يظن أن الوقت قد تأخر وأن الجميع نائمون، وصل للطابق السفلي ليلحظ وجود كمية هائلة من بقايا الطعام على طاولة العشاء وكأن حفل عشاء كبير قد انتهى للتو قبل مجيئه.. لم يبد الكثير من الاهتمام وخرج ليجلس بالحديقة حيث مكانه المفضل منذ أن جاء، وقف للحظة وتردد حيث وجد نغم جالسة بذات قبلته تنفخ سيجارة على مقعد مطل على حمام السباحة، هدأ من سرعة أقدامه ثم أكمل خطواته حتى اقترب منها، شعرت به أت من خلفها فالتفتت سريعاً ورأته، لم تتردد للحظة حتى تركت مقعدها مغادرة إلى الداخل بخطوات سريعة لتتجنب الحديث معه.

- أنسة نغم! استني بس.

توقفت نغم وعادت لتجيب ندائه بغير إرادتها:

- نعم؟

- أنا كنت عايز أسألك بس.. هو احنا كان عندنا ضيوف؟

- أيوة، محمود بيه كان عازم ناس على العشاء.

- ناس مين؟

- ناس من الشغل.. أي اسئلة تاني؟

قالت تلك الكلمات ثم أسرع في العودة مرة أخرى فشدها علي من
يماها قائلاً:

- استني بس انتي مستعجلة كدا ليه.. بصي أنا بصراحة عايز أتكلم
معاكي شوية، ممكن؟

- ميتهياأليش إن في أي كلام ممكن يدور بيني وبين حضرتك.

- حضرتي إيه بس.. أنا آسف، عارف إن الأسف مش هيعوضك عن
الكلام السم اللي قولته امبارح بس حطي نفسك مكاني.. واحدة معرفهاش
داخلة عليا بليل تزعق فيا وتتهمني إني جاي أسرق أبويا وأمشي.. كنتي
عايزاني أقولك إيه يعني؟

نظرت نغم إلى الأسفل في بداية رضوخ لاعتذاره فأكمل حديثه قائلاً:

- ولعلمك انتي كمان المفروض تعتذريلي.

- نعم؟!!

- أيوة.. انتي جيتي لحد عندي اتهمتيني وانتي متعرفيش حاجة، فا
المفروض إني زي ما اعتذرتلك تعتذريلي.. صح ولا أنا غلطان؟

- وهو مين قالك إني غيرت رأيي أصلا عشان أعتذر؟

- ما انتي هتغيريه.

- دا على أساس إيه يعني؟

- على أساس إني مش عايز أتخانق تاني ومعديش استعداد أعيش في بيت واحد مع واحدة شايفاني كدا، فا سيادتك بعد إذنك هتتفضلي تقدي وهفهمك كل حاجة من الأول وبعدها انتي حرة تشوفي الأمور زي ما انتي عايزة.. ممكن؟

- أنا معديش وقت لشغل العيال دا.. حضرتك ممكن تعتبر إن محصلش حاجة ومفيش داعي ولا تفهمني ولا أفهمك.

- إيه دا هو عم كمال مقالكيش ولا إيه؟

- مقالكيش إيه بظبط؟

- مقالكيش إني في خلال كام يوم هبقى من رؤسائك في الشغل والمفروض تسمعي كلامي؟ اتفضلي اقدي.

جلست وعلى وجهها ابتسامة سخرية تخفي وراءها إعجابا بتقته، ذهب ليحضر مقعدا آخرًا ثم عاد وجلس بجانبها:

- بصي بقي.. قبل أي حاجة عايزك تفهمي إني مكنتش حابب أتكلم في الموضوع دا وإن السبب الوحيد اللي هيخليني أتكلم فيه هو إني مش عايز أقضي الفترة اللي قاعدها هنا في وسط نفسيات وناس شايفاني غلط.. أنا مش متعود على كدا ومبعرفش أعيش بالطريقة دي.. كفاية عليا الهبل اللي حصل النهاردة في الشركة.. أنا جيت هنا عشان أعمل اللي ديني بيؤمرني بيه وأود أبويا في الكام سنة اللي فاضلينه قبل ما

يموت.. يعني مش عشان أورثه بالحياة ولا عشان ألاقى شغلانة عالجاهز زي ما انتي فاكدة.. وبمناسبة أبويا صحيح، اللي متعرفيهوش إن أبويا اللي انتي مستقتلة عليه دا راميني وميعرفش عني حاجة من وأنا عندي ٧ سنين ويمكن من قبلها بشوية كمان.

قاطعت نغم حديثه قائلة:

- أولاً أنا مش مستقتلة على حد وخلي بالك من أفاظك وانت بتتكلم معايا.. ثانيا مين قالك إنى مش عارفة؟ محمود بيه حكالي على كل حاجة.. حكالي إنكوا مبتتكلموش غير كل فين وفين وإنكوا متعرفوش عن بعض حاجة من سنين، وهي دي المشكلة.. بتقول إنه راميك من وانت عيل صغير مع إنك لو عكستها وجيت تفكر من ناحية ثانية هتلاقي إن انت اللي راميه وإن هو اللي كبر ومحتاجك جنبه مش العكس.. ساعتها مش هتلاقي أي سبب واحد يفسر وجودك هنا ودلوقتي بالذات غير اللي أنا قولته امبارح واللي انت دلوقتي عايزني أعتذر عنه.

- طيب بما إنه حالك بقى.. يا ترى حالك كمان الحكاية بدأت ازاي؟

- مش فاهمة.

- يعني تفتكري بذكائك إن عيل عنده ٧ سنين هيقدر من دماغه إنه يسيب أبوه ويقضي بقية حياته لوحده؟

ممكن تفهمني عايز تقول إيه وبلاش الطريقة دي؟

- أنا مش عايز أقول حاجة.. أنا بس عايز أفهمك إن الأمور مش زي ما انتي فاهمة، مش بقول إن أبويا وحش ولا بحاول أحسرك على عمر ضيعتية جنب راجل ميستاهاش، لا بالعكس أبويا راجل طيب.. بس

أصل الحكاية مش لازم يبقى فيها ملاك وشيطان، مش لازم يبقى فينا واحد بيدوس على رقبة الثاني طول القصة والثاني كل اللي عليه إنه بيقوم يصلي ركعتين ويتحسبن، مش لازم كل واحد فينا يكون محجوز باسمه مكان في الجنة أو في النار من أول اليوم لحد آخره.. كلنا جوانا الحلو والوحش، حتى أبسط المواقف بين أي اتنين صعب يبقى فيها واحد منهم على حق بنسبة ١٠٠%.. يمكن الميزان بيننا مش معدول بس فرق الحمولة مش كبير أوي كدا.. احنا مش في فيلم أبيض وأسود.

تاهت نغم في رحلة لاستيعاب كلماته، تبدلت نظرتها من نظرة اتهام مثبتة في أعين الأخير لنظرة تجمع بين الحيرة والافتناع نحو اللا شيء.. أكمل علي حديثه قائلاً:

- أنا كدا قولت اللي عندي وانتي حرة تعملي اللي يريحك.. أتمنى تقبلي أسفي وأوعدك إن من هنا ورايح لو حصل أي تعامل بيننا هعتبرك أختي الكبيرة.. بعد إذنك.

غادر علي وتركها حائرة بين أفكارها والأسئلة التي تتراكم في رأسها واحدا تلو الآخر، فهل هذا الشاب على حق أم هذه إحدى الأعيه التي نجح أن ينال بها رضا الوالد مجددا؟ فإن كان على حق.. كيف يتوجب علي أن أعتذر له؟ وإن كان يكذب فكيف أكشف كذبه أمام الجميع؟ والأهم من ذلك.. كيف يجب علي أن أعرف إن كان صادقاً أو كاذباً من الأساس؟ كان ذلك أهم ما جاء في ذهنها من أسئلة تعجيزية في ذلك الحين، بعد تفكير طويل لم تعرف للحقيقة إلا سبيل واحد.. "علي".

الاثنين ١٨ يوليو ٢٠١٦

الساعة السادسة صباحا بتوقيت الإمارات.

استيقظ علي مبكرا على صوت ضجيج آت من الطابق السفلي، ترك فراشه وذهب ليتفقد ما يحدث بالأسفل حتى نسي أن يرتدي قميصه، وصل للطابق السفلي ليجد والده يمضي بنشاط نحو الحديقة ومع العديد من أطباق الطعام.

- علي.. حماتك بتحكك، كنت لسه هطلع أصحيك.

- انت بتعمل إيه يا بابا؟

- هكون بعمل إيه يعني؟ عمك كمال مجاش النهاردة والشغالين واخدين أجازة فا قولت أقوم أحضر الفطار بنفسي.

- بس كدا غلط يا بابا انت المفروض تترتاح قبل الشغل.. كنت صحيني وأنا أقوم أعملك اللي انت عايزه.

- ولا غلط ولا بتاع بس تعالى ساعدني نخط الاطباق.

مضى كلاهما نحو طاولة الإفطار بالحديقة محملين بأطباق الطعام حتى أتموا تحضير المائدة، جلس الوالد وبدأ بتناول طعامه بينما مد علي يده وسحب سيجارة من علبة والده الملقاة على الطاولة ووقف يدخنها على بعد أمتار قليلة فنظر إليه الأخير بتعجب وقال:

- إيه يابني مش هتفطر؟

- مش جعان.. كل انت بالهنا والشفاء.

- لا مينفعش.. سيب البناعة اللي في إيدك دي وتعالى افطر معايا.. هو أنا عامل الأكل دا كله لأمي الله يرحمها؟
- مليش نفس والله يا بابا.. معلش كل انت وأنا هبقى أكل أي حاجة في السريع قبل ما نروح الشغل.

رضخ محمود لرغبة ولده العنيد قائلا:

- ماشي.. على راحتك.
- هو صحيح يا بابا مين اللي كان عندنا امبارح؟
- لا متشغلش بالك.. دا واحد صاحبي ومراته كانوا مسافرين ورجعوا فا قولت أعزمهم على العشاء.
- غريبة.
- هو إيه اللي غريب بالظبط؟
- لا ولا حاجة.
- إنما قولي انت صحيح.. شوفتك امبارح من شباك الأوضة وانت قاعد مع نغم هنا بتتكلموا، كنتوا بتتكلموا في إيه؟
- لا دي كانت بتسألني عن رأيي في الشغل وكدا بس.
- اه.. بس كان شكلكوا زي ما تكونوا بتتخانقوا يعني.
- لا طبعا يا بابا.. نتخانق ليه يعني هو أنا أعرفها؟

- واد انت.. انت عارف إنني أكثر واحد أتمنالك الخير في الدنيا دي وإن أنا أول واحد جيت كلمتك عنها، بس اوعى أعرف في يوم من الأيام ولو بالصدفة إنك زعلتها.. انت متعرفش نغم دي عند أبوك تساوي إيه.

- للدرجادي؟

- وأكثر كمان.. انت لو تعرف البننت دي شافت إيه وعملت إيه مع أبوك عمرك ما هتفكر ولو للحظة إنك تيجي عليها.

- ليه يعني؟

- البننت دي جاتلي من يبجي عشر سنين كدا تقدم على شغل في الشركة وهي يا حبة عيني مكملتش لسه ٢٠ سنة، مكانش معاها بقى ولا شهادات ولا مؤهلات ولا بتاع.. كل اللي عرفته عنها إنها مصرية وعازية أي شغلانة حتى لو هتغسل أطباق، ساعتها يابني بيني وبينك دورتها في دماغي وقولت إيه اللي هيجيب بت في السن دا هنا تتلطم كدا وتدور على شغل في كل حنة إلا لو كانت محتاجة.. قولت لعمك كمال يدخلهالي المكتب وفضلنا نتكلم معاها لحد ما عرفنا حكايتها من طأطأ لسلام عليكم، طلعت بنت ناس وجاية من مصر هربانة على هنا عشان تدور على شغل وتشيل نفسها، أبوها مات وهي صغيرة وأمها راحت اتجوزت راجل مفتري وخلفت منه عيال جاحدة متخيرش عنه.. بعدها ماتت هي روخرة وسابتها تتبهدل من جوزها وعياله، استغلوا إن مبقالهاش ضرر وخدوا منها كل اللي حيلتها وبرطعوا في شقتها لحد ما طفشوها ووصلوها إنها تسبب تعليمها ودنيتها في مصر وتيجي على هنا تتحوج للي يسوى واللي ميسواش.. بس يا سيدي، فا البنت صعبت عليا وشغلتها عندي في الأول ممرضة تديني الحقن وتظبطلي مواعيد

الأدوية والكلام دا كله.. مع الوقت لقيتها لهلوبة وبتعرف إنجليزي كويس فا سألتها وعرفت إنها كانت في جامعة خاصة قبل ما تيجي، شوية شوية ولقيتها بدأت تذاكر وتأخذ شهادات من عالنت تعوض بيهم اللي فاتها في التعليم، فا قولت البت ييجي منها وعينتها سكرتيرتي في الشغل، ومن ساعتها وهي عايشة معانا هنا بتأخذ بالها من صحتي وفي الشركة بتأخذ بالها من الشغل لحد ما بقيت أعتبرها زي بنتي، لما لقيتها كبرت ووقت في سن جواز حاولت أقنعها تروح تشوف دنيتها وتتجوز بس كنت كل ما أفاتها في الموضوع دا تضايق وتحلف يمين إنها مش هتسيبني مهما حصل.. عرفت بقى ليه نغم تساوي عندي كثير؟

ابتسم علي ثم قال:

- ياه.. عموما متقلقش، نغم زي أختي وهشيلها في عيني.. بس زي أختي ها؟.. مش حاجة تانية.

- ماشي ياخويا.

- المهم صحيح أنا عايز أسألك عن حاجة

- اسأل.

- متعرفش مكان أشترى منه كمانجة هنا؟

- نعم؟

الفصل الرابع

١٦ شهر

" الوقت .. الوقت هو أهم حاجة في الدنيا، يمكن اللي بيتكلم دا يكون أكثر واحد ضيع وقت من عمره، لكن لما بتخسر حاجات كثير كنت تستحق تاخدها من الدنيا لمجرد إنك غفلت عن حركة عقارب الساعة بتعرف غصب عنك قيمة الوقت، ولما بتعرف قيمة الوقت بجد بيبقى عندك استعداد تضحى بحاجات كثير بتحبها في سبيل إنك متأخرش تاني.. النهاردة ١١ نوفمبر ٢٠١٧، أيوة أنا هنا بقالي ١٦ شهر تقريبا.. آخر تسجيل سجلته كان بتاريخ ١٦ يوليو السنة اللي فاتت.. لسه فاكر اليوم دا كويس، كان تاني يوم ليا هنا.. عم كمال خدني يفرجني على البلد بالنهار ورجعت البيت بليل هلكان وعايز أنام.. دوست على نفسي شوية عشان أقعد أسجل اللي حصل في اليوم وأول ما خلصت تسجيل لقيت نغم داخله عليا بز عاببيها واتخانقنا، مش عارف ليه مسجلتش حاجة من ساعتها.. يمكن عشان مكانش عندي وقت؟ أو يمكن محصلش من ساعتها حاجة تستحق إنها تتحكي.. اللي حصل باختصار إنني اتعينت في الحسابات وشربت صنعة الشغل زي ما بيقلوا، اتصالحت مع نغم ومع الوقت بقت صاحبتى وأقرب حد ليا هنا، أبويا عجز أكثر وصحته اندهورت وبرغم كدا لسه ببعند ومش عايز يروح لدكتور.. وعم كمال ما شاء الله لسه زي ما هو بيقوم من نومه الفجر يقلي فول وفلافل وييجي يصدعني بقصة كفاحه هو وأبويا طول النهار.. الحياة علمتني قيمة الوقت، من ساعة ما بصحى لحد ما بنام مبلحقتش أقعد مع نفسي ١٠ دقائق على بعض.. مقدرش أقول إن الحياة دي وحشة على فكرة بالعكس.. الحياة دي بتلهيني عن أفكار سوداوية كثير ممكن تستفرد بيا لو قعدت مع نفسي، بتنسيني ناس كثير وحشوني وعايز أشوفهم، لكن للأسف بتنسيني نفسي معاهم.. في وسط زحمة حياة زي اللي أنا عايشها بيبقى صعب على أي بني آدم إنه يفضل محافظ على نفسه وشايل جواه الحاجات اللي بيحبها، غصب عنك بتتحول مع الوقت لآلة بتصحى من

النوم تنفذ المطلوب منها وترجع تنام تاني.. خصوصا لما تبقى واحد زيي مبتعرفش تكون صداقات ولا تنظم وقتك، أنا حتى دلوقتي متأخر ولازم أقوم ألبس عشان أنزل آخد أبويا ونروح الشغل، مش عارف التسجيل الجاي هيكون امتي وهحكي فيه عن إيه.. ومين عارف؟ يمكن مع الوقت أنسى إني كنت بسجل مذكراتي ومايكونش في تسجيل جاي أساسا"

في تمام التاسعة صباحا كان قد انتهى علي من ارتداء ملابس استعدادا للذهاب للشركة بعد أن قام بتسجيل أحدث فصول مذكراته، خرج من غرفته ماضيا نحو الطابق السفلي بخطوات سريعة حيث أدرك تخلفه عن موعد العمل، عند وصوله للطابق السفلي تفاجأ بنغم جالسة ببذلة العمل تتناول وجبة فطور وأمامها جهاز "لاب توب" حيث لا يعتاد على تواجدها في أرجاء المنزل في ذلك الحين.

- مش ناوية تبطلي حش بقى؟

- إخص عليك.. مستكتر على نغومة ساندويتشين بيض بالبسطرمة؟

- لا يا ستي بالهنا والشفاء.. إيه اللي مقعدك هنا دلوقتي؟ مش المفروض تبقي في الشركة؟

- ما صدقت عمو كمال راح بدري النهاردة وفتح للموظفين فا قولت أنالمي ساعة زيادة وأصحى أفطر كدا وأروق دماغى زي البنى آدمين.

- طب يلا سيبي اللي في إيدك دا وقومي أما نروح الشركة بدل ما عمو كمال بتاعك يفشخنا.

- مش هتفطر طيب؟

- لا هبقى أفطر هناك.

قامت نغم لتلحق به مسرعة وقالت:

- بقولك إيه خليك جدع وخذني على طريقك بقى أحسن مفياش حيل
أسوق النهاردة خالص.

- أو مال السواق فين؟

- راح مع محمود بيه الشركة من بدري.. متخافش هبقى بنت مؤدبة
ومش هعمل دوشة والله.

- ماشي يا ستي أمري لله.

صعد علي إلى مقعد السائق بينما اتخذت نغم مكانًا على المقعد المجاور
له، مرت دقائق حتى خرجوا من حدود الفيلا واتخذوا طريقهم إلى
الشركة، قطع علي هدوء الرحلة بقوله:

- وانتي عم كمال وبابا كانو سايبينك معايا في البيت كدا لوحذك عادي؟
مش خايفين أتحمرش بيكي بخدوك دي؟

- تتحمرش بيا إيه يا عيل يا أبو شخة انت!!

- يا بنتي احترميني بقى دا أنا مديرك.

- مديري إيه انت صدقت نفسك انت كمان؟

رسم علي ملامح الحزن الطفولية على وجهه بسخرية سائلا:

- ليه يعني مشبهش؟

ابتسمت نغم ونظرت في عيناه ثم قالت:

- لا تشبهه طبعاً.. ماشي يا عم مديري مديري.

ابتسم علي لوهلة ثم قال:

- طب بقولك إيه ما تيجي نفكس شغل النهاردة وأخذك أعزمك على بليلة.. قفشتلك من كام يوم راجل سوري فاتح محل هنا بيعمل بليلة إنما إيه.. هترجعك مصر تاني.

- تصدق والله نفسي فيها بقالي كام يوم؟ طب ما تخلي الطلعة دي بعد الشغل أحسن؟

- خلاص اتفقنا.. على الله بس مسألش عم كمال عليكى بعد الشغل ويقول إنك روحتي تنامي زي كل مرة.

- لا لا متخافش.

مع دقة العاشرة إلا ربع وبعد أن تخلفوا عن موعد عملهم لقرابة الساعة وصل علي ونغم إلى الشركة ليجدوا العم كمال في انتظارهم وعلى وجهه ملامح انزعاج.

- دا كلام برضه يا ولاد؟ كل دا تأخير؟

- عادي يا عم كمال بقى ما احنا كل يوم بنيجي في مواعيدنا.. عديها المرادي معلش.

- يابني هي المشكلة فيا؟ المشكلة في أبوك اللي بقاله ساعة بيسألني عليكوا ومش عارف أقوله إيه.

- والله يا عمو أنا فضلت أقوله هنتأخر هنتأخر وهو قاعد بيفطر ولاطعني جنبه لحد ما الساعة بقت ٩.

نظر علي إلى نغم وعلى وجهه ابتسامة سخرية قانلا:

- لا والنبى؟ دا أنا برضه ها؟

- أيوة والله يا عمو.. وكمان قعد يقولي سيبك من الشغل وتعالى نروح ناكل بليلة.

- بليلة؟! بليلة إيه يابني؟

- خلاص بقى يا عم كمال عديها.

- طب يلا.. يلا اطلعوا على مكاتبكوا وشوفولكوا أي حجة تقولوها لمحمود لحسن والله لو سمع الكلام الغريب اللي بتقولوه دا ليسود عيشتي قبلكم.

في تمام السادسة والنصف مساء كان قد أنهى علي عمله وذهب لينتظر
نغم في جراج الشركة حتى تتم على رحيل جميع الموظفين وتلحق به،
طال انتظاره بعض الشيء فأخرج من جيبه علبة سجائر وقام بإشعال
سيجارة، لحظات قليلة وسمع صوتاً أت من خلفه ينادي:

- يا بيه.. يا بيه.

التفت لمصدر الصوت ليجد رجلاً مسناً ذو وجه مغطى بالتجاعيد ولحية
بيضاء طويلة، يمكث على الأرض مرتدياً بدلة عمال نظافة الشركة.

- بتكلمني أنا؟

- وهو فيه غيرنا في المكان يا بيه؟

- أوامر.

- التدخين ممنوع هنا سعادتك.

- بس كدا؟

ألقى علي بسيجارته على الأرض ودهسها بقدمه ثم ابتعد بنظره عن
الرجل وأخرج هاتفه ليحاول الاتصال بنغم.

- هترجع.

التفت علي للرجل مرة أخرى عند سماعه تلك الكلمة وسأل بتعجب:

- نعم؟!!

- هترجع تاني.

- هرجع فين مش فاهم؟

- استحمل خيانة الشمس ١٧٣ مرة.. وهترجع يا علي.

صمت علي للحظات في محاولة لاستيعاب كلماته.. ماذا يقول ذلك العجوز المخرف؟ ماذا يعني بتلك الكلمات المبهمة؟ والأهم من ذلك.. كيف عرف اسمي؟ وصلت نغم وقطعت حبل أفكاره بقولها:

- معلش اتأخرت عليك.

- لالا.. ولا يهملك.

- طب إيه.. يلا بينا ولا غيرت رأيك؟

- لا غيرت رأيي إيه.. يلا بينا.

بعد قرابة النصف ساعة وصل الصديقين إلى عربة مطرفة تقدم بعض أنواع الأكلات المصرية والشامية، قضى علي الطريق يفكر في كلمات ذلك العجوز ويحاول تفسير معانيها بينما شعرت نغم أنه ليس على ما يرام فاعترضت تفكيره وسألت:

- علي انت كويس؟

- اه أنا تمام.

- أو مالك؟ من ساعة ما خلصنا شغل وانت تايه كدا ومش مركز.. في حاجة حصلت؟

- بقولك إيه هو انتي تعرفي الراجل اللي كنت واقف بتكلم معاه دا؟

- راجل مين؟
- الراجل العجوز دا اللي شغال في الجراج.
- لا مخدتش بالي منه.. بس اشمعنا يعني؟
- لا.. ولا حاجة.
- طب بقولك إيه أنا بصراحة عايزة أسألك سؤال كدا من زمان وكنت خايفة تقول إني بتطفل عليك.
- لا يا ستي أسألي.
- ابتسمت نغم لوهلة ثم سألت:
- فاكر يوم ما اتخانقنا؟
- أنهي خناقة فيهم يا روجي احنا اتخانقنا كتير؟
- الخناقة اللي اتخانقناها أول ما جيت.. لما كنت قاعد علي البيسين و...
- قاطعها علي قائل:
- أيوة أيوة فاكر.. مالها؟
- اليوم دا انت كنت قاعد بتسجل حاجة على الموبايل وأنا دخلت عليك.
- فا طبعا عايزة تعرفي كنت بسجل إيه مش كدا؟
- ابتسمت نغم ابتسامه خجل وقالت:

- لا أنا مش غبية أوي كدا.. كان باين إنك بتسجل مذكراتك.

- لا ما شاء الله عليكي سابقة سنك.. فا إيه بقى؟

ترددت نعم للحظة ثم قالت:

- عايزة أعرف إيه حكاية ليلى ومريم اللي كنت بتتكلم عنهم دول..
وكان في واحد كمان كدا بس مش فاكرة اسمه.

- اه طبعا ما انتي مش هتفتكري غير أسامي البنات بس.

قامت بلكمه لكمة واهنة في كنفه وقالت:

- بطل رخامة.

- كان اسمه خالد يا حبيبتى خالد.

- اااايوة خالد.

- دي حكاية طويلة أوي واحنا عندنا شغل الصبح.

امتعض وجهها ثم قالت:

- إيه دا يعني بعد كل دا مش هتحكيلي؟

- خلاص متقلبيش وشك كدا هحكيلك.. بس بشرط.

- اشرط.

- تلهي عمك كمال عني كام يوم كدا ونبي.

روى لها علي القصة بأكملها منذ أن عرف خالد حتى وصل للإمارات، لم تشعر نغم بمرور الوقت تلك الليلة حيث إنها ظلت تنصت له بهدوء تام ومتعة شديدة كطفلة تنصت لوالدتها بينما تقص عليها حكاية قبل النوم، رأت اليأس يسيطر على لغة جسده عندما تحدث عن نهاية علاقته بخالد، استشعرت الحزن في نبرة صوته عندما حكى عن حبه لمريم.. ولحظت الشغف البارز في عيناه عندما جاء الحديث عن سحر ليلي، أرادت أن تقاطعه أكثر من مرة لتلومه على أشياء قد فعلها ولكنها فضلت التزام الصمت حيث إن إلقاء اللوم عليه الآن لن يغير فيما حدث شيئاً بل وإنه ربما يفقده ثقته التي نالها بصعوبة.

مرت قرابة الثلاث ساعات حتى انتهى علي من الحكى، نظر في ساعته ليجدها التاسعة والنصف مساءً فتفاجأ وقال:

- ياه.. دا الساعة بقت ٩ ونص.

نظرت الأخرى في ساعتها وعلقت:

- إيه دا أنا محستش بالوقت.

- يلا نروح.

لحظات من الهدوء التام في بداية طريقهم إلى العودة قاطعتها نغم ببنائها:

- علي.

التفت علي لها مجيباً:

- ممم؟

نظرت نغم في عينيه للحظة بتعاطف ثم قالت:

- أنا أسفة.

في تمام العاشرة والرابع مساء وصل علي برفقة نغم إلى المنزل، قضت نغم طيلة الطريق في محاولة لإخراج علي من الحالة المزاجية السيئة التي تسببت له فيها دون أن تعلم، حاولت أخراجه من تلك الحالة بالمزاح وإلقاء النكات السخيفة ومن ثم تشغيل موسيقى المهرجانات الشعبية على كاسيت السيارة حتى بدأ علي بالضحك والابتسام ليشعرها أنها قد نجحت وأن كل شيء قد أصبح على ما يرام.

عند وصولهم للمنزل تفاجأوا بالوالد جالس يحتسي القهوة في حديقة الفيلا، يرتدي نظارة قراءة وفي يده كتاب "معركة النهر" ل"وينستون تشرشل"، وبرغم أنها ليست من عادات محمود الشامي أن يبقى مستيقظا حتى ذلك الوقت من الليل ولكنه كان يبدو في غاية الاستمتاع والتمعن وكأنه لا يود أن يذهب للنوم.

- إيه يا ولاد اتأخرتوا كدا ليه؟ مش عندكو شغل الصبح؟

- معلش بقى يا بابا خرجنا نغير جو شوية بعد الشغل والوقت خدنا..
قولي انت إيه اللي مصحك لحد دلوقتي؟

- مفيش كنت زهقان فا قولت أطلع أشم هوا شوية وأقرالي كتاب ولا حاجة.

- حضرتك اتعشيت طيب ولا تحب أحضرك حاجة تاكلها؟

- أنا أكلت الحمد لله.. اطلعي نامي انتي يا نغم لو عايزة.

- طيب هطلع أنا كمان بقي.. تصبح على خير.

- لأ اقعدي يا علي عايزك.

- طيب تصبحوا على خير.

- وانتي من أهله يا حبيبتي.

ذهبت نغم ثم سألت علي والده بقلق:

- إيه يا بابا فيه حاجة ولا إيه؟

- اقعدي يا علي.

جلس علي بينما خلع الوالد نظارته ووضع الكتاب على الطاولة، ساد الهدوء لبضعة لحظات ثم نظر محمود إلى ولده وسأل مبتسما:

- عارف يا علي انت بتفكرني بمين؟

- بمين؟

- بتفكرني بأمك الله يرحمها.. كانت زيك كدا بظبط، تفضل كاتمة جواها الهم والزعل من ناحية أي حد مهما كان، مكانتش تحب أبدا تقول اللي جواها دغري ولا تخفف عن نفسها على حساب حد.. فضلت تكتم تكتم لحد ما ماتت من غير ما حد يسمعها صوت، كان نفسي تفضل عايشة لحد دلوقتي عشان أعوضها عن أيام البهدة اللي شافتها معايا زمان.

- الله يرحمها.. بس هو مين اللي قالك إني كاتم حاجة جوايا؟

صمت الوالد للحظات ثم أجاب:

- كل بني آدم مهما حاول يبجيله وقت ويبغلط يا علي.. لكن أسوأ حاجة ممكن تحصلك يا بني هي إنك متلاقيش فرصة تصلح فيها الغلط دا.

- مش فاهم قصدك؟

- قصدي إني عارفك كويس يا بني.. وعارف إنك لسه مش مسامحني على اللي عملته زمان.

قاطع علي والده قائلاً:

- يا بابا اللي حصل زمان دا أنا نسيته ورميته ورا ضهري وانت أكثر واحد عارف دا.. بدليل إني سببت دنيتي في مصر وجيت عشان أعيش معاك هنا وأكون تحت طوعك.

- مش معنى إنك جيت يا علي إنك رميت اللي حصل ورا ضهرك ونسيته زي ما بتقول.. أنا عارف يا بني إنك ياما احتاجتني جنبك وملقتنيش، عارف إني غلطت في حقك وحق والدتك الله يرحمها زمان.. ومش بعيد يا بني تكون عيشت عمرك كله وانت شايفني شيطان بقرون.. ودا حقك مقدرش أقول حاجة، عشان كدا عايزك تسامحني يا علي.. أبوك مبفاش فاضله في الدنيا كتير يا بني.. مش عايز أموت وابني الحيلة اللي فاضلي من ريحة أحلى ست في الدنيا زعلان مني.

- إيه يا بابا اللي بتقوله دا بس بعد الشر عليك.

- الموت عمره ما كان شر يا حبيبي.. الشر الحقيقي هو إني أموت وانت مش مسامحني.

- طب والله العظيم يا بابا أنا مسامحك ومش شايلك أي حاجة جوايا..
أقولك إيه تاني بقى عشان تصدقني؟

ابتسم الوالد ابتسامة سخرية ثم سأل:

- بجد يا علي؟

ترك علي كرسيه قائلاً:

- بابا.. أنا طالع أنام!

- خلاص ياخويا متتحمقش أوي كدا اقعد.

جلس علي مرة أخرى بينما قال والده:

- عموماً أنا كنت عايزك في موضوع تاني.

- موضوع إيه؟

- فاكر السنة اللي فاتت لما كنت عازم ناس على العشاء وسألتني عنهم
قولتلك إنه كان واحد صاحبي ومراته؟

- اه لما كنت بتحور عليا.. فاكر فاكر.

تبدلت تعابير وجه الوالد وارتفعت نبرة صوته بعض الشيء قائلاً:

- إيه يا ولد بتحور والكلام قليل الأدب اللي بتقوله دا.. عيب أنا مش
بلعب معاك في الشارع!

- يعني هو أنا اللي لسه بلعب في الشارع أصلاً؟ انجز يا بابا!

- لا إله إلا الله.. اليوم دا أنا كنت فعلا عازم ناس على العشاء، بس كنت عازم المحامين بتوعي.

قاطع حديثه علي سائلا:

- إيه دا عازم المحامين بتوعك ليه مش فاهم؟

- ما انت لو تسيبني أكمل كلام!

- أسف يا بابا اتفضل.

- في اليوم دا أنا كتبت تلت أملاكي باسم نغم.. عارف إن في الشرع والقانون كل فلوسي وأملاكي من حقك انت لوحدك، بس أنا يابني مش هسمح لشرع ولا لقانون إنهم يرموا البننت دي في الشارع تاني.. أنا عارف إنك حنين وقلبك طيب يا علي ومش هتزعل إني عملت كدا.. وعشان كدا مترددت لحظة إني أقولك كدا على حياة عيني.

- ولو عايز تكتبلها كل أملاكك كمان يا بابا اعمل كدا، دي فلوسك وانت حر فيها، وبصراحة نغم مش خسارة فيها أي حاجة.. بس لو تسمجلي أنا عايز أسألك سؤال.

- اتفضل يا حبيبي.

- هو انت فاكر إني كنت هسيبها تترمي في الشارع تاني لو مكنتش عملت كدا؟

- بالعكس يابني.. أنا عارف إنك جدع ومعدنك راجل وإن عمرك ما كنت هتسيبها تتبهدل أبدا، بس وقتها يابني كان باين إنكم مش طابقين بعض وكنت خايف تفهمها غلط ومتديهاش حقها لو حصلي حاجة،

وعلى فكرة هي متعرفش أي حاجة عن الموضوع دا.. نغم شالنتي كثير
يابني، ومش عايزها بعد ما أموت تتلطم وترجع تتحوج تاني للي يسوى
واللي ميسواش.

- عموما أنا مش عايزك تقلق خالص يا حاج.. نغم في عنيا الاتنين ولو
احتاجت أكثر من اللي انت كتبتة باسمها كمان هديها كل اللي هي
عايزاه، انت بس سيبك من الموت والأملاك والكلام الفاضي دا
دلوقتي.. ربنا يخليك لينا.

ارتسمت البسمة على وجه محمود الشامي، فقد شعر أخيرا أنه يحصد
بذرة صالحة زرعتها في دنياه، حتى وإن أهملها لسنوات طويلة.

- ألف حمد وشكر ليك يارب.. ياه يا علي، لو قعدت أوصفك من
النهاردة للسنة الجاية انت فرحت أبوك وريحته قد إيه مش هعرف
أوفيك حقك.. أنا كدا ممكن أموت وأنا مرتاح.

- يا حاج ما قولنا بلاش سيرة الموت دي بقى الله! وبعدين ما انت لسه
شباب وصحتك زي الفل أهو ما شاء الله.

- الحمد لله.. بس إيه حكاية حاج اللي عمال تقولها دي يابني؟

- إيه دا انت محجتش قبل كدا؟

- لا.

- لا يا راجل؟!.. محجتش قبل كدا؟

ابتسم الوالد ثم هز رأسه مجيبا بالسلب:

- يا راجل.. يا راجل يعني فيلا وطقم عربيات وحراسة ومش عارف
تروح مشوار ساعتين بالطيارة؟

تبادل كلاهما الضحك لبضعة ثوان ثم قال الوالد مبتسما:

- اطلع نام يااض.

ترك علي كرسيه مبتسما وذهب لينام فناده الوالد مجددا:

- علي.. في رقبتهك ها.

- في عنيا.. تصبح على خير.

- وانت من أهله.

الأحد ١٢ نوفمبر ٢٠١٧

الساعة السابعة صباحا بتوقيت الإمارات.

استيقظ علي على رنين جرس هاتفه، تردد للحظات عندما وجد المتصل رقما غريبا ولكن توقيت الاتصال دفعه للرد حيث انتابه القلق.

- ألو مستر علي؟

- أيوة مين معايا؟

- أنا علاء موظف الأتش أر في الشركة... حضرتك فاكرنى؟

- أيوة يا علاء فاكرك.. خير في حاجة؟

- آسف لو صحيت حضرتك من النوم بس أنا وباقي الموظفين واقفين عند باب الشركة بقالنا بييجي نص ساعة ومحدث جه يفتحلنا.

- طب مجربتش تكلم أنسة نغم أو مستر كمال؟

- حاولنا نكلمهم أكثر من ١٠٠ مرة والله يا مستر علي، أنسة نغم مش بترد ومستر كمال موبايله مقفول.. حتى مستر محمود نفسه حاولنا نوصله لكن موبايله خارج نطاق الخدمة.

- غريبة.. طيب اديني ٥ دقائق كدا يا علاء وهكلمك.

- أوكيه يا فندم في انتظار مكاملة حضرتك.

ترك علي فراشه ثم أسرع في ارتداء ملابسه وذهب للبحث عن والده ونغم في أنحاء المنزل، استغرقت رحلة بحثه قرابة العشر دقائق حتى

فشل في العثور على أيا منهم وعلى أي مخلوق بشري في المنزل، حتى أفراد الأمن والحراسة لم يجد لهم أثرا على البوابات، أخرج هاتفه وحاول الاتصال بكلا من والده والعم كمال ونغم ولكنه فشل تماما كما توقع.. لحظات من الحيرة قطعها رنين جرس هاتفه مرة أخرى.

- مستر علي أنا آسف على الإزعاج والله بس الموظفين كلهم واقفين فوق راسي وعابزين يعرفوا في شغل النهاردة ولا يروحوا؟

- خليم يروحوا يا علاء مفيش شغل النهاردة.. وروح انت كمان ارتاح.

- أوكيه تمام.. بس خير يا مستر علي هو في حاجة؟

- لا لا مفيش حاجة.. روحوا انتو بس.

- تمام يا مستر علي.. وآسف مرة ثانية لو أزعجت حضرتك.

- ولا يهملك.

سباق سرعة بطيء يشغل عقارب الساعة ويزداد معه قلق الأخير شيئا فشيئا، يحاول مرارا وتكرارا الاتصال بأي من أضلاع مثلث الاختفاء ولكن دون فائدة تذكر.. فيستكمل دورانه الحائر في أرجاء المنزل كطفل قد ضل السبيل إلى والدته.. بعد مرور قرابة الساعتين وعندما كان يحاول علي الاتصال بنغم للمرة العشرين التقطت أذنه صوت رنين جرس هاتفها أت من الطابق العلوي، صعد على الفور إلى الطابق العلوي وذهب يبحث عن مصدر الصوت حتى وصل إلى غرفة والده ليجد هاتفها مدفون بين ملاءات السرير وفي مقدمة شاشته المضيئة كتب

بالخط العريض "٣٥ مكالمة فائتة" حاول علي أن يتمالك أعصابه في ذلك الحين واكتفى بابتسامة سخرية تمادت إلى ضحكة عريضة هزت أركان المنزل، خرج من غرفة أبيه بعد أن فقد الأمل في الوصول إليهم، ولكنه قد سمع رنين جرس هاتفه في تلك اللحظة.. تبذلت ملامحه وأسرع بالرد عندما رأى اسم المتصل على الشاشة.

- الو.

- أبوة يا علي.

- إيه يا عم كمال انتو فين من الصبح! الموظفين كلموني من الشركة يقولولي إن محدش راح فتحلهم النهاردة وبحاول أتصل بيكو بقالي ساعتين انت وبابا موبايلاتكو مقفولة ونعم ناسية موبايلها هنا.

قاطع العم كمال آخر كلماته بنبرة صوت هادئة:

- مش وقته يا علي دلوقتي اسمعني.. البس هدومك وتعللنا حالا على المستشفى الاستثماري اللي جنب الشركة.

ارتفعت نبرة صوت علي قائلاً:

- إيه! مستشفى إيه هو إيه اللي حصل؟

- أبوك تعب مننا الصبح ونقلناه المستشفى.

- تعب حصله إيه يعني يا عم كمال ما تفهمني!

- العلم عند الله يا بني.. بس الدكتور أصر إنه لازم بتنقل عناية مركزة.. وأدينا قاعدين مستنيين أي حد يطلع يفهمنا اللي بيحصل.

- إيه؟! العناية المركزة؟! طب أنا جاي حالا.

وصل علي إلى المستشفى في تمام التاسعة والنصف وبعد ربع ساعة فقط من مكالمة العم كمال له، سأل في مكتب الاستقبال عن اسم والده وأرشدته موظفة الاستقبال إلى الطابق السابع حيث قسم العناية المركزة، اتخذ المصعد الكهربائي وصعد على الفور إلى الطابق السابع وهو في غاية القلق والتوتر، عند وصوله وجد العم كمال جالسا على أحد مقاعد الانتظار واضعا رأسه في الأرض وبجانبه تقف نغم مستلقية بجسدها على الحائط مربعة ذراعيها.

- بابا فين يا عم كمال.

- أبوك بين أيادي ربنا يابني.. ادعيله.

- يعني إيه بين أيادي ربنا!

- الدكتور خرج من شوية قالنا إن حالته بتتدهور أكثر من الأول.. أبوك كان متشخص بسرطان في الرئة من فترة طويلة ومكانش بيحضر جلسات العلاج يابني.

- سرطان! وانت كنت عارف ومخيبي يا كمال!

- وحياة ولادي يابني ما كنت أعرف حاجة.. هي بس صادفت إن الدكتور اللي كان مشخص حالة أبوك طلع صاحبه وشغال هنا في المستشفى، أول ما عرف إن أبوك هنا جه قابلنا وحالنا اللي حصل.

- يا محمود مينفعش الاستهتار اللي انت فيه دا.. أنا متفهم وجهة نظرك بس اسمع كلامي وتعالى خذ أول جلسة علاج وبعدها ابقى قرر إذا كنت هتعالج ولا مش هتعالج.. على الأقل عشان خاطر ابنك يا أخي!

- قولتك قبل كذا مية مرة يا رأفت إن عندي أعيش سنة طبيعي ولا إني أعيش مليون سنة بعذاب الكيماوي.. وبعدين هو يعني العلاج هيعملني إيه؟ هيطول في عمري سنة ولا سنتين زيادة؟ طب وبعدين؟ هموت برضه.. يبقى أموت في سريري وفي وسط الناس اللي بحبهم ويحبوني أحسن ما أموت لوحدي في أوضة مستشفى.

- يا أخي ليه التشاؤم دا! احنا اكتشفنا المرض في مرحلة مبكرة ولسه عندك فرصة كبيرة إن العلاج ينجح وتعيش باقي عمرك كله في وسط الناس اللي بتحبهم ويحبوك.

- احنا هنضحك على بعض يا رأفت؟ هو فيه حد يا حبيبي بيشفى من سرطان الرئة؟ وحتى لو شفيت.. هعيش اللي باقي من عمري وأنا بعدي عليكو كل شهر عشان أعرف المرض رجعلي تاني ولا لسه؟

- عموما انت حر يا محمود.. اعمل اللي يريحك، بس خليك فاكر إن طريقة تفكيرك دي غلط ومش هتعيشك اللي باقي من عمرك بالسعادة اللي انت متخيلها.

- صدقني يا رأفت انت بالذات لو مكاني هتعمل نفس اللي أنا بعمله.. عشان انت أكثر واحد عارف إن السرطان لعنة مش بتسبب صاحبها، وعارف إن شغلتك.. سامحني يعني.. إنك تخفف عن المرضى وجعهم وتديهم أمل كذاب لحد ما يقابلوا ربي الكريم.

- أنا لو مكانك عمري ما هفرط في حياتي بالطريقة دي.

لمعت الدموع في أعين علي كما هو المنظر في أعين نغم.. صمت للحظات ليستوعب ما سمعته اذانه ثم سأل بنبرة صوت تميل إلى البكاء:

- طب هو في أنهي أوضة من دول؟ أنا عايز أدخل له.

- للأسف مينفعش دلوقتي يا بني.. الدكتور مانع الزيارة.

انفجر علي في العم كمال قائلاً:

- يعني إيه مانع الزيارة! بقولك هدخله يعني هدخله! وسع.

أزاح علي الأخير من أمامه بعنف لا يتناسب مع سنه ثم مشى بضعة خطوات حتى أوقفته نغم وقالت:

- علي ممكن تهدي لو سمحت؟ احنا زينا زيك على فكرة، زي ما...

قاطعها علي قائلاً:

- إيه إيه إيه؟ زيكو زيي؟ هو انتي صدقتي إنك بنته بجد زي ما بيقولوا ولا إيه؟

لحظات من الصمت مرت على نغم وهي تنظر في أعين الأخير بعدم استيعاب لكلماته.. يكمل حديثه ولكنها لم تعد تسمعه، بيتعد صوته عن أذنها شيئاً فشيئاً، فلم تعد مسامعها قادرة على استيعاب المزيد من بعد ما قيل.. ولم تعد تملك على لسانها ما يكفيها من سكاكين حادة لترد بها

تلك الطعنة الموجهة.. توقف فمه عن الحراك فعلمت أنه قد أنهى شن كلماته الحادة، تظاهرت بالتجاهل وعادت لتقف إلى جانب العم كمال في صمت.. لحظات قليلة وقطع توتر الأجواء مجيء أحد أطباء المستشفى بوجه شاحب وجبين متعرق موجهها كلماته إلى علي.

- ازيك يا علي؟

أجاب علي بلهجة حادة:

- سيادتك شايف إيه؟

تدخل العم كمال في الحوار قائلاً:

- دا دكتور رأفت يا علي صاحب والدك.

وجه العم كمال نظره إلى الطبيب رأفت مستسحاً:

- معلىش بقى يا دكتور اعذره.. حضرتك أكيد مقدر وفاهم الحالة اللي هو فيها.

- أكيد يا أستاذ كمال من غير ما تقول.. كان نفسي أقابلك في ظروف أحسن من كدا يا علي.. معرفش إذا كانوا الجماعة قالوك ولا...

قطع علي حديثه قائلاً:

- أيوة أيوة قالولي على كل حاجة.

- طيب بص يا علي.. أنا طبعا المفروض مسمحش لأى حد يدخل للحالة دلوقتي.. بس والدك فاق من خمس دقائق ومصر يقابلك بأي طريقة، ومكدبش عليك الحالة سيئة جدا وأنا خايف نتفاقم زيادة لو رفضنا طلبه..

فا بحكم الصداقة وعشرة العمر اللي بيني وبين أبوك أنا هسمحك تقابله.. لكن بشرط، المقابلة ماتزيدش عن عشر دقائق.

- طب مينفعش ندخل نطمئن عليه احنا كمان يا دكتور؟ انشالله دقيقة واحدة بس ونخرج ثاني.

- صدقيني يا أنسة مينفعش.. لازم واحد بس اللي يدخل.

- خلاص يا علي خش انت يابني اطمئن على أبوك واطلع طمنا عليه.

اصطحب الطبيب علي إلى الغرفة التي يمكث بها والده ثم تركه وذهب، لم يتردد علي حتى طرق الباب ثلاث مرات ثم دخل.. دخل ليجد والده مستلق على سرير ذي ملاءات بيضاء تشبه الكفن، مكبل بالمحاليل وأجهزة قياس النبض والتنفس.. لم يكن يستبعد أبدا رؤية والده بتلك الحالة في يوم من الأيام.. ولكنه لم يعلم أبدا مدى الحزن الذي سوف يمتلكه عندما يأتي ذاك اليوم.

- إيه يا بابا مالك.. قلقتنا عليك.

كان ذلك ما قاله علي بصوت حنون بعد ما مكث بجانب والده واحتضن يسراه بكلتي يده، لحظات ورفع الوالد يده بصعوبة ليضعها على رأس ولده ويتحدث شعره كما لو كان طفلا ثم قال مبتسما:

- فاكرا يا علي وانت صغير لما كنت باجي آخدك من عند جدك كل يوم في نص الليل وتفضل تسألني كنت فين وليه بتأخر عليك كدا؟ وقتها عشان تستحمل غيابي كنت بقولك إن عندي شغل كثير وإني كل ما أتأخر عليك أكثر كل ما هعرف أجيبك لعب أكثر.. فضلت كل يوم أقولك كدا لحد ما سنة ورا الثانية كبرت ومبقاش همك اللعب يا حبيبي..

ساعتها بقيت لما آجي أخدمك تعمل نفسك نايم عشان تبات عند جدك
ومترو حش معايا.

ابتسم علي لوهلة ثم أكمل الوالد حديثه:

- لما كلمتك من سنتين وطلبت منك تجيلي بعد ما تتخرج بحجة إنك
تشيل عني الشغل كنت بكذب عليك يا علي.. اليوم اللي كلمتك فيه كان
نفس اليوم اللي عرفت فيه إن المرض بينهش في جتتي وإنه مش
هيسيني أعيش كثير.. مجيتك هنا يا علي كانت أول حاجة أغصبك
عليها من يوم ما والدتك الله يرحمها اتوفت، بس سامحني يا بني.. مكانش
قلامي طريقة غير دي عشان ألحق أشبع منك قبل ما أموت.

- انت بتقول الكلام دا ليه دلوقتي؟

- عشان مش عايزك تغلط غططي يا بني.. الناس اللي برة دول
بيحسبوها بالورقة والقلم.. إنما أنا شايفه وهو جايلي من بعيد.. وصيتي
ليك يا علي.. بيع كل حاجة يا بني وارجع بلدك.. صفي كل مليم باقيلك
هنا وارجع كون بيت وأسرة تحبهم ويحبوك.. متضيعش عمرك وانت
بتجري ورا نفس السراب اللي أبوك سابك وجري وراه.. وإن كان على
الفلوس فا أديني سيبتك اللي يعيشك مرتاح باقي عمرك.. عشان أضمن
إنك متتأخرش على حفيدي لنص الليل.

طال رنين جهاز رسم القلب.. وطال معه شلال بكاء الطفل.. كانت تلك
هي المرة الأولى التي يبكي فيها علي دون أن يخاف أن يراه أحد، فقد
مات للتو من كان يدفعه إلى مسح دموعه عندما يعلم بوصوله في
منتصف الليل وقبل أن يسأله "بابا انت كنت فين؟ اتأخرت كدا ليه؟".

الاثنين ١٣ نوفمبر ٢٠١٧

الساعة الثانية عصرا بتوقيت الإمارات.

يَا أَيُّهَا النَّفْسُ الْمُطْمَئِنَّةُ ارْجِعِي إِلَىٰ رَبِّكِ رَاضِيَةً مَّرْضِيَّةً فَادْخُلِي فِي عِبَادِي وَادْخُلِي جَنَّاتِي " صدق الله العظيم.

انتهى علي من دفن جثمان والده بحضور العم كمال ونغم وبعض موظفي الشركة القدامى بالإضافة إلى قلة من الصداقات التي كونها محمود الشامي منذ مجيئه إلى الإمارات، لم يظهر خبر وفاة محمود الشامي الكثير من ملامح المفاجأة على وجوه الحاضرين، حيث إن الجميع كان يعلم بتدني حالته الصحية في السنوات الأخيرة.. رحل أغلب الحاضرين بعد أن قاموا بتعزية علي وقراءة الفاتحة على روح والده ولم يتبق لمواساته سوى العم كمال ونغم.. تقدم العم كمال بضعة خطوات لينضم إلى علي أمام قبر والده وقال:

- البقية في حياتك يا بني.

- حياتك الباقية.

- علي أنا عارف إن الوقت مش مناسب بس أنا محتاج أقعد أتكلم معاك شوية.

- وأنا كمان يا كمال عايز أتكلم معاك.

- طيب تحب تروح تترتاح دلوقتي وأبقى أعدي عليك بليل ولا عندك استعداد آخذك دلوقتي ونروح نقعد في أي مكان؟

- لا تعالى دلوقتي.. أنا مش عايز أروح.

- طيب اللي يريحك.

توجه العم كمال إلى نغم وقال:

- روعي البيت ارتاحي انتي يا نغم.. أنا وعلي هنروح مشوار سوا.

- مشوار إيه اللي هتروحوه دلوقتتي بس يا عمو.. تعالو البيت أعملكوا
أي حاجة تاكلوها.. انتو على لحم بطنكم من الصبح.

- معلش يا بنتي مشوار ضروري.. روعي انتي واحنا مش هنتأخر.

- طيب.

رحلت نغم مليية لطلب العم كمال وعاد الأخير إلى علي سائلا:

- فيك حيل تسوق ولا تحب تركب معايا؟

- لا لا أنا تمام.. اطلع انت على أي مكان وأنا وراك.

في تمام الثانية والنصف عصرا كان قد وصل كلاهما إلى أحد المقاهي
التي جلسوا بها عندما اصطحب العم كمال علي إلى جولة في ثاني أيامه
بالمدينة، كان لحسن حظهم أن يجدوا ذات الطاولة التي جلسوا بها في
ذاك اليوم فارغة، اتخذ كلاهما مقعدا ثم قال العم كمال مبتسما:

- مش بيفكرك بحاجة المكان دا يا علي؟

- اه.. كان يوم حلو.

- عارف يا علي؟.. من بييجي ٥ سنين بنتي اتصلت بيا من مصر
وقالتلي إنها حامل.. حامل في توعم، وقتها كنت هطير من الفرحة اني

أخيرا هبقى جد وهبقى عندي أحفاد أرجع أيام طفولتي معاهم من ثاني، لما عرفت إن بنتي ولدت طلبت من أبوك الله يرحمه إني أنزل مصر أشوف أحفادي.. عارف قاللي إيه؟ قاللي: "مفيش وقت يا كمال عندنا شغل.. ابعثها تيجي بيهم من مصر أسهل".. وقتها سكت وزعلت من أبوك أوي إنه بعد كل سنين الخدمة دي مش سامحلي أنزل مصر أشيل احفادي، قعدت ٣ سنين هنا يابني مش عارف أنزل مصر أشوفهم.. كل اللي كنت أعرفه عنهم شوية صور وفيديوهات بنتي بتبعتهملي من الوقت للثاني.. لحد ما من ييجي سننتين كدا كنت قاعد مع أبوك في الشركة لقيته بيطلب مني أنزل مصر أجازة أشوفهم، وإيه بقى.. مش أي أجازة، دا سمحلي بأجازة مفتوحة.. يعني أقعد الفترة اللي أنا عايزها في مصر بعدين أبقى أرجع، دماغى كانت هتشت يا علي.. منين الراجل اللي من كام سنة هب فيا لما طلبت منه أجازة كام يوم جاي دلوقتي يديني أجازة مفتوحة بمرتب ومن غير حتى ما أطلبها؟! لدرجة إني فكرته بيسرحني من الشغل بالذوق.. يوميا بليل وأنا بحضر شنطتي سمعته بيكلمك وبيطلب منك تجيله أول ما تتخرج.. قولت بس.. دا هيجيب ابنه من مصر وهو متخرج طازة يعلمه الشغلانة عشان يمك مكانى.. بس بيني وبينك يابني مفرقش معايا، كان كل همى أرجع مصر النهاردة قبل بكرة عشان أشوف بنتي وولادها اللي اتحرمت منهم ٣ سنين.. كملت تحضير شنطتي ورجعت مصر.. أسبوع والثاني لقيته بيكلمني وبيقولي ماخدش راحتي أوي في الأجازة.. طب وبعدين يارب في الخيلة الكدابة دي؟ لميت حاجتي ورجعت الإمارات ثاني وكملنا شغل عادي زي ما يكون مفيش حاجة حصلت.. قولت يمكن كان بيعتذرلي عن الطريقة اللي عاملني بيها لما طلبت منه الأجازة زمان.. والموضوع عدى.. لحد ما امبارح سمعت من رأفت صاحب أبوك الحكاية اللي كان مخبئها عننا دي.. لما عرفت منه إن الحكاية دي

حصلت من سنتين تقريبا وفي نفس الوقت اللي اداني اجازة وكلمك
عشان تيجي فيه فهمت إنه كان خايف يموت من غير ما يشبع منك..
وإنه خاف عليا أحصله أنا كمان قبل ما أشوف أحفادي.

- الله يرحمه.

- معلىش يابني الكلام خدني شوية وطولت عليك.. المهم انت كنت عايز
تكلمني في إيه؟

- أنا بصراحة كنت عايز أعتذرلك عن الطريقة اللي عاملتك بيها
امبارح في المستشفى.. انت ملكش أي ذنب في اللي حصل، أنا بس
كنت..

قاطععه العم كمال قائلا:

- من غير ما تكمل يابني.. أنا فاهم ومقدر الحالة اللي كنت فيها كويس..
الأهم من إنك تعتذرلي عايزك تعتذر لنعم على الكلمتين الحاميين اللي
بختهم في وشها امبارح، هي مشتكتلش ومظنش إنها المرادي ناوية
تشتكي.. بس أنا متأكد إن اللي قولته وجعها أوي يابني.

- على رأيك والله يا عم كمال.. أنا مش عارف ازاي قولت الكلام دا
أصلا.. ومش عارف هي ازاي قبلته على نفسها وجت وقفت جنبي
النهاردة بالطريقة دي.. دا ولا كإني قولت حاجة.

- سبق وقولتلك يابني نغم مفيش في جدعتها ولا طيبة قلبها اتنين..
وبعدين ما انت عارف اللي أبوك الله يرحمه عمله معاها يخليها تقبل أي
حاجة على نفسها عشان خاطره.. أنا بطلب منك تعتذرلها عشان صعبان
عليا إن موت أبوك يفرق بينكو بالطريقة دي.

- ومن غير ما تطلب يا عم كمال.. أنا كدا كدا كنت ناوي أعتذرلها في أقرب فرصة.. وبمناسبة نعم أنا عايزك في موضوع ثاني.

- اتفضل يا بني.

- بابا كتب تلت أملاكه باسم نعم قبل ما يموت.

- نعم؟

- زي ما سمعت.. أبويا كتب تلت أملاكه باسم نعم قبل ما يموت.

- انت بتتكلم بجد يا بني ولا بتهزر؟

- ودي فيها هزار برضه يا عم كمال؟

- والله يا بني يبقى خير ما عمل.. بس معلىش يا بني متأخذنيش.. هو انت متضايق إنه عمل كدا؟

- لا خالص بالعكس.. أنا بس ببلغك عشان تمشي في الإجراءات وندي البنت حقها قبل ما أسافر.

- تسافر؟! تسافر فين يا بني؟

- اه ما دي ثاني حاجة عايز أكلّمك فيها.

- خير يا بني فهمني؟

- لما دخلت لبابا الأوضة في المستشفى وصاني إني...
تردد علي للحظات فقاطع العم كمال ترده بسؤاله:

- مالك يابني في ايه؟ ما تتكلم.
- وصاني ايني أصفي كل الشغل هنا وأرجع مصر.
- طب ومالك يابني بتزق الكلام من على لسانك كدا ليه؟
- ايه دا هو انت مش متضايق؟
- لا يابني هتضايق ليه؟
- يعني.. تضايق عشان دا مجهود سنين من عمرك وهيضع مثلاً.
- علي احنا قبل ما نيجي هنا قولتلك ايني محتاج أتكلم معاك في موضوع صح؟
- أيوة صح.. أنا آسف معلش سرحت في اللي كنت جاي أكلمك فيه ونسيت موضوعك، اتفضل.
- لا يابني ما أنا اتفضلت من بدري بس انت مش واخذ بالك.
- مش فاهم.
- أنا مش متضايق يابني عشان أنا كمان عايز أسيب الشركة وأرجع مصر.. أرجع بقى أعيش في وسط ولادي وأحفادي.. أشبع منهم وأتمتع بيهم قبل ما العمر يجري بيا وأقابل ربي الكريم أنا كمان.. كفاية أوي كدا شغل وممرطة، أنا خلاص عجزت ومبقاش فاضلي كتير.
- ابتسم علي ثم قال:
- فهمتك.

مع دقة السادسة مساءً كان قد عاد علي إلى المنزل بعد أن قضى قرابة الثلاث ساعات مع العم كمال يتحدثان عن الإجراءات اللازمة لتنفيذ وصايا الوالد، عند وصوله وفي ساعة الغروب وجد نغم جالسة تؤرجح قدميها على ذات المقعد الذي شهد بداية صداقتهم، مضى ناحيتها في هدوء ثم قام بخلع سترته وجلس إلى جانبها دون أن يلقي التحية.

- آسف.

- علي إيه؟

- انتي عارفة علي إيه.

- وانت بقى جاي تعتذر بعد ما عمك كمال خدك على جنب اداك كلمتين في جنابك ولا عشان صعبت عليك؟

- ولا دي ولا دي.. جاي أعتذر عشان أول مرة اللي أقوله مبيقاش له علاقة باللي جوايا.

- علي انت مش محتاج تعتذرلي عن أي حاجة.. كل اللي قولته كان حقيقة ومكنتش متفاجأة وأنا بسمعه.

- ممم.. فاكرة المكان دا؟

- اه.. فاكراه.

- لما اتخانقنا هنا أول مرة قولتلك كلام أسوأ بكثير من الكلام اللي سمعته مني امبارح.. وبرغم كذا مكنتش مقتنع إنني المفروض أعتذر، يمكن عشان اللهجة اللي اتكلمت بيها مهما كانت صعبة بس كانت حقيقية وبتعبر عن اللي جوايا من ناحيتك، انما أنا دلوقتي جاي أعتذرلك عشان

اللي قولته امبارح مكاتش يشبه حتى اللي جوايا من ناحيتك.. كانت أول مرة أحس إنني طفل بيجمع من غير تفكير.. لا استنتي كدا مش أول مرة، حصلت مرة من بييجي سنة و ٤ شهور كدا.

ضحكت نغم ثم قالت:

- ياه.. انت لسه فاكر؟

ابتسم علي ونظر إلى عينيها ثم قال:

- متز عlish بقی.

- خلاص يا عم مش ز علانة.

- طب يلا بقی جهزي نفسك عشان في خلال يوم أو اتنين بالكثير هتيجي معايا البنك أكرمشك قيمة ٥ مليون جنيه في إيدك كدا.

- ٥ مليون؟ لا ياخويا حطهم في إيدك انت.

- يابنتي ما تحترمي نفسك بقی.

- أصل بصراحة يا علي مش عشان قولتلك إنني مش ز علانة يبقی تستخف دمك والراجل لسه ميت كدا.

- ومين قالك إنني بستخف دمي؟

ظهرت ملامح الاهتمام على وجه نغم ثم قالت:

- لأ وضح معلش؟

- لا بقی مش موضح حاجة غير لما تعتذري الأول.

- انجز يا علي أنا أسفة.

- أبويا كتب تلت ثروته باسمك.

- دا بجد؟!!!

- أموت وأعرف ليه مقالكوش هو بنفسه قبل ما يموت بدل ماهو سايبني
لناس مقتنعين إني أراجوز كدا!

- مش فاهمة؟

- أبوة يا ستي بجد.

- بس الفلوس دي مش من حقي!

- اومال من حق مين؟

- من حقك انت يا علي

- ليه هو أنا اللي بقالي فوق ١٠ سنين هنا بصحى كل يوم الفجر وأنزل
جري عشان أفتح للموظفين وأفضل قاعد في الشركة لحد ما أتأكد إن
آخر موظف مشي بعدها أبقى أروح؟

- ماهو أنا كنت باخد مرتب نظير دا على فكرة.

- ممم.. ويا ترى بقى المرتب دا شامل كمان شغل البيت اللي كنتي
بتقومي بيه كله لوحدك لما الشغالين بياخدوا أجازة ولا أبويا اللي مكانش
ببجيك نوم غير لما تظمني عليه ٣٠ مرة؟ بلاش هبل يا نغم.. الفلوس
دي من حقك انتي أكثر من أي حد تاني.. وبعدين انتي هتوجعيلي

دماغي ليه؟ أبويا هو اللي كتب الفلوس دي باسمك ووصاني إني اديهوملك في إيدك، أنا بنفذ الوصية مش أكثر.

- أبوة يا علي بس ٥ مليون دول كتير أوي.. هعمل بيهم إيه؟

- معرفش بقى اتصرفي.. وبعدين مفيش حاجة كتير عليك.

بدأت الدموع تتساقط من أعين نعم فلحظها الأخير وقال:

- يوو بقى هتبربر وتقرفنا.. بتعيطي ليه دلوقتي؟

- ملكش دعوة!

- خلاص بلاش.. ممكن عشان خاطري تبطل عياط؟

أخرج علي ورقة منديل من جيبه وأعطاهم لنغم فمسحت دموعها وأكمل حديثه قائلاً:

- أبوة كدا.. اهدي بقى عشان عايزك في موضوع تاني.

- موضوع إيه؟

- لما تهدي الأول.

- هديت.. اتكلم.

صمت علي للحظات ثم قال:

- بابا وصاني امبارح قبل ما يموت إني أصفي كل مليم هنا وأرجع مصر.. تصوري طلع مضحوك عليا كل المدة دي؟ طلع مكانش جابيني

هنا عشان أشيل عنه الشغل والكلام الفارغ دا.. بيقول إنه جابني هنا لما عرف بموضوع السرطان دا عشان يشبع مني قبل ما ي...
قاطعت نغم آخر حروفه سائلة:

- هتسافر؟

وضع علي رأسه في الأرض قائلا:

- مش أنا لوحدني اللي هسافر.. عم كمال كمان هيرجع مصر.

- وهتسيبوني هنا لوحدني؟

- وانتي عايزة مننا إيه بقى ما خلاص.. كلها يومين وهيبقى معاكى ٥ مليون جنيه.. ولو احتاجتي أكثر منهم كمان كلميني في أي وقت وكل اللي تحتاجيه هيكون عندك.

- علي هو انت ليه مُصر إن علاقتي بيكو كل غرضها الفلوس وبس؟

- مش قصدي يا حبيبتى والله.. قصدي إنك خلاص تقدرى تستثمري فلوسك في أي مشروع وتتجوزي وتخلفي وتعيشي بقى الحياة اللي كان نفسك فيها من غير ما تبقي ملزمة من حد.

- وبعد ما أعمل كل دا.. هلاقي فين أخ زيك أحكيه كل همومي ومشاكلي وأناكف فيه طول الوقت؟ وألاقي فين راجل بطيبة عمو كمال أبقى مطمئنة طول ما هو موجود في الدنيا من بعد باباك الله يرحمه؟ يا علي انتو أهلي.. أنا مليش حد في الدنيا برة البيت دا.

- وهنفضل أهلك يا نغم، أنا وانتي هنفضل اخوات وصحاب لحد ما أشيل ولادك على إيدي.. وكمال أهو هيقعد عواطي جنب ولاده وأحفاده في مصر وتقدري تزوريه في أي وقت.

عادت دموع نغم للتساقط مرة أخرى فارتفعت نبرة صوت علي قائلاً:

- لا لا لا انتي ناوية تعيطي تاني؟ أنا طالع أنام.

- خلاص خلاص.

عادت الابتسامة إلى وجه علي ثم مد يده ومسح دموعها قائلاً:

- يلا هاتي بوسة.

ضحكت نغم بينما أعطها علي قبلة على جبينها ثم ترك مكانه قائلاً:

- تصبجي على خير.

- وانت من أهله.

صعد علي إلى غرفة نومه ثم قام بخلع ملابسه وألقى بجثته على الفراش بعد يوم طويل مليء بالفواصل والأحداث، قرر أن ينهي يومه بتفصيلاً أخيرة لم يتوقع أن يعاود القيام بها من جديد قبل يومين فقط.

الفصل الخامس

شقة ٣

الأحد ١٩ نوفمبر ٢٠١٧

- باشا.. يا بيه.. اصحى يا بيه وصلنا إسكندرية.

استيقظ علي في تمام الثانية عشر ظهرا على صوت سائق السيارة التي استأجرها من مطار القاهرة قبل ساعتين لتعيده إلى الإسكندرية، نظر حوله ليستعيد ذكريات آخر ما رأته عيناه من معالم الإسكندرية قبل سبعة عشر شهرا وقبل أن يغادرها برفقة صديق عمره في زيارة إلى الساحل الشمالي، ارتسمت بسمه الحنين على وجهه ثم أسرع بفتح النافذة ليستشم رائحة اليود التي لطالما اشتاق لها أنفه.

- حمد الله على السلامة يا باشا.

- الله يسلمك.

- تحب أودي حضرتك على عنوان معين ولا حضرتك ناوي تحجز في فندق؟

قام علي بإملائه عنوان فيلا قاسم الشامي ثم أكمل:

- بس هسأذذك تطلع بينا عالبحر شوية الأول.

- بس كدا؟ عيوني.. واضح إن سيادتك مش من هنا.

- اشمعنا يعني؟

- اصل الطلب دا يا باشا دايمًا بيطلبه مني الجماعة المصراوية
والمغتربين.. بيبقوا جايبين بقى يا باشا عايزين يشوفوا البحر ويشموا
هوا إسكندرية قبل أي حاجة.

- لا يا سيدي أنا إسكندراي.. بس تقدر تقول كدا بقالي حبة حلوين
مجتش هنا، إسكندرية متغيرتش كثير عن أيام ما كنت هنا.

- إسكندرية مبتغيرش خالص يا باشا.. تغيب تغيب وترجع تلاقىها زي
ما هي.. وحضرتك كنت فين بقى على كدا؟

- كنت في الإمارات.

- وحلوة على كدا يا باشا الإمارات؟ أصل أنا من فترة كان اتعرض عليا
أشتغل سواق هناك تبع شركة صاحبها راجل مصري كدا من عيلة
الشوام.. تسمع عن عيلة الشوام يا باشا؟

- لأ.. بس إيه اللي منعك تروح؟

- والله يا باشا أنا كنت رايح لحد ما من كام يوم سمعت إن الراجل دا
مات وإن ابنه باع كل حاجة ونزل مصر.. الله ينتقم منه بقى.

- ليه كدا بس؟

- يا باشا بقولك ضيع عليا فرصة عمري.. الواحد بيتنشأ على شغلانة
يجيب منها مصاريف جوازه وفي الآخر بييجي ننوس عين ماما يبيع كل
حاجة ويأخذ فلوس أبوه ينفسح بيها.. أنا قربت أكسر ال ٣٠ يا باشا وألسه
متجوزتش، راكن البت جنبي بقالها ٦ سنين لحد ما شعرها قرب بيبيض
وأهلها جابوا آخرهم مني.

- طب مش يمكن فيه ظروف خلته يعمل كدا؟

- ظروف إيه يا باشا بس.. ظروف إيه اللي تخليه يقطع عيش كل الناس اللي شغالة عندهم دي ويرجعهم من الغربية مكسورين بعد كل البهدلة دي.

- ادعيله يا سيدي ربنا يسهله.. ربك وحده عالم باللي خلاه يعمل كدا

- على رأيك يا باشا.. حمد الله على السلامة وصلنا.

نزل علي من السيارة ثم قام بإخراج رزمة من الدولارات من إحدى حقائبه وسأل:

- مقولتليش اسم الكريم إيه؟

- عماد يا باشا.

- ماشي يا عم عماد.. امسك.

مد علي يده بالمال بينما تناثرت ملامح الدهشة على وجه الأخير سائلا:

- إيه دا يا باشا؟!

في تمام الواحدة ظهرا كان قد انتهى علي من جولة لاسترجاع الذكريات في أنحاء منزله القديم، لم يكن من الغريب أن يجد كل شيء مغطى بالتراب حيث إن أحدا لم يقم بتنظيف المنزل منذ قرابة العام والنصف، وبرغم أن تلك الأتربة أضافت لسحر المنزل ذو الطراز القديم ولكنها كانت عائقا في وجه مبيته بالمنزل الليلية، ألقى علي بحقائبه على

الأرض ثم اتخذ مكانا على أحد مقاعد غرفة المعيشة وأخرج هاتفه ليقوم بتسجيل أولى مذكراته بعد العودة للإسكندرية من جديد.

"١٩ نوفمبر ٢٠١٧.. من أسبوع واحد بس لو كان حد قاللي إني هكون في إسكندرية النهاردة وقاعد بسجل مذكرات في بيتي القديم كنت هقول عليه مجنون، مش فاكّر آخر مرة حصلتلني حاجة شقلبت حياتي بين يوم وليلة كدا كانت امتي.. بس مش مهم.. المهم إن أنا فرحان.. فرحان فرحة محستش بيها من يوم ما سيبت إسكندرية، كل حاجة هنا وحشتني.. البيت وحشني والبحر وحشني.. وليلى.. ليلي كمان وحشتني، بكرة أول ما أصحى هروح أزورها في العنوان اللي ادتهولي قبل ما أسافر.. بس للأسف النهاردة هضطر أروح أبات في أي فندق لحد ما أبعت حد ينضف الفيلا، لو حظي حلو هحكي بكرة عن يومي مع ليلي في تسجيل جديد.. هحكي عن رد فعلها لما تلاقيني بخبط على بابها بعد كل المدة دي.. هحكي عن كام تفصيلة صغيرة اتغيرت في شكلها.. هحكي عن الدفا اللي حسيته لما رجعت لحضنها.. ويارب يبقى حظي حلو.."

الاثنين ٢٠ نوفمبر ٢٠١٧

الساعة التاسعة صباحا

استيقظ علي في جناح فاخر لأحد الفنادق العريقة بالإسكندرية والذي يطل مباشرة على البحر بمنطقة محطة الرمل، نظر في ساعته ليتفاجأ أنه قد استغرق في النوم لقرابة الأربع عشرة ساعة.. ولكن انتابه شعور بالراحة حيث إن أحدا لم يتصل به طيلة ذلك الوقت، شعر أنه قد عاد أخيرا إلى حياته القديمة حيث لا يرن جرس هاتفه كل عشر ثوان ليتلقى المشاكل والشكاوى والأوامر السخيفة.. رفع سماعة الهاتف ليجري اتصالا بخدمة نزلاء الفندق حتى يرسلوا له وجبة فطور ثم توجه على الفور إلى الحمام ليقوم بإزالة لحيته ثم يلقي بجسده تحت المياه الدافئة استعدادا لمقابلة ليلي.

في تمام الثانية عشر ظهرا كان يقف علي أمام بناية تحمل الرقم ثلاثين في أحد أحياء الإسكندرية القديمة، نظر في الورقة التي أعطتها له ليلي ليتأكد من العنوان ثم صعد إلى الطابق الأول العلوي ليترك باب يحمل الرقم ثلاثة، طال انتظاره حيث إن أحدا لم يفتح الباب حتى تناثرت على وجهه ملامح الأسى والإحباط.. ظن أنها ربما تقضي وقتنا بالخارج فمضى بخطوات يائسة ليعود من حيث أتى، لحظات واستوقفه صوت أجش ذو لهجة إقليمية ينادي من خلفه:

- يا باشا.. يا بيه.

التفت علي ليجد رجلا ذو بنية قوية وملابس تنتمي إلى صعيد مصر، استشف سريعا أنه على الأغلب حارس العقار فأجاب:

- نعم.

- سعادتك عايز حد؟

خطرت في بال علي فكرة سؤال ذاك الرجل عن ليلي فأجاب:

- أيوة.. في واحدة ساكنة هنا عندكو اسمها ليلي؟

- ليلي إيه يا بيه؟

- مش عارف.. هي كانت ادتني عنوانها هنا في شقة ٣ بس طلعت خبط على الباب محدش فتح.

- سعادتك متأكد يا بيه إن العنوان اللي ادتهولك صح؟

- أيوة هي كاتبة في الورقة إنها ساكنة في عمارة ٣٠ شقة ٣.

- يا بيه شقة ٣ بتاعة اللواء طارق رفاعي الله يرحمه وبنته ساكنة فيها دلوقتي.

سيطرت الدهشة على ملامح وجه الأخير سائلا:

- لواء مين وبنته إيه.. انت متأكد من اللي بتقوله دا يا..؟

- عبد التواب يا بيه.. محسوبك عبد التواب

- انت متأكد من اللي بتقوله دا يا عبد التواب!؟

- أيوة يا بيه أنا في العمارة دي من يبجي ١٠ سنين.

- طيب.. شكراً.

التف علي ليرحل بينما توالى الأسئلة في رأسه واحدا تلو الآخر.. لماذا أعطتني تلك العاهرة عنوانا مزيف؟ ألا تريد رؤيتي مرة أخرى؟ هل كانت تتلاعب بمشاعر شاب يصغرها في السن حتى تنهي مدة عطلتها وتعود لحياتها من جديد؟ لا لا.. من المؤكد أنني قد أخطأت في العنوان.. ولكن إن لم أخطئ.. فهل هذا يعني أنني لن أراها مجددا؟!!

- علي.

سمع علي ذلك النداء آت من خلفه بصوت أنثوي يحمل نبرة يعرفها جيدا، التفت ليجيب النداء فتبدلت ملامح وجهه وانتابه الدهول قائلا:

- مريم!!

- ازيك يا علي؟

- أنا.. أنا كويس الحمد لله.

- فينك؟ بقالك كثير مختفي.

- لا أصلي سافرت أشتغل برة وحصلي شوية ظروف كدا بس.

- ظروف إيه؟

- سيبك مني.. انتي إيه اخبارك مع خالد؟

تبدلت ملامح وجه مريم بينما وضعت رأسها في الأرض فسأل علي:

- مالك يا مريم في حاجة؟

- لا مفيش.. أنا وخالد سيبنا بعض

- حصل امتي دا؟!!
- من يبجي سنة كدا.
- طب وليه كدا؟
- لا دي حدوتة طويلة أوي.
- طب إيه رأيك نتقابل يوم أعزمك على قهوة وتحكيالي اللي حصل؟ دا لو يعني معندكيش مانع.
- لا معنديش مانع.
- طيب يناسبك بكرة بليل؟
- يناسبني جدا.. وأهو بالمره انت كمان تحكيالي اللي حصلك.
- خلاص اتفقنا.. قوليلي بس انتي ساكنة فين وأنا هعدي عليك بكرة نروح المكان اللي يعجبك.
- أنا ساكنة هنا.. في الدور الأول
- غريبة.
- إيه اللي غريب في كدا؟
- تردد علي للحظات ثم أجاب:
- لأ أصل.. أصل أنا كنت جاي أزور حد تاني ساكن هنا في الدور الأول برضه.. شقة ٣.

ضحكت مريم فتعجب علي من ردة فعلها وسأل:

- بتضحكي على إيه؟

أجابت مريم بينما تستمر في الضحك:

- مش احنا نعرف بعض من ٥ سنين؟ بس بصراحة أول مرة أعرف إن دمك خفيف كدا يا علي.

- مش فاهم.

- علي أنا اللي ساكنة في شقة ٣!

"٢٠ نوفمبر ٢٠١٧.. امبارح كنت فاكّر إني هحكي في المذكرة دي عن ليلى وعن جمال اليوم اللي قضيته معاها.. بس الحقيقة إن اللي حصل النهاردة كان غير كدا خالص، اللي حصل لو فضلت أفكر فيه بقية عمري مش هلاقيه تفسير.. ليلى ادتني عنوان مريم.. أبوة زي ما قولت كدا.. ليلى ادتني عنوان مريم، جابته منين؟ معرفش.. تعرف مريم منين أصلا؟ معرفش.. طب عملت كدا ليه؟ معنديش أدنى فكرة.. زي ما تكون عايزاني اروحلها، زي ما تكون عارفة إني هرجع تاني وأحاول أزورها في الوقت دا بالذات وبعد ما خالد يسبب مريم.. فا أنا بصراحة مش ناوي أتعب دماغى في التفكير أكثر من كدا.. المهم إني اتفقت مع مريم نتقابل بكرة عشان تحكيلى عن اللي حصلها مع خالد، برغم إني أعرف مريم من خمس سنين وأكثر لكن سخرية القدر إن بكرة هتكون أول مرة أخرج معاها.. هو أنا أكيد مبسوط إني قابلتها تاني.. بس في نفس الوقت عايز أعرف ليلى فين.. عايز أعرف إذا كنت هقابلها هي

كمان تاني ولا لأ.. وبصراحة بعد اللي حصل النهاردة مبقتش متأكد إذا
كنت هحكي بكرة عن مريم.. ولا عن ليلى.."

الثلاثاء ٢١ نوفمبر ٢٠١٧

الساعة الثانية ظهرا

بدأ علي ثالث أيام عودته للإسكندرية في أحد المقاهي الشعبية التي كان يمضي بها الكثير من الوقت برفقة أعز أصدقائه في سنوات الدراسة، لم تفارق البسمة وجهه منذ أن جاء حيث إنه لم يلحظ الكثير من التغيير في أجواء المكان وأوجه الحاضرين، افتقد كثيرا لذلك المزيج.. المزيج الذي يجمع بين رائحة البن وصوت ارتطام الملاعق بأكواب الشاي وآيات القرآن المشوش عليها عن طريق محترفي ألعاب الدومينو والطاولة في نهائيات كأس العالم للفراع.

- علي باشا.

التفت علي عند سماعه ذلك النداء ليجد "زيكا" أحد الشباب العاملين بالمقهى منذ زمن والذي يعتبر من علامات المكان فأجاب مبتسما.

- صبح يا زيكا عامل إيه؟

- كله بخير الحمد لله.. إيه يا باشا الغيبة الطويلة دي فينك؟

- أهو سافرت أكل عيش بعد التخرج شوية ولسه راجع.

- ألف حمد لله على السلامة يا باشا.

- الله يسلمك.

- أو مال خالد باشا فين صحيح؟ بقاله ياما غايب عننا هو كمان.

- والله ما أعرف عنه حاجة بقالي كثير.

- ليه كدا بس يا باشا؟ دا انتو كنتو أصحاب الروح بالروح!!

- أهو ظروف بقى يا عم زيكا هنعمل إيه.

- قولي طب يا باشا حصل حاجة ولا إيه؟

- لا محصلش حاجة والله بس انت عارف بقى الدنيا تلاهي.

- جاحدة.. متلاقيش اتنين صحاب غير أما تفرقهم عن بعض.

- على رأيك.

- تشرب حاجة يا باشا؟

- اه والنبي يا زيكا هاتلي قهوة سادة.

- بس كدا؟ من عنيا.. أحلى قهوة اسكتو لعللي باشا.

- تسلّم.

- بس ليك وحشة والله يا باشا.

- وانت أكثر والله يا حبيبي.

غادر علي المكان بعد أن أنهى احتساء قهوته ليعود إلى الفندق مجددا ويستعد للقاء مريم.. نظر في ساعته ليجدها لا تزال الثالثة عصرا فقرر استغلال الوقت المتبقي والعودة إلى الفندق مشيا على الأقدام حيث يمكنه زيارة المزيد من الشوارع والأماكن التي كان يتردد عليها.

- بتدور على حاجة معينة يا باشا؟

كان يعد ذلك السؤال أحد أكثر الأسئلة اعتيادية من قبل بائعي سوق
الغرفة التجارية بمنطقة محطة الرمل والذين يتجنبهم أهل الإسكندرية
أغلب الوقت لأسلوبهم غير اللائق بالتعامل، أجاب علي دون أن يلتفت:

- لا شكرا.

اقترب البائع من علي ثم أمسك بيده قائلا:

- طب تعالى بص بصة بس يا باشا.. عندنا بليزرات وبنطلونات وجزم
حكاية وأسعارنا مش هتلاقيها عند حد.

تضايق علي من أسلوب البائع فارتفع صوته قائلا:

- سيب إيدي يا عم انت! قولتلك شكرا خلاص!

ترك البائع يد علي ثم تراجع بضع خطوات للوراء قائلا:

- آسف يا باشا حقك عليا.. بس وحياء أبوك نفعني وأنا اللي عليا هعمل
معاك الواجب.

رضخ علي لمطلب البائع عندما أدرك ملامح الحاجة على وجهه قائلا:

- لا إله إلا الله.. تعالي يا سيدي وريني عندك إيه.

سادت الفرحة على وجه الأخير بينما أجاب بنبرة حماسية:

- عندي كل حاجة يا باشا.. بص سعادتك في البليزرات دي وارد
إيطاليا.. والجزم دي براندات برضه كلها.. وفيه عندي جوة قمصان لو
حضرتك عايز.

- معندكش لابس عادي؟

- لابس عادي ازاي يا باشا ولمؤخدة؟

- يعني تيشيرتات.. جاكيتات شبابي شوية عن دي.. كدا يعني.

- بس كدا يا باشا فهمتك.. معلش يا باشا متأخذنيش بس لابس سعادتك ما شاء الله يعني خلاني قولت إن ملكش في الكلام دا.

نظر علي إلى ملابسه ثم قال:

- لا دا لابس الشغل بس.

- خلاص يا باشا اللي توامر بيه.. نقي سعادتك اللي عايزه ومش هنختلف.

انتقى علي بضع قطع من الملابس البسيطة التي تلائم سنه والتي اعتاد أن يرتديها قبل سفره إلى الخارج حيث فضل أن تراه مريم بالمظهر الذي اعتادت أن تراه عليه في الماضي.

- ماشي حسابنا كام كدا؟

- خلاص يا باشا.

- لا مينفعش.

- خلاص والله.

- يا عم قول بس.

أطال البائع نظره في أعين علي للحظات ثم أجاب:

- ١٦٣ .

- نعم؟

- حساب سعادتك .. ١٦٣ جنيه.

- اه .. تمام.

في تمام السابعة والنصف كان قد انتهى علي من وضع آخر لمسات استعدادة لمقابلة مريم، أرسل لها رسالة تفيد بأنه سوف يصل إلى منزلها في خلال نصف ساعة على الأكثر ثم غادر الفندق ومضى في طريقه إليها، كان يمتلكه شعور غريب يتأرجح بين الفضول والخوف، الفضول أن يعلم ما دار بينها وبين خالد في فترة غيابه .. والخوف أن تكون تلك المقابلة بداية وقوعه في حبها من جديد.

- الو .

- أيوة يا مريم.

- أيوة يا علي .. أنا خلاص قربت أجهز .. انت فين؟

- أنا خلاص وصلت تحت بيتك اهو .

- طيب اديني ٥ دقائق بالظبط وهكون عندك .

- خدي راحتك .. مستنيكي .

كانت تلك هي المكالمة الهاتفية القصيرة التي أجراها علي مع مريم في تمام الثامنة إلا عشر دقائق وبعد أن وصل إلى منزلها، طال انتظاره لقراءة الربع ساعة حتى وصلت مريم وعلى وجهها ذات الابتسامة الرقيقة التي أوقعت بالأخير في شباك حبها من سنوات.

- كل دا تأخير؟

- معلىش بقى معرفتش أقولك اتفضل.. أصل مفيش حد في البيت.

- ولا يهملك.. على فكرة أنا نسيت أعزيكي امبارح في وفاة والدك، البقية في حياتك.

- حياتك الباقية.. بس عرفت منين؟

- عرفت وخلص.. المهم قوليلي، عايزة تروحي فين؟

- أي حتة.

- اختاري انتي المكان اللي بترتاحي فيه وأنا معاك.

ابتسمت مريم ثم قالت:

- ممم.. خلاص عرفت هوديك فين.

- هتوديني فين؟

- ملكش دعوة بقى سيبلي نفسك.

بادلها علي الابتسام قائلاً:

- ماشي.

تابعت مريم حديثها بينما يمضي كلاهما إلى المكان التي أشارت إليه:

- احكي لي بقى إيه اللي حصلك في السنة ونص اللي فاتوا؟

- بعد آخر مرة كلمتك فيها جاتلي مكالمة تاني يوم من واحد صاحب أبويا بيبيلغني فيها إن أبويا تعبان أوي وإن يستحسن أسافرله في أسرع وقت.. أنا كنت مسافر أصلا عشان أشتغل هناك لكن مكنتش عامل حسابي إن الموضوع هيجي بالسرعة دي.. المهم لميت حاجتي وسافرت الإمارات تاني يوم.

قاطعته مريم بسؤالها:

- إيه دا ثانية واحدة كدا.. يعني انت مقابلتش خالد قبل ما تسافر؟

- لأ.. هقابله ليه؟

- أصل أنا روحته البيت تاني يوم بعد ما انت كلمتني، اتخانقنا مع بعض وسيبته ومشيت.. تاني يوم لقيته باعتلي رسالة بيقولي إنه هيروحلك الصبح عشان تتصالحوا، من بعد ما رجع فضل كام يوم متغير ومش بيرد على مكالماتي، فين وفين لما عرفت أوصله اكتشفت إنه دخل في سكة المخدرات والهروين وبقى مدمن.. حاولت معاه كتير إنه يبعد عن السكة دي لكن مفيش فايده.

- انت لسه بتتعاطى الهباب دا!

- عايزة إيه يا مريم؟

- عايزاك يا أخي.. عايزاك واللي بتعمله دا هيضيعك مني!

- ولا هيضيعني منك ولا حاجة.. كل الخلق بتشرب، وأولهم سي علي بتاعك.. وبعدين الهباب اللي بتقولي عليه دا هو اللي مخليني واقف على حيلي ومستحمل العيشة.

- هو انت فاكر إنك كدا واقف على حيلك؟ يا أخي روح بص لشكلك في المراية.. مش هو دا خالد اللي أنا عرفته وحببته.

- يووووه بقى يا مريم!

- أقولك على حاجة؟ أنا اللي مبقتش قادرة أستحمل أكثر من كدا.. يا تخاف على نفسك نص خوفي عليك وتبطل الهباب دا.. يا إما تنسى إنك كنت تعرفني في يوم من الأيام.

- بعدها بكام يوم سبينا بعض وملحقنش أعراف إذا كنتوا اتقابلتوا اليوم دا ولا لأ.

- خالد أدمن؟! دا مكانش حتى بيشر ب سجاير غير كل فين وفين!

- ودا اللي هيجنني يا علي.. مش عارفة إيه اللي حصله.

- طب معلش يا مريم أنا عندي سؤال.. انتي بتقولي إنك روحتيه البيت تاني يوم بعد ما كلمتك واتخانقتوا.. ولما حب يصالحك بعثلك رسالة قالك إنه هيجيلي الشاليه تاني يوم عشان نتصالح.. معنى كدا إنكو اتخانقتوا بسببي؟

- لآ هو.. هو مش بسببك بظبط يعني بس أنا لما روحتله عشان أبلغه الرسالة اللي قولتالي اتترفز عليا من غير سبب وتقريبا طردني.. على فكرة احنا وصلنا.

توقف علي ثم نظر حوله ليجد نفسه أمام أحد البلوكات الصخرية المطلة على البحر والمنقوش عليها بخط عريض "أحمد بيحب سلمى" وبجانبه إحدى العربات المتجولة التي تقدم المشروبات الساخنة.

- وصلنا فين؟

- وصلنا المكان اللي قولتلك عليه.. إيه معجبكش؟

- لا بالعكس عجبني جدا.. بس بصراحة كنت فاكرك هتودينا مكان صايص من اللي البنات بتحبهم دول.

- صايص؟!!

- اه صايص.. يعني مكان ملزق كدا وكله مظاهر.

- طب لعلمك بقي.. أي بنت في الدنيا بيبقى نفسها تيجي تقعد في مكان زي دا، بس بنخاف من المعاكسات.. فأنا بصراحة قررت أستغل فرصة إنك معايا وأجيبك هنا.

ابتسم علي قائلا:

- يا ستي ياريت تستغليني كل يوم.. انتي متعرفيش مكان زي دا بالنسبالي حلو قد إيه.

بادلته مريم الابتسام فسأل:

- تشربي إيه؟

دقائق معدودة وعاد كلاهما بكوب من القهوة في يده ثم جلسا إلى جانب بعضهما فوق أحد البلوكات الصخرية:

- مكملتليش صحيح.. إيه اللي حصل بعد ما سافرت؟

- ولا حاجة.. لما روحت هناك لقيت أبويا صحته في النازل شوية فعلا بس بيكابر ومش عايز يتعالج.. بيني وبينك ساعتها قلت دول شوية تعب بحكم سنه وضغط الشغل فا كل اللي أقدر أعمله إنني أنزل معاه الشغل أساعده وأشيل عنه الحمل شوية، نزلت تدريب كام يوم وبعدها بأسبوع عينوني مدير حسابات الشركة، قعدت هناك بييجي سنة و٤ شهور كدا، لحد ما من بييجي أسبوع أبويا تعب فجأة وانتقل مستشفى.. عرفنا من الدكتور إنه كان عنده سرطان ومخبي علينا.. ومات في نفس اليوم.. بس يا ستي، دا كل اللي حصل.

ظهر مزيج من ملامح التعجب والحزن على وجه مريم من بساطة سرد علي لأحداث بذاك الأسى، رفعت صوتها بعض الشيء قائلة:

- يا لهوى يا علي انت ازاي ماقولتليش الكلام دا من بدري! البقية في حياتك.

- حياتك الباقية.

- طب وانت إيه اللي رجعتك بسرعة كدا؟

- أبويا قبل ما يموت بدقائق اعترفلي إن السنة ونص اللي قضيتهم هناك دول كانوا تمثيلية وإنه طالبني أروحله عشان يلحق يقضي معايا آخر

أيامه لما عرف إن عنده سرطان، بعدها وصاني إني أصفي كل حاجة باسمنا هناك وأرجع مصر تاني.. عشان يعني أكون بيت وعيلة والكلام اللي انتي عارفاه دا.. وبصراحة أنا كمان كان نفسي أرجع.

- اتغيرت أوي يا علي.

- اتغيرت ازاي يعني؟

- يعني مش حاسة إني قاعدة مع علي الهادي الخجول اللي كنت بشوفه زمان عندنا في الكلية.

- ودي حاجة حلوة ولا وحشة؟

ابتسمت مريم ثم أجابت:

- مش عارفة.

ساد الصمت بينهما لعدة دقائق لم يعمل بهم صوت عن صوت أمواج البحر حتى سأل علي:

- ساكتة ليه؟

- علي هو.. هو انت كنت بتحبني بجد؟

" ٢١ نوفمبر ٢٠١٧ .. كعادة آخر فترة من حياتي.. مفاجآت مفاجآت .. يمكن مفاجأة النهاردة مكانتش إني روحت لاقيت واحدة تالته ساكنة في العنوان اللي ادتهولي ليلي، أو إن حصلت حاجة عطلت

نزولتي مع مريم مثلا.. عشان مفاجأة النهاردة كانت مريم نفسها، من أول المكان اللي اختارت إننا نروحه لحد آخر حاجة حكيتها عن حياتها في الوقت اللي كنت فاكّر فيه إنها اتجوزت وقاعدة في البيت.. حاسس إنني بعرفها من أول وجديد.. يمكن زعلت لما قالتلي إن خالد دخل في سكة المخدرات، وزعلت أكثر لما عرفت منها إنه حاول يوصلني قبل ما أسافر لكن ملحقنيش.. بس فرحتي بيها غطت على كل حاجة، يتهيألي إن اللي حصل في حياتي كله كوم.. واللي حصل من ساعة ما رجعت إسكندرية كوم تاني.. مين كان يصدق إن في ظرف أسبوع واحد حياتي تنتقلب بالشكل دا؟ أبويا يموت فجأة وأرجع إسكندرية بعدها أروح أزور ليلي في العنوان اللي ادتهولي فا أكتشف من غير تفسير واحد إنها ادتني عنوان مريم عشان أقابلها تاني بعد ما خالد يكون سابها؟ مين كان يصدق إن يبجي اليوم اللي أسأل نفسي فيه.. هو النهاردة كان أحلى، ولا يوم ما قابلت ليلي؟".

الفصل الأخير

زي الأفلام

الخميس ٢٦ أبريل ٢٠١٨

الساعة السابعة والنصف مساء

استيقظ علي من غفلة طالت مدتها إلى ثلاث ساعات ليجد نفسه مستلقيا فوق أريكة بغرفة المعيشة الخاصة بفيلا قاسم الشامي محاطا بالعديد من زجاجات البيرة الفارغة، لحظات قليلة والتقطت أذانه صوت رنين جرس هاتفه الملقى على الأرض.

- ألو

- ألو سلام عليكم

- وعليكم السلام.

- باشمهندس علي معايا؟

- أيوة أنا.. مين حضرتك؟

- أهلا وسهلا.. أنا حسام يا فندم المسئول عن قاعة الأفراح اللي حضرتك طلبت تأجرها يوم الجمعة الموافق ٤ مايو.

- أيوة آه.. خير يا فندم فيه حاجة؟

- لالا خالص مفيش حاجة.. أنا بس حبيت أعرف من حضرتك الفرح
هيكون الساعة كام بالظبط.

- الفرح هيكون الساعة ١١ إن شاء الله.

- الساعة ١١.

- أيوة.

- تمام يا فندم.. آسف لو أزعجت حضرتك وألف مبروك.

- لا مفيش إزعاج ولا حاجة.. الله يبارك فيك.

لم تمر لحظات من انتهاء المكالمة حتى طرق أحدهم جرس باب
المنزل، قام علي ليرتدي ملابسه في عجلة ثم ذهب ليفتح الباب حتى
يتفاجأ بمريم حاملة في يدها بضعة علب بلاستيكية تفوح منها رائحة
الطعام.

- حمد الله على السلامة.. ساعة عشان تفتح الباب؟

أفسح لها علي الطريق حتى تدخل بينما سأل:

- مش كنا مع بعض الصبح يا بنتي، لحقت أوحشك؟

- ولا وحشتني ولا حاجة.. أنا بس قولت آجي أدوكك عمايل إيدي قبل ما
تفكر ترجع في كلامك.

- دا أكل بجد يعني؟

- انت شايف إيه؟

- لا تمام تمام.

- ممم.. طب بطل طريقة بقى وخش هاتلنا أطباق.

ذهب علي في طريقه إلى المطبخ ليلبي طلبها بينما قال ضاحكا:

- والله ما بتريق.. مكنتش أعرف بس إنك بتعرفي تطبخي.

وضعت مريم ما كانت تحمله من علب بلاستيكية على سفرة الطعام ثم
لحقت به إلى المطبخ وسألت:

- يا سلام! يعني انت عايز تقنعني إن عندك استعداد تتجوز واحدة
مبتعرفش تطبخ؟

- يعني.. على حسب.

- على حسب إيه بقى إن شاء الله؟

نظر الأخير إليها ثم أجاب مبتسما:

- يعني لوزي القمر كدا واسمها مريم طارق معنديش مانع نقضيها
ديلفري.

بادلته مريم الابتسام قائلة:

- ممم.. ما انت بتهزر أهو.. أومال كنت ضارب في وشي بوز الصبح
ليه؟

- أيوة قولي كدا بقى.. يعني جاية عشان تعرفي كنت ضارب بوز
الصبح ليه.. وجايبالي الأكل دا رشوة عشان أعترف.

- لا بجد يا علي.. كان مالك الصبح في إيه؟
- مفيش والله يا حبيبتي.. انتي عارفة بس النهاردة سنوية جدي الله يرحمه فا كنت متضايق شوية.
- الله يرحمه.. أنا أسفة بجد يا علي مجاش في بالي حاجة زي كدا.
- لا أسفة على إيه.. ولا يهملك.
- عاد كليهما إلى سفرة الطعام محملين بالملاعق والأطباق بينما لاحظت مريم زجاجات البيرة التي تملأ غرفة المعيشة فقالت:
- ماقولتليش يعني إنك رجعت للشرب تاني.
- لا دا النهاردة بس.. وبعدين أنا وعدتك إنني هبطل الكلام دا بعد الجواز.
- ماشي.. أما نشوف.
- ابتسم علي ثم أمسك بيدها قائلاً:
- متقلقيش.. أنا علي يا مريم مش.. مش حد تاني.
- طمأنته كلماته مريم بعض الشيء، ساد الصمت لبضعة دقائق بينما يتناولون طعامهم حتى سألت مريم:
- صحيح ماقولتليش.. عزمت مين على الفرح؟
- لسه والله معزمتش حد.
- مستني إيه يا علي! دا الفرح خلاص فاضل عليه أسبوع.

- ما أنا معنديش حد أعزمه.

- طب وبعدين ناوي تعمل إيه؟

- ولا قبلين.. هبقى أكتب بوست على الفيسبوك بميعاد ومكان الفرح واللي عايز يبجي يبجي بقى.. المهم انتي عزمتي مين؟

- عزمت الكام صاحبة اللي حيلتي من أيام الكلية بس.. لسه مفيش حد تاني في دماغي.

دخل علي بالتدريج في نوبة من الضحك فسألته مريم متعجبة:

- بتضحك على إيه؟

- أصل أنا وانتي مقطوعين فشخ بصراحة.. أنا خايف نصعب على فرقة الزفة وميرضوش ياخدوا منا فلوس.

بادلته مريم الضحك ثم قالت:

- تصدق انت رخم.

- طب بقولك إيه بقى بما إني رخم.. ما تجيبي بوسة دلوقتي كدا وحتسبها عند الله حلال.

رفعت مريم يدها بالمعلقة بينما امتعض وجهها قائلة:

- علي والله لو ما لميت نفسك هضربك.

- هتضربيني بالمعلقة؟

- أه!

- طب كملې ياختي اكل
- قال عايز بېوسني قال!!
- نينينيني.

الثلاثاء ١ مايو ٢٠١٨

الساعة الثانية ظهرا

" ١ مايو ٢٠١٨ .. آخر مرة سجلت كانت من ٥ شهور أو أكثر، لسه فاكر اليوم دا كويس.. كان يوم ما خرجت مع مريم لأول مرة بعد ما قابلتها صدفة في العنوان اللي ادتهولي ليلي.. وقتها كنت حاسس إنني بفتح معاها صفحة جديدة وبصراحة اتعشمت إن ممكن المعجزة تحصل ويبقى في بيننا حاجة برغم كل اللي حصل.. بس مكنتش أتخيل أبدا إنني بعد شهر واحد بس من اليوم دا هطلب إيدها وتوافق.. غريبة أوي.. الحدوتة كلها على بعض غريبة.. غريبة لدرجة إنني بقيت أتجنب التفكير فيها بالمنطق.. في خلال سنتين وبس كل الظروف تأمرت عشان مريم تكون ليا.. من أول خالد اللي سابها بكامل أرائته لحد أبويا اللي طلب مني أرجع إسكندرية زي ما يكون عارف إنها مستنياني.. حتى ليلي.. ليلي اللي كنت متخيل إنها طوق النجاة من قصة حبي ليها طلعت أهم جزء من المؤامرة.. المؤامرة اللي خلتنني ماسك الموبايل دلوقتي وبقول إن فرحي على مريم بعد يومين.. متوتر؟ مخضوض؟ خايف شوية؟ يمكن.. لكن الأكيد إنني مش متردد، مش متردد عشان بقيت بمجرد ما بحس إن مريم قلت في عيني ولو بنسبة ١% بفكر نفسي بأيام ما كنت أتمنى بس تبصلي، بفكر نفسي بالليالي الطويلة اللي عيشتها وأنا بحلم بيها، بفكر نفسي بالوجع اللي حسيته يوم ما شوقتها مع خالد، بفكر نفسي بكل لحن عزفته وأنا شايف صورتها على النوتة قدامي.. وبفكر نفسي بفرحتي يوم ما قابلتها من ثاني.. بفكر وهفكر نفسي بكل لحظة كانت مريم عندي فيها تساوي الدنيا.. عشان عمري ما هسامح نفسي لو ضاعت من إيدي ثاني".

أنهى علي تسجيل أولى مذكراته منذ مدة ليست بقصيرة بينما يحتسي القهوة في حديقة الفيلا العتيقة، لحظات قليلة ورن جرس هاتفه من أحد الأرقام غير المسجلة والتي اعتاد مؤخرا أن يتلقى منها المكالمات في ظل تحضيراته للفرح.

- ألو.

- بقى يا جزمة انت يجيك قلب ومتسألش عليا من ساعة ما ترجع مصر وكمان أعرف بالصدفة إنك بنتجوز ومتعزمنيش على الفرحة!

- يااه.. انتي يا بنتي مفيش فايذة في لسانك دا خالص؟! عاملة إيه يا بت وحشاني.

- لا والنبي وحشاك؟ مش باين.

- والله يا بنتي لو قعدت أحكيك اللي حصلي من ساعة ما رجعت لحد دلوقتي ما هتصدقني.. إيه دا استني كدا.. انتي بتتصلي من رقم في مصر؟! لا متقوليش.

- أيوه عليا دا أنا كنت عايذة أعملها لك مفاجأة.

- مفيش فايذة في غباوتك.. عايذة تعملهالي مفاجأة تقومي متصلة بيا من رقم في مصر.. قنبلة ذكاء يا نعم والله!

- خلاص بقى يا لولو بلاش إحراج.. وبعدين تعالى هنا، مش تعزمني على الفرحة الأول بدل ما انت قاعد تهزقني كدا؟

- يا بنتي هو انتي محتاجة عزومة؟! دا انتي تيجي تقعدى على الكوشة
مكاني.. بس مش تسأليني الأول مين العروسة؟

- مين؟

- مريم.

- مريم مين؟! مريم اللي حكلي عنها؟! لا بتهزر.

- والله يا بنتي ما بهزر.. مش قولتلك مش هتصدقيني لو حكيتلك؟

- ودي عترت عليها تاني فين يا ابن اللذينة؟

- لا دي حكاية طويلة أوي هبقى أحكيها لك لما نتقابل.. المهم قوليلي،
انتى خلاص كدا ناوية تستقري هنا ولا جاية أجازة وراجعة تاني ولا
إيه؟

- لا ياخويا قاعدة على قلبك.

- طب والله أحلى خبر سمعته من زمان.. بس إيه اللي حصل خلاكي
ترجعى؟

- اتخنقت من العيشة هناك لوحدي.. انت و عمك كمال سيبتوني
ورجعتوا مصر وقعدت أنا وشي في وش الحيطه أغني ظلموه.

- طب بقولك إيه صحيح متعرفيش أوصل لكمال ازاى؟ عايز أعزمه هو
كمان على الفرحة.

- أه كان سابلي رقمه في مصر.. هبعثلك الرقم في رسالة.

- طيب يلا مستنيكي يوم الجمعة الساعة ١١ .. متأخرش.

- المهم متأخرش انت بس.. أحسن أنا عارفاك مسطول.

- لا ياختي متخافيش.

لم تغرب الابتسامة عن وجه علي منذ أن أغلق الخط، حيث إنه لم يكن ليتوقع مفاجأة تضي عليه ذلك القدر من البهجة في ظهيرة يوم الثلاثاء تعيس وفي أوقات لا يخفف من ضغوطها سوى مكالمة رومانتيكية تجمعها بالحببية من آن إلى آخر.. دائما ما تنجذب نحو أجسادنا حرارة نيران قد قمنا بإشعالها يوما، تنجذب نحونا لكي تمدنا بالطاقة التي نقطع بها رهانات الصمود في ليالي البرد والوحدة، لكي تضيف لنا خيار الحرب.. لكي تطرح علينا سؤال البقاء، وبفضل ما قمت أنت بإشعاله يوما، لا أعتقد يا صديقي أنك سوف تموت بردا.

- الو.

- أيوة يا مريم.. خير حصل حاجة؟!

- لأ مفيش حاجة حصلت.

- طيب الحمد لله.. أومال فيه إيه؟

- بكلمك يا علي عادي.. أنا صحيتك من النوم؟

- لا يا حبيبتي طبعاً صحييتيني من النوم إيه بس.. أنا كنت قاعد بنفرج

على أفلام سكس!!

- لم نفسك يا علي.

- ألم نفسي ازاي بس! متصلة بيا الساعة ٣ الفجر وأنا عندي مليون مشوار الصبح وبتسأليني إذا كنتي صحيتيني من النوم ولا لأ؟! ما أكيد نايم يعني يا مريم أومال هكون بعمل إيه!!

- خلاص خلاص.. أنا آسفة، باي.

- استني.

- نعم؟!!

- خلاص صحيت.. عايزة إيه؟

- لا خلاص مش عايزة حاجة.

- متقمصيش بقى خلاص.. معلىش يا مريم انتي عارفة إني مبحبش حد يصحيني من النوم بس.

- ماشي هعديها المرادي.. بس اعمل حسابك إن الكلام دا مش هينفع بعد الجواز.. انت عارف يا علي إن العصبية بتوترني.

- حاضر يا ستي.. ها قوليلي بقى كنتي عايزة إيه؟

- ممم.. كنت عايزاك تعزفلي حاجة على الكمانجة.

- نعم؟

- إيه في إيه؟! بقولك عايزاك تعزفلي حاجة على الكمانجة.

- انتي مجنونة يا حبيبتي؟

- وفيها إيه يعني يا علي.

- لا مفيش بس أصل.. أصلي نسيت الكمانجة في العربية من ساعة آخر مرة.. طب إيه رأيك تغنيلي انتي حاجة احسن؟

- ممم فكرة حلوة.. تحب أغنيك إيه؟

- أي حاجة يا حبيبتي.. كل اللي يبجي منك حلو.

- أغنيك فيروز؟

- مثلاً.

- ممم.. عندي ثقة فيك.. عندي أمل فيك.. وبيكفيك.. شو بدك يعني أكثر بعد فيك؟ عندي حلم فيك.. عندي ولع فيك.. وبيكفيك.. شو بدك إنو يعني موت فيك؟ والله رح موت فيك.. صدق إذا فيك.. وبيكفيك.. شو بدك مني إذا منت فيك؟ معقول في أكثر؟ أنا ما عندي أكثر.. كل الجمل يعني عم تنتهي فيك.. عندي ثقة فيك وبيكفيك.. ها إيه رأيك؟ علي.. علي انت نمت؟!

- بحبك.

الجمعة ٤ مايو ٢٠١٨ الساعة الحادية عشر والنصف مساء

"٤ مايو ٢٠١٨.. يتهيأ لي إن آخر حاجة المفروض أكون بعملها دلوقتي هي إني أسجل مذكرات.. ليه؟ عشان النهاردة فرحي، أو بمعنى أصح دلوقتي فرحي.. يا ترى إيه الدافع اللي ممكن يخلي واحد يركن عربيته قدام الفندق اللي فيه فرحه ويسيب الفرحة بالمعازيم بالعروسة عشان يقعد يسجل مذكرات قبل ما يدخل؟ مش عارف.. ومش عارف كمان ليه عيني بتدمع دلوقتي.. ليه إيدي بتترعش.. مع إني مش خايف، مش عارف أصلاً إذا كنت فرحان ولا متضايق.. إحساس غريب أوي أول مرة أحسه.. زي ما تكون دي النهاية.. نهاية تقليدية لفيلم أبيض وأسود.. بس كان نفسي باقي الأبطال بيقوا معاً..".

- ألو.

- انت فين يا علي اتأخرت كدا ليه؟! بقالي ساعة قاعدة مستنياك والمعازيم تحت بدأوا يسألوا علينا.

- معلش يا حبيبتني والله السكة كانت زحمة شوية بس.. أنا خلاص وصلت أهو.

- طيب يلا اطلعي على أوضة ١٧٣ بسرعة.. مستنياك.

- حاضر، دقيقة بالظبط وهكون عندك.

مضى علي إلى الفندق ثم ذهب ليلقي بنظرة سريعة على قاعة حفل الزفاف قبل أن يلتقي بفاتنة ليلاه ويمضيان بين الناس، تفاجأ بكثرة عدد الحضور ما بين وجوه لا يتذكر أنه قد رآها من قبل وأخرى يعرفها جيدا، لم تكن الليلة أشبه بحفلات الزفاف التقليدية.. حيث إن العروسين كان لهما ذوق رفيع في تصميم حفل زفاف راق ومميز، قليل من الأضواء الصاخبة مع كثير من الشموع التي تضيء على أرجاء المكان لونا أصفرا هادئا، مزيجا بين موسيقى "فرانك سيناترا" و"ديميس روسوس" و"لويس أرمسترونغ" يعزفه فريق من أولي الخبرة وتطرب عليه فتاة ذات صوت ناعم في خلفية ضجيج الحضور، الجميع لا يزال محتفظا بأماكنه على الطاولات.. يطلقون الضحكات العريضة ويتبادلون النسيمة على بعضهم بعضا في انتظار مجيء العروسين وانطلاق الصخب، تغطي روائح عطورهم على رائحة أوراق الفل المتناثرة في جميع أنحاء المكان.. وتلفت أنفاقتهم أنظار بعضهم البعض عن الشاب الوسيم ذو البدلة السوداء وربطة العنق اللامعة الذي يلتمس النظر عليهم من بعيد.

صعد علي إلى الغرفة رقم مئة ثلاثة وسبعون ليأخذ عروسه ويتوجهان إلى قاعة حفل الزفاف، طرق الباب عدة مرات حتى فتحت له إحدى صديقات العروس والتي تركت لهم الغرفة على الفور بعد أن عانقت صديقتها وباركت لهما على الزواج، اقترب الأخير من عروسه الجالسة أمام المرأة والتي كانت تبدو في أبهى صورها.

- إيه القمر دا؟! -

التفت مريم عند سماعها تلك الكلمات وسألت مبتسمة:

- بجد يا علي الفستان عجبك؟

- وعجبتي أكثر صاحبة الفستان.

- وانت كمان يا حبيبي شكلك حلو أوي.

- طب إيه مش يلا بينا ولا هنقضيه هنا؟

- يلا أنا جاهزة.

- هاتي إيدك.

في تمام الثانية عشر مساء وبعد أن طال انتظار الناس حضر العروسان إلى حفل زفافهم وحضرت معهم موجة حارة من التصفيق والزغاريد لتتهز أرجاء المكان، ورود تلقى عليهم من كل جانب بينما يزاول فريق الزفاف عمله من طبل وغناء.. دقائق معدودة ووصل العروسان إلى الكوشة لتعود الأجواء إلى ما كانت عليه من هدوء بينما يذهب البعض ليبارك لهم بصورة شخصية، كان لأمرنا سعيدا أن يرى علي من بين الوافدين وجهين قد افتقد لرؤيتهم كثيرا.. وجهين يعرفهما جيدا.

- الله دا الحبايب وصلوا أهم.

وصل كل من نغم والعم كمال وعلى وجهيهما ابتسامات عريضة:

- ألف ألف مبروك يا علي يابني.

- مبروك يا لولووو.

أجابهم الأخير وعلى وجهه ذات الابتسامة:

- الله يبارك فيكم.
- ألف مبروك يا عروسة.. صبرت ونولت يا واد يا علي.
- الله يبارك في حضرتك ميرسي.
- مبروك يا عروسة.
- الله يبارك فيكي يا حبيبتي.. مش تعرفنا يا علي؟
- بس كدا؟ أعرفك يا ستي.
- رفع علي يده مشيرا إلى العم كمال بينما تابع حديثه:
- دا عم كمال اللي حكتاك عنه.. تقدري تعتبريه كدا أبويا الثاني.
- اه طبعا دا علي حكالي عن حضرتك كثير.. أهلا وسهلا.
- أهلا بيكي يا بنتي.
- تابع علي حديثه قائلا:
- يعني أي مشاكل أي حاجة أدكي عرفتي هتروحي تشتكيني لمين..
- ودي بقى يا ستي..
- قاطعته مريم قائلة:
- نغم صح؟
- إيه دا عرفتي منين؟

- عرفت منين إيه انتي كمان.. ما باين إنك نغم!
- باين إني نغم؟! اوعى يا واد انت تكون قولتها عني حاجة وحشة.
- لالا والله حرام دا على طول بيشكر فيكي وبيقول إنك أعز صاحبة ليه.
- أهو.
- ماشي يا عم.. وانت اعملي حسابك هنبقى صحاب ها.
- أكيد يا حبييتي.
- قال علي:
- اه يا خوفي.
- يلا هنسيبكوا احنا بقى تحبوا في بعض شوية على ما نروح نلعب في البوفيه.. يلا بينا يا عمو؟
- يلا يا حبييتي.
- رحلت نغم برفقة العم كمال بينما أكمل الآخرون حديثهم:
- دمهم خفيف أوي.
- ما هما دول اللي كانوا مصبرينني على العيشة برة.. بقولك إيه يا حبييتي أنا هطلع بس أشرب سيجارة في اللوبي وراجع على طول.
- حبكت يعني يا علي!؟

- معلش بقى انتي عارفة مش هستحمل أقعد كدا.. وبعدين فرصة الناس ملخومة في اليوفيه.

- طيب بس متتأخرش.

- حاضر.

مضى علي في طريقه إلى صالة استقبال الفندق ليحقق رغبته في تدخين سيجارة والابتعاد عن ضجيج الحفل لبضعة دقائق.

- أستاذ.. يا أستاذ لو سمحت.

التفت علي عند سماعه ذلك النداء آت من خلفه ليجد أحد موظفي الاستقبال بالفندق:

- أنا؟

- أيوة يا فندم.. مش حضرتك أستاذ علي العريس؟

- أيوة أنا.. خير فيه حاجة؟

- في حد سأل علي حضرتك من يبجي ربع ساعة تقريبا واسمه مكانش على ليستة المعازيم اللي استلمناها.. هو قاللي إنه هيقعد هنا يستنى حضرتك لحد ما تخرج.

- حد مين يعني؟.. اسمه إيه؟

- هيكون مين غيري يعني يا أبو شام.

التفت علي فور سماعه تلك الكلمات لتتبدل ملامحه ويتفاجأ بعودة أعز
أصدقائه والذي كان يظن أنه لن يلتقي به مجددا، صمت للحظة حتى
استوعب الأمر ثم ضم الأخير إلى عنقه ورفع صوته قائلاً:

- عاااهاهاها وحشتني يابن اللذينة!

- وانت كمان.. ألف مبروك يا صاحبي.

- الله يبارك فيك.. مش عارف المفروض أقولك كنت فين الفترة اللي
فاتت ولا أعتذرلك تاني عن اللي حصل زمان ولا أقول إيه بس.

- متقولش حاجة.. اللي حصل زمان أنا نسيتته من وقتها، ويا سيدي أنا
كنت في مصحة بتعالج ولسه خارج من أسبوع.

- عرفت منين طب إنني بتجوز ولا جيت منين مكان الفرح؟

- ما انت عارف يا أبو شام إنني مبغلبش.. المهم، أنا جيت بس عشان
أباركلك وأوصلك أمانة معايا بقالها زمن.

- أمانة إيه؟

- تعالى معايا.

لحق علي بصديقه حتى خرجوا من الفندق إلى جراج السيارات ثم توقفا
أمام إحدى السيارات المركونة، فتح خالد الحقيبة الخلفية للسيارة ليخرج
منها صندوقاً خشبياً يعرفه الأخير خير معرفة.

الكمانجة بتاعتك.

- إيه دا جبتها منين؟!!

- لما سيبتك ورجعت إسكندرية مريم جاتلي البيت تاني يوم عشان تبألغني رسالتك، ساعتها اتعصبت ودبيت معاها خناقة ويمكن أكون طردتها كمان.. بعدها بشوية لما هديت ودورت الموضوع في دماغي لقيت إن كان معاها حق في كلام كتير قالته وإن في حاجات كتير كنت فاهمها غلط، فا بصراحة قولت مبدهاش بقى.. أنا هبعت أصلحها وهجيك نلم الدنيا ونتصالح احنا كمان.. تاني يوم الصبح روحت الشاليه ملقيتكش، سألت عليك عيل كدا شغال هناك اسمه عبادة وقاللي إنك مشيت من ساعتين وإنه لقي الصندوق دا على البحر ولقى تحته فلوس وورقة مكتوب عليها اسمه.

تعطل رأس علي عن الاستيعاب وبانت ملامح العجب واضحة على وجهه بينما أكمل الأخير حديثه قائلاً:

- مكديش عليك ساعتها شكيت في حوار اسمه اللي على الورقة دا والفلوس.. بس لما رجعت بصيت على الورقة تاني لقيت الاسم فعلا مكتوب بخط إيدك، وبينني وبينك قولت ما هو لو كان عايز الفلوس كان خدها من غير ما يجيبلي سيرة.. فا سيبته الفلوس ومشيت، بس.. ومن ساعتها والكمانجة دي معايا.

- ثانية واحدة بس.. انت تقصد إن ليلي مخدتش الكمانجة؟!

- ليلي مين؟!

- لا ولا حاجة.

- مالك يا صاحبي انت كويس؟

- أنا تمام مفيش حاجة.. هي الساعة كام في إيدك؟

نظر خالد إلى ساعته بينما قال:

- الساعة دلوقتي يا سيدي داخلة على واحدة.

" مساء الخير عليكم.. أولا أنا حابب أشكركم جميعا على تشريفكم لينا الليلا دي.. ثانيا وبما إن أغلبكم ميعرفنيش فا أنا حابب كمان أعرّفكم بنفسي قبل ما أقول أي حاجة.. أنا علي.. علي الشامي، يمكن اللي أعرّفه عن نفسي مش كتير لدرجة إنني أقف كدا قدام حضراتكم وأقول أكثر من اسمي، بس مش مهم.. عشان يتهيألي إن كل اللي حضراتكم محتاجين تعرفوه عني هو إنني بحب البنّت دي.. بحبها بجد، بحبها من أول مرة شوفتها في الجامعة وهفضل أحبها طول عمري.. عشان كدا أنا حبيت أعملها مفاجأة النهاردة وأعزفها مع الفرقة أغنية كانت سبب في يوم إنني أقابلها من ثاني، يمكن حتى من غير ما هي تعرف.. شكرا".



ماليش أمل في الدنيا دي.
غير اني أشوفك متنهني.
حتى إن لقيت إن بعدي.
راح يسعدك، ابعده عني.
أما أنا مهما جرى.
هفضل أصون عهد الهوا.
و إن غبت يوم ولا سنة.
هفضل أنا.. هفضل أنا برضه أنا.



انتهت الأغنية.. وتوقفت حركة القوس على أوتار الكمان العتيق.. دقت الساعة الواحدة.. ورأى علي بين الحضور أجمل وجه يمكن لأي إنسان أن يراه.. بشرة بيضاء انعكست عليها أضواء الشموع لتضيف لجمالها جمالا.. عيون زرقاء وصافية كميّاه بحر لم يعكس صفوها البشر منذ عقود.. شعر أصفر يكاد يصل إلى خصرها.. وبعض بقاع النمش التي سقطت من فرشاة الخلاق عندما كان يرسمها.. كانت جميلة لدرجة جعلته يشك للحظة أنها...

- ليلي؟! -

تمت

٢٠١٨/٦/١٥



جميع حقوق النشر محفوظة. ولا يحق لأي شخص
أو مؤسسه أو جهة إعادة إصدار هذا الكتاب. أو جزء منه .
أو نقله بأي شكل من الأشكال أو تداوله الكترونيا نسخا
أو تخزينا دون إذن خطي من الدار